

অমর প্রেম

শ্রীমানিক ভট্টাচার্য

প্রকাশক—শ্রীশ্রুবোধচন্দ্র মজুমদার,  
দেব-সাহিত্য-কুটীর  
২০১৫ বি, ঝানাপুকুর লেন, কলিকাতা

মাম দেড় টাকা ]

প্রিণ্টার—রাজেন্দ্রনাথ সরকার  
কাত্যারনী প্রেস  
৩৯১১ শিবনারায়ণ দাস লেন, কলিকাতা

# শ্রীযুক্ত অবনিমাধব বন্দ্যোপাধ্যায়

করকমলেশু—

বাল্যে ও যৌবনে তোমার বে স্নেহ লাভ করিয়াছি এবং  
এখনও বাহা সৰ্বক্ষণ অনুভব করিতেছি তাহা মনে করিয়া এই ক্ষুদ্র  
গ্রন্থখানি তোমাকে দিলাম ।

আরম্ভাবাদ ( গয়া )

২৫এ অগ্রহায়ণ—১৩৩৮


}

স্নেহানুগত

শ্রীমানিক ভট্টাচার্য্য

•

১০.৩.২৫



অনন্দ প্ৰেছ

[ ১ ]

স্বাস্থ্যপুৰ গণগ্রাম। কলিকাতা হইতে রৈলে ষষ্ঠাখানেকের  
পাশে গ্রাম হইতে ষ্টেশনে আসিতে মিনিট কুড়িও লাগে না।  
আশে এ গ্রামে ডেলি প্যাসেঞ্জারেরই সংখ্যা বেশী। গ্রামখানি বেশী বড়  
না হইলেও গ্রামে একটা হাইস্কুল, একটা মেয়ে পাঠশালা, একটা  
ছোটখাটো হাসপাতাল—এমন কি একটি ছোট লাইব্রেরী পর্যন্ত  
আছে।

শরৎের অপরাহ্ন। আকাশে খণ্ড খণ্ড লম্বু মেঘ যেন ছোট  
ছোট নৌকার মত ভাসিতেছে। অল্প কিছু পরেই সন্ধ্যা নামিয়া  
আসিলে। নৌদের উত্তাপটুকু দূরে গিয়া শান্ত তিমি এখনি পরলী  
শীতল হইবে।

সুতাসিনী বড় মেয়েকে ডাকিয়া বলিল—লতু, মাতো মা, খোকাকে  
আপন বন্ধিকে নিয়ে একটু ওদের বাড়ী থেকে বেড়িয়ে নিলে আর। আমি  
ততক্ষণ—থাবারটা করে নিই।

লতুর—ভাল নাম লতিকা; বয়স ১৬ বৎসর। বলিল, ওদের বাড়ী

না রাগ করিয়া বলিল, যাবিনে তো সবাইকে নিয়ে আমি একলা

কি করে করব। এখনি সবাই হা হা করে এসে পড়ল বলে।  
তোদেরই ত পেঁটের জ্বালা ধরেছে। সবাইকে কি গিলতে দেব  
শুনি ?

মেয়েও একটু রাগ করিয়া বলিল—তা বলে বুঝি আমি রোজ রোজ  
ওদের বাড়ীতে পড়ে থাকব। আমি পারব না।

মা ঝঙ্কার দিয়া কহিল, কেন পারবে না শুনি—কি নবাবের মেয়ে হয়েছ  
তুমি যে এতটুকু তোমায় দিয়ে হবে না।

মেয়ে এবার সত্যই রাগিয়া গেল। বলিল, তুমি কেন আমার বাপ তুলবে  
আমি যাব না।

মা বলিল, আ-মর, একে বাপ তোলা বলে ; তা যদি বলেতো  
বেশ করিছি তুলিছি। ভাল চান্ তো শীগ্গির নিয়ে যা—  
ওঠ।

মেয়ে তবু খুঁটির মত শক্ত হইয়া বসিয়া রহিল। মা মেয়ের পিঠে  
খুব জোরে গোটা করেক চড় বসাইয়া দিয়া বলিল—যা রান্ধুসী, বেরো  
শীগ্গির আমার সুমুখ থেকে—যা দূর হয়ে যা।

মেয়ে মার খাইয়া একটুও শব্দ করিল না। কিন্তু এক  
বৎসরের গোকাটিকে কোলে লইয়া আশ্বে আশ্বে উঠিয়া বাহিরের  
দিকে চলিয়া গেল। ছোট বোনটির বয়স ৪ বৎসর ;—সে গাত্ৰসন্নিধি  
এ সময় নিরাপদ মনে না করিয়া ধীরে ধীরে দিদির অন্তঃসরণ  
করিল।

লতিকা কাহারও বাড়ী গেল না। বাহিরে আসিয়া প্রথমে সে  
চোখ ছটা বেশ করিয়া মুছিয়া লইল ; তারপর বাহিরের রোয়াকে  
ভাইকে কোলে করিয়া বসিল। বোন যুথিকাও আসিয়া একটু

ভয়ে-ভয়ে তাহার পাশে বসিল। লতিকা তাহার দিকে চাহিয়া দেখিল—কিছু বলিল না।

সেজ মেয়ে কথিকা মেয়ে-স্কুলে পড়ে। ৪টা বাজিবার একটু পরেই সে বই গ্লেট লইয়া শুষ্কমুখে ফিরিল। তাহার বয়স ১১ বৎসর। ঘরে ঢুকিয়াই বই গ্লেট কুলুঙ্গিতে ফেলিয়া সে বলিল—মা, বড্ড খিদে লেগেছে, কিছুর হয় নি?

বলিয়া ক্ষুধিত দৃষ্টিতে মায়ের দিকে চাহিল।

সুহাসিনী মেয়ের শুষ্ক মুখের দিকে চাহিয়া তাহাকে আর রুচ কথায় বেশী বলিতে পারিলেন না। কিন্তু রাগটুকু যথাসম্ভব বজায় রাখিয়া বলিলেন, কি করে হবে খাবার। নিজে তো আর চারখানা হাত বের করতে পারিনে। লতিকে আমি কতক্ষণ থেকে বলছি—যা ওদের নিয়ে একটু ঝাড়ুঘোদের বাড়ী থেকে বেড়িয়ে আর, আমি ততক্ষণ খাবারটা করে নিই। তা মেয়ের বয়ে গিয়েছে সে কথা শুনতে। শেষে যা কতক খেয়ে ওদের বাড়ী গেল।

কথিকা বলিল, দিদিতো ওদের বাড়ী যায় নি। বাহিরের রোয়াকে বসে রয়েছে যে। দাও, আমার দাও আমি রুটি বেলে দিচ্ছি। রোসো হাত-পাটা ধুয়ে আসি।

বলিয়া কথিকা চট করিয়া হাত মুখ ধুইয়া আসিয়া রুটি বেলিতে বসিয়া গেল।

\* রুটি বেলিতে বেলিতে কথিকা বলিল, দিদি ওদের বাড়ী যাবনি ভাগই হয়েছে। ওরা কেমন ধারা লোক।

রুটি সঁকিতে সঁকিতে সুহাসিনী বলিল—কেন ওরা কি কল্লো?

কথিকা বলিল, পরশু দিদি আর আমি খোকাকে নিয়ে ওদের বাড়ী গিয়াছিলাম, তা বাঁড়ুয্যে গিনি বলে কি জান মা? বলে এত বড় মেয়ে হাত-খালি কেন রে? তোর মা-বাপের কি ছুগাছা বাধান শাঁখাও জোটে না যে হাতে দিয়ে রাখে। দিদিতো শুনেই রেগে খোকাকে নিয়ে দূর দূর করে চলে এলো। আমি আম্‌বার সময় বলে এলাম—তাতে আর আপনাদের কি ক্ষতি হয়েছে? আপনাদের কাছে ত চাইতে যাচ্ছিনে!

সুহাসিনী এ সব কথা কিছুই জানিত না। এ পর্য্যন্ত শুনিয়া সে একটু উত্তেজিত হইয়া বলিল—তারপর কি বললে গিনি?

কথিকা হাসিয়া বলিল,—তা বেশ ভালই বললে মা। বললে, বাবা! মেয়ে তো নয়, যেন কেউটে সাপ!

সুহাসিনী রাগের সঙ্গেই মুখে বলিল—তুই বেশ করেছিলি বলেছিলি; কিন্তু সঙ্গে সঙ্গে তাহার চোখ ছুটো সজল হইয়া আসিল। মনে হইল—হায়, কি অদৃষ্ট করিয়াই আসিয়াছিলাম যে মেয়েদের হাতে ছুগাছা করিয়া কাঁচের চুড়িও দিতে পারেন না। লোককে ভগবান্ বলতে দিয়েছেন—বলবেই তো। সঙ্গে সঙ্গে মনে হইল—তাহা হইলে লতুর তো কোন দোষ নাই। বিনাদোবে মেটেটা মার খাইল। অথচ এমন মেয়ে—কেন ওদের বাড়ী যাইবে না সে কথা তাহাকে বলিল না—চুপ করিয়া মার খাইয়া বাহিরে গেল।

সুহাসিনীর চক্ষু দিয়া টপ্ টপ্ করিয়া অশ্রু ঝরিতে লাগিল। কথিকা রুটি বেগিতে বেগিতে মায়ের দিকে চাহিল। রুটি বেলা বন্ধ রাখিয়া—



মায়ের কাছে সরিয়া ছল্ ছল্ চোখে মাকে জিজ্ঞাসা করিল—কাঁদছ কেন মা ? কি হয়েছে ?

সুহাসিনী তাড়াতাড়ি চক্ষু মুছিয়া ফেলিয়া ভারি গলার বলিল—লতুকে একবার ডেকে নিয়ে আয় তো মা শীগগির। বল্ আমি ডাকছি।

কথিকা উঠিয়া গেল। একটু পরেই খোকাকে কোলে লইয়া লতিকা লতিকার সঙ্গে ফিরিয়া আসিল। লতিকা আসিয়া মায়ের কাছ হইতে একটু দূরে দাঁড়াইল।

সুহাসিনী বলিলেন—লতু, সরে আয় তো মা কাছে। লতিকা সরিয়া আসিল।

সুহাসিনী বলিলেন—আমার কাছে বোস্।

লতিকা বসিল।

সুহাসিনী লতিকার পিঠে হাত বুলাইয়া বলিলেন, বড্ড লেগেছে মা ! তা আমাকে বলিস্ নি কেন যে বামুন গিন্নি তোকে এ কথা বলেছে, তোদের মেয়ে, কি গালি মন্দ দিয়ে আমিই কি সুখে থাকি মা !

লতিকা প্রায় বিনাপরাধে—মায়ের কাছে মার খাইয়াও কঁাদে নাট ; কিন্তু মায়ের নিষ্টি অন্ততপ্ত বাক্যে সে ঝর ঝর করিয়া কঁাদিয়া ফেলিল।

সুহাসিনী রান্না ছাড়িয়া চোখের জল ফেলিতে ফেলিতে লতিকাকে বকে ডাঙ্গিয়া ধরিলেন।

সুহাসিনীর শ্বশুরবাড়ী কাঁচড়াপাড়ার কাছাকাছি দুর্গাপুর গ্রামে। সুহাসিনীর সঙ্গে যখন মনোহরের বিবাহ হয়, তখন মনোহর বি-এ পড়ে। সেই বারই সে বি-এ পাশ করিল। মনোহরের শ্বশুরবাড়ীর সকলেই—তাহার সঙ্গে সুহাসিনীও আশা করিয়াছিল যে স্বামী বেশ একটা ভাল রকমের চাকরির যোগাড় করিবে। সুহাসিনী সব সময়ই কল্পনা করিত দূরদেশে পশ্চিমে বেশ ভাল জায়গায় স্বামী বড় চাকরি করিবে; সে ঘরের গৃহিণী হইয়া বসিবে; বি চাকরে সংসারের মোটামুটি কাজ সব করিবে, সে শুধু সব গুছাইয়া রাখিবে, সংসারের সুব্যবস্থার দিকে দৃষ্টি রাখিবে, স্বামীর জন্ত জলখাবারটি করিবে, স্বামীর কারপেটের জুতার উপর ফুল তুলিয়া দিবে, সূচিশিল্পে দুইচারিটি প্রবচন লিখিয়া ছবি তুলিয়া স্বামীর বসিবার ঘরে ও নিজেদের শোয়ার ঘরে টাঙ্গাইয়া রাখিবে। কাহার হাতের এ সব কেউ জিজ্ঞাসা করিলে স্বামী বেশ একটু গর্কিত হাতের সহিত বলিবেন—আমার স্ত্রীর। মেয়েরা তাহাকে জিজ্ঞাসা করিলে সে বলিবে কি জানি। তারা আরো বলিবে তোমারই হাতের বুঝি? বেশ হয়েছে! সে বলিবে—ভারি তো বেশ। আগে জানভাগ, এখন সব প্রায় ভুলে গেছি।

বাপের বাড়ীতে সুহাসিনী শিল্প কাজ, শেলাই, বাংলা লেখাপড়া

মোটামুটি বেশ ভালই শিখিয়াছিল। তাহার গলা বেশ মিঠে বলিয়া বাপ যত্ন করিয়া গান গাহিতে শিখাইয়াছিলেন। কিন্তু শ্বশুরবাড়ীতে আসিয়া দেখিল সে সব বড় একটা কাজে আসিতেছে না। বাসন মাজা, ঘর ঝাটু দেওয়া, রান্না করা ইত্যাদি যে সব কাজ সে যেমন তেমন করিয়া শিখিয়াছিল, তাহারি দাম শ্বশুরবাড়ীতে বেশী হইল। ক্রমে ঘর সংসারের কাজের মধ্যে শিল্প কার্যাদি কোথায় ভাসিয়া গেল। একদিন লুকাইয়া গুন্ গুন্ করাতে শ্বশুরবাড়ীতে এমন এক কাণ্ড ঘটয়া গেল যাহার ফলে সে যে কখন গান গাহিতে পারিত সে কথা সে নিজের কাছেও লুকাইয়া ফেলিল।

এমন সময় মনোহর বি-এ পরীক্ষাটা দিয়া বাড়ী আসিল। সে দিনের বেলায় বাহিরে গল্পগুজব করিয়া বন্ধুবান্ধবদের বাড়ী ঘুরিয়া রাত্রেও ১০টা অবধি খেলিয়া বাড়ী ফিরিত; আহারাদির পর রাত্রি ১১টা ১২টার পর কখন বা স্ত্রীকে লইয়া কাব্য করিবার চেষ্টা করিত। সমস্ত দিন খাটিবার পর বেশী দিনই সে ঘুমাইত। কখন বা কাব্যটুকু উপভোগ করিবার চেষ্টা করিত। মনোহর কখনও বা অনুযোগ করিত, আজকাল সে পড়ে না কেন? তখন তাহার ঠোঁটের আগার উত্তর আসিত, তোমাদের সংসারের যে বাসন মাজিতেই ও ঘর ধুইতেই আগার সব সময় কাটিয়া যায়, পড়িবার সময় আর কোথায় পাইব? কিন্তু তাহা না বলিয়া শুধু তাহার বড় বড় চোখ মেলিয়া স্বামীর পানে চাহিয়া থাকিত, কখন বা অনিচ্ছায় একটা দীর্ঘ নিঃশ্বাস পড়িত। মনোহর জিজ্ঞাসা করিত “রাগ করিলে নাকি”, সে মৃদুস্বরে বলিত ‘না’।

একদিন সূহাসিনী বহুকাল অপঠিত একখানি পুস্তক লইয়া পড়িতে বসিয়াছিল, তাহার ফলে ভাত ধরিয়া গিয়াছিল এবং বড় যা বলিয়াছিল,

গরীবের ঘরে মেমসাহেবের মত বই পড়িলে চলবে না। ইহার পর সুহাসিনী আর সে চেষ্টা করে নাই।

সুহাসিনীর স্বশুর তখন জীবিত। তিনি জমিদারী সেরেস্টার টাকা কুড়ি বেতনে কাজ করিতেন। সুহাসিনীর ভাসুর মার্চেন্ট আফিসে ৬০১ টাকা মাহিনা পাইত। তখন ভাসুরের মাত্র দুইটি ছেলে হইরাছিল— সংসারও তেমন বড় ছিল না। বিপত্তীক স্বশুর, ভাসুর, বড় বা 'ও তাহার দুই তিনটি ছেলেমেয়ে। ভাসুরের টাকায় সংসার চলিত, স্বশুরের টাকায় মনোহরের পড়া চলিত। একটা গ্রাইভট মেসে থাকিয়া সে পড়িত বলিয়া ইত্যাদি একরকমে চলিয়া যাইত। কখন কিছু কম পড়িলে দাদার কাছ হইতে মনোহর চাহিয়া হইত। সকলেরই আশা হইল, মনোহর বি-এ পাশ করিয়া একটা বড়গোছের কাজ পাইবে।\*

মনোহর পাশও করিল; কয়েকদিনের জুগু কিছু সম্বলও বাড়িল। সুহাসিনী পর্য্যন্ত তাহার কিছু ভাগ পাইল, কিন্তু শেষ রক্ষা হইল না।

চাকরি পাওয়া কঠিন হইয়া উঠিল। কথায় বি-এ পাশ যুবকের ডেপুটি ম্যাজিস্ট্রেট হইতেও বাধা নাই, কিন্তু কার্যকালে ডেপুটি ম্যাজিস্ট্রেটের একটা ছোট কেরণীর পদও দুর্লভ। অনেক চেষ্টা করিয়াও সুবিধাগত তাহার কোন চাকরিই জুটিল না। সব ডেপুটি সবরেজিষ্টার, সব-ইনস্পেক্টারের পদের জুগু বিস্তর চেষ্টা পাইল, কিন্তু কিছুতেই সে যোগাড় করিতে পারিল না। শেষে ডাকঘরে ঢুকিবার চেষ্টা করিয়া জানিল, বর্তমানে খালি নাই, খালি হইলে সংবাদ দেওয়া হইবে। সে সংবাদ আর আসিল না।

মনোহরের দাদা একদিন আসিয়া সংবাদ দিল যে, তাহাদের আফিসে একটা ৩০১ টাকার চাকরি খালি আছে। গ্রাজুয়েটকে এ পদ দিবার

ইচ্ছা সাহেবের ছিল না, তবে অনেক চেষ্টিয় সাহেবকে ব'লে ক'য়ে রাজী করিয়াছি, কিন্তু কালই হাজির হইতে হইবে, নহিলে পাওয়া যাইবে না।

মনোহরের সমস্ত অন্তরাত্মা বিদ্রোহী হইয়া উঠিল। বি-এ পাশ করিয়া এত আশা ভরসার পর শেষে মাত্র ৩০২ টাকার একটা চাকরি!— তাও মার্চেন্ট অফিসে! আর এমন মার্চেন্ট অফিসে, যেখানে তাহার দাদা এন্ট্রাস ফেল করিয়া ঢুকিয়া আজ ৬০২ টাকা মাহিনা পাইতেছে। সে খুব জোরের সহিত বলিল, আমি এ কাজ কিছুতেই করিব না। তাহার দাদা বলিল, বসিয়া থাকিলে যদি চলে অর্থাৎ নিশ্চিত আহার পাওয়া যায় লোকে কেন খাটিতে চাহিবে? কথাটা অনেকটা সাধারণভাবেই বলা হইয়াছিল; কিন্তু মনোহর কথাটা বিশেষভাবেই প্রযুক্ত বলিয়া মনে করিল। এই লইয়া দুই ভাইয়ের মধ্যে বেশ একটু মন কষাকষি হইয়া গিয়াছিল। এমন সময় মনোহরের একটি কন্যা জন্মগ্রহণ করিল। ইহার কিছু পরেই মনোহরের পিতার মৃত্যু হইল। শ্রাদ্ধাদির মাস করেক মধ্যে সহজেই প্রকীর্তমান হইল যে, পিতার মৃত্যুতে সংসারের আর কমিয়াছে এবং কন্যার জন্মগ্রহণে কিছু খরচ বাড়িয়াছে এবং ভবিষ্যতে আরও বাড়িবার সম্ভাবনা হইয়াছে। বধু হইয়া আসিয়া অবধি স্নহাসিনীকে যারের সঙ্গে সমান করিয়া সংসারের কাজ করিতে হইত। আজকাল তাহার একটু বেশী কাজই পড়িল। স্বামীর বেকার অবস্থা ও শ্বশুরের মৃত্যুর ইহা অবশ্যস্বাভাবী ফল ভাবিয়া—মুখ বুজিয়া স্নহাসিনী সে সব কাজ করিয়া যাইতে লাগিল। তথাপি মাঝে মাঝে অগ্ন্যুৎপাত হইতে লাগিল।

এইভাবে দুই বৎসর কাটিয়া যাইবার পর কাঁচড়াপাড়ার স্কুলে একটি শিক্ষকের পদ খালি হইল। তখনকার হেডমাষ্টারের ঐ স্কুলেই সে ছাত্র ছিল; তত্পরি সে স্থানীয় লোক বলিয়া তাহাকেই নিযুক্ত করা হইল।

বেতন হইল কিন্তু মাসিক ত্রিশটি টাকা। তাহার দাদা বলিল—হতভাগাটা যদি আমাদের আফিসে সে চাকরিটা লইত তাহা হইলে আজ ৫০৮ টাকা মাহিনা হইত। এখন তো সেই ৩০৮ টাকা ভাল লাগিল। শুনিয়া মনোহর চুপ করিয়া রহিল।

মাস দুয়েক সংসারে একটু শান্তি রহিল। এই সময়ে সুহাসিনী আর একটি কণা প্রসব করিয়া গোলযোগ আবার বাড়াইল। সঙ্গে সঙ্গে মনোহরের কিছু বেতন বাড়িলে বোধ হয় গোলযোগ তত হইত না। কিন্তু তাহা না হওয়ায় গোলযোগ ক্রমশঃ বাড়িয়াই চলিল। শেষে দুই ভাইয়ে কথাবার্তা প্রায় বন্ধ হইয়াই আসিল—বদিও তাহার চতুর্গুণ কথাবার্তা দুই ভ্রাতার স্ত্রীর মধ্যে আদান প্রদান হইতে লাগিল। ক্রমশঃ শান্তিপ্রিয়া সুহাসিনী কলহ-নিপুণা হইয়া উঠিতে লাগিল। দেখিয়া শুনিয়া মনোহর বড়ই ব্যথিত হইত। স্ত্রীকে কিছু অসুযোগ করিতে গেলে সে বলিত,, তুমি মাহিনা কম পাও বলিয়া ত আমি গতর দিয়া পোষাইয়া দিতেছি। ঝি বামুনের কাজ একাই করিতেছি। তবুও যদি দিনরাত্রি বাক্যযুদ্ধা সহিতে হয় তো মানুষ কত সহিতে পারে!

এক রাতে সুহাসিনী সাশ্রনেত্রে বলিল, তুমি বিদেশে একটা ২৫৮ টাকার চাকরি যোগাড় করিয়া আমাকে লইয়া চল—আমি মেয়েদের ভাতের মাড় খাওয়াইয়া নিজে এক বেলা খাইয়া থাকিব, সেও আমার ভাল; তোমার দুটা পায়ে পড়ি।

এই সময়ে মাসিক ৪০৮ টাকা বেতনে মনোহর সুবাসপুর হাই স্কুলে দ্বিতীয় শিক্ষকের পদ যোগাড় করিয়া লইল ও সপরিবারে সেখানে চলিয়া গেল। সে আজ ১২।১৩ বৎসরের কণা। সুবাসপুরে

আসিরা এই কয় বৎসরে তাদের দুইটি ছেলে ও একটি মেয়ে হইয়াছে। কথিকা বার বৎসরের, ছেলে রামপ্রসাদের বয়স ৯ বৎসর, ছোট মেয়ে যুথিকা ৬ বৎসরের—খোকা বৎসরখানেকের। যুথিকা ও খোকাকার মাঝে আর একটি শিশু আসিয়াছিল, কিন্তু কয়েক দিনের বেশী আর সে পৃথিবীতে থাকে নাই।

কিন্তু যে সুখের আশ্বাসে সুহাসিনী বিদেশে আসিয়াছিল সে সুখ কি সে পাইয়াছিল ?

বেলা ৬টা আন্দাজ মনোহর রামপ্রসাদকে লইয়া বাসায় ফিরিল। রামপ্রসাদ সেই কখন বেলা ১০টার তাড়াতাড়ি দুটি ভাত খাইয়া গিয়াছিল—আর সমস্ত দিনটা কিছু খায় নাই; ক্ষুধায় মুখ শুকাইয়া গিয়াছে। তাড়াতাড়ি জুতা জামা খুলিয়া ফেলিয়া বইখানি একটা কুলুঙ্গিতে রাখিয়া বলিল, মা, বড় ক্ষিদে পেয়েছে—শীগগির কিছু খেতে দাও না।

বলিয়া চট করিয়া হাতে মুখে জল দিয়া মায়ের কাছে আসিয়া বসিল।

মনোহর পাশের ঘরে ঘাইয়া একখানি পাখা লইয়া আন্তে আন্তে বাতাস খাইতে লাগিল।

সুহাসিনী দুখানা রুটি ও একটু তরকারি ছেলের সম্মুখে দিয়া জিজ্ঞাসা করিল—স্কুলে খাবার কিছু খাসনে কেন ? সেই কোন্ সকালে খেয়ে যাস্ !

নয় বৎসরের ছেলে এক টুকরা রুটি মুখে পুরিয়া বেশ বিস্তার মত বলিল, খিদে তো তেমন লাগে না; বাবা খেতে বলেন রোজ, আন্দি খাইনে।



সুহাসিনী একটু বিরক্তির সহিত বলিল, ভারি কাজ কর, বাপের সাশ্রয় কর। খেলেই তো পরমা খরচ হবে।

রামপ্রসাদ বলিল, বাবা তো আমাকে খেতে বলেন মা।

সুহাসিনী বলিল—সে যা বলে তা বুঝতেই পাচ্ছি। তুই যেমন ছেলে তেমনি থাক্ দিখি। তোর আর ঢাকতে হবে না।

মনোহর ভিতর হইতে একটু রক্ষস্বরে বলিল, কেন লুকাতে যাবো বনো। এতো আর খুন জখম কিছু করা হয় নি যে ঢাকার দরকার হবে।

সুহাসিনী তৎক্ষণাৎ বলিল, তোমার বা কাজ খুন জখমের চেয়েও বেশী। এইটুকু ছেলে সেই ১০টার এক মুটো খেয়ে গিয়েছে, আর এখন সন্ধ্যা হতে চলল এখন পর্য্যন্ত পেটে কিছু পড়ল না। তা একে ৬টা পর্য্যন্ত বেঁধে না রেখে ৪টার পর যেমন সবাই আসে তেমনি একেও আসতে ছেড়ে দিলে হয়।

মনোহর হাত হইতে পাখাখানি নামাইয়া রাখিয়া বলিল, ছুটির পর ওকে তো আমার কোন কাজের জন্ত আটকে রাখিনে। ছেলেরা ছুটির পর পড়ে, এও বলে আমিও পড়ে তবে যাব। তাই ওকে আর জোর করে টেনে পাঠাইনে।

সুহাসিনী তাচ্ছিল্যের সহিত বলিল, আর অত লেখা-পড়ার কাজ নেই। তুমি লেখা-পড়া শিখে যত করছ—তোমার ছেলেও তত করবে।

মনোহর বলিল, আমি সত্যি করে লেখাপড়া শিখিনি তাই আমার মধ্যে শক্তি জন্মায় নি, কি উচিত কি অযুক্ত সে জ্ঞানও হয় নি—নিজে কিছু না বুঝে পরের কথা যত কাজ করে এসেছি; তাই আজ ফল পাচ্ছি। ও যাতে প্রকৃত লেখাপড়া শিখতে





পারে সেইজন্য একটু চেষ্টা করছি, তোমার কথা ত সে চেষ্টা ছাড়তে পারিনে।

সুহাসিনী বলিল, আমার কথামত তুমি চিরদিন চ'লে এসেছ তাই আজ তোমায় চলতে বলব। তা যদি চলতে তাহ'লে তোমার এত হৃদশা হ'ত না, আমিও এমন ক'রে বয়ে যেতাম না, আর লোকের কাছে আমাদিগকে লজ্জার মাথা হেঁট ক'রে থাকতে হ'ত না। এত বছর কাজ করছ—তুমি বি-এ পাশ করেছ, মুকুও নয়; এত বড় মেয়ে তোমার ঘরে—তাদের হ'হাতে হ'গাছা বাঁধান শাখা দেবারও তোমার ক্ষমতা নাই!

এতক্ষণে আসল কথাটা আসিয়া পড়িল।

তাতে কি হয়েছে?—মনোহর ঈষৎ ক্রুদ্ধস্বরে বলিল।

সুহাসিনী খুব উচ্চ কণ্ঠে বলিল, “হয়েছে আমার মাথা আর মুণ্ড। লোকে যে ছিঃ ছিঃ করে। পাশের বাড়ীর লোকেরাই যে কত কথাই বলে। বলে বাপ-মার এমন ক্ষমতা নেই যে হ'হাতে হ'গাছা কিছু দেয়।

মনোহর বলিল, তা মেয়েদের ওদের বাড়ী যেতে দাও কেন? না যেতে দিলে কথা শুন্তে হয় না।

সুহাসিনী। তুমি তো বেশ বলে যেতে দাও কেন? ছখ তো নাও একসের, সে তো তোমার সকালের চা ক'রে খোকাকে ছবার খাওয়াতেই শেষ হয়ে যায়।

তারপর তোমার বালি দুখটা ধ'রে লেজ হবে—তবে তো; গিল্তে দেব;। শুভক্ষণ যে কেবল: রামার ঘরের: দিকে দেখিয়ে দেবে আর কাঁদবে

তবুও পরের বাড়ী গিয়ে অল্প ছেলেপুলের সঙ্গে ছুদও স্থির হয়ে থাকে ।  
ও বাঁচে আমিও বাঁচি ।

মনোহর । তাহলে বালি একটু সময় মত ক'রে রাখলেই পার । তুমি  
সময় মত কাজ করবে না তাও আমার দোষ হবে ?

সুহাসিনী । না আমারি দোষ । রান্না, বাসনমাজা, জলতোলা  
সবই প্রায় একহাতে করছি । তবুও আমার নিস্তার নেই । মেয়েটাকে  
দিয়ে একটু কাজ পাব তারও উপায় নেই । একটা স্কুলে প'ড়ে  
আমার মাথা কিন্ছে ; আর একজনতো খোকাকে নিরে আছে,  
একটু সময় পেলেই বই খুলে বস্ছে—নইলে তোমার আবার  
শাসন আছে ; পড়া বলতে পারা চাই । তুমি লেখাপড়া শিখে  
সংসারের সব দুঃখ ঘোচালে—এখন তোমার মেয়েরা বাকি  
আছে ।

মনোহর । তোমার কথাগুলো বড় কৰ্কশ হচ্ছে দিন দিন । ও  
লেখাপড়ার কথা নিয়ে ঘা না দিয়ে তুমি কথা বলতে জান না ।  
এ তুচ্ছ লেখাপড়া জানে না অথচ অগাধ জমিদারী আছে দেখে যদি  
বিয়ে করতে, তুমিও বাঁচতে—আমিও বাঁচতাম । এখন তার জন্ত  
আপশোষ ক'রে কি হবে !

কথা বলিতে বলিতে একটা গভীর দুঃখ তাহার মনোমধ্যে  
সঞ্চিত হইয়া উঠিল । ৪টা পর্যন্ত স্কুলে খাটিয়া তারপর ছুটির পর  
কয়েকটি ছেলেকে স্কুলের একটা ঘরে বসিয়া প্রাইভেট পড়াইয়া  
সন্ধ্যার সময় সে বাড়ী ফিরিল, আর তার স্ত্রী তুচ্ছ কথা লইয়া তাহাকে  
আঘাত দিয়া কথা কহিতে লাগিল । এই সংসার ! এই সংসারের সুখ !  
ইহাই দাম্পত্য প্রেম !

বসিয়া বসিয়া এ বাদামুবাদ মনোহর আর সহ করিতে পারিল না। উঠিয়া আলনা হইতে একটা কামিজ টানিয়া লইয়া গারে দিল ও তালি লাগান জুতা জোড়াটি পরিল। তারপর কক্ষত্যাগ করিয়া বাহিরে আসিয়া দাঁড়াইল। সেখান হইতে গুনিতে পাইল সুহাসিনী বলিতেছে—ডেকে বল না, খেতে হবে না! খাবার দেওয়া হচ্ছে। রামপ্রসাদ খাওয়া ফেলিয়া দাঁড়াইয়া বলিল—বাবা! খাবার দেওয়া হয়েছে, এস।

মনোহর ততক্ষণ বাড়ীর বাহির হইয়া গিয়াছিল।

সুহাসিনীর বার বার তাহার লেখাপড়াকে লক্ষ্য করিয়া তাচ্ছিল্যের পথ মনোহরকে কঠিনভাবে আঘাত করিয়া তাহার মস্তিষ্কের মধ্যে যে ঐশ্বর্যের সৃষ্টি করিয়াছিল তাহাতে আর তাহাকে স্থিরভাবে থাকিতে দিতেছিল না, মনোহর তাই বাড়ী হইতে বাহির হইয়া দ্রুতবেগে চলিতে গিয়াছিল।

বাড়ীর সম্মুখেই যে রাস্তা তাহা উত্তর দিকে ২।৩টা বড় বড় আমবাগানের মধ্য দিয়া বরাবর সোজা নদীর ধারে গিয়াছে, মনোহর সেই পথ ধরিল। তাহার যেন কিছুক্ষণের জন্য ভাবনা চিন্তা লোপ পাইয়াছিল। লোকে যখন সময়ে সময়ে কোন জিনিসের দিকে নির্নিমেষ নরনে চাহিয়া থাকে, আর কোন দিকে তাহার দৃষ্টিও থাকে না—চিন্তাও থাকে না, মনোহরের চিন্তে সেইরূপ কেবলমাত্র একটা কথা জাগিতেছিল, তাহা সুহাসিনীর কঠিন তাচ্ছিল্য। তাহার সমগ্র হৃদয় যেন বড় বড় চক্ষু মেলিয়া তাহার প্রতি, তাহার অধীত বিষ্ণুর উপরস্তীর বিপুল তাচ্ছিল্যের দিকে চাহিয়াছিল। মনোহর অর্ধেক পথ আসিতেই সন্ধ্যা নামিয়া আসিল। তখন একটি

ছাত্র বেড়াইয়া বাড়ী ফিরিতেছিল। এই সময়ে শিক্ককে নদীর ধারে বাইতে দেখিয়া সে জিজ্ঞাসা করিল—শ্রাব, এখন কোথায় যাচ্ছেন ?

প্রথম বার মনোহর শুনিতেই পাইল না। দ্বিতীয় বার প্রশ্ন করিতে মনোহর চমকিয়া—তাহার পানে চক্ষু ফিরাইয়া জিজ্ঞাসা করিল—  
কি বলছ ?

ছাত্রকে তৃতীয় বার কথাটা জিজ্ঞাসা করিতে হইল। তখন মনোহর বলিল—এই একটু বেড়াতে যাচ্ছি।


ছাত্রী একটু বিস্মিত ভাবে শিক্কের পানে চাহিয়া রহিল। কিছু বলিল না।

ক্রমশ খানেক দূরেই গঙ্গা। মনোহর ধীরে ধীরে গঙ্গার ধারে গিয়া পৌঁছিল। তখন সন্ধ্যা উত্তীর্ণ হইয়া রাত্রি হইয়াছে।

মনোহর গঙ্গাতীরে বসিয়া আপন অদৃষ্টের কথা ভাবিতে লাগিল।

সংসারে এতগুলি পরিবার কিন্তু আর মাত্র ৫০১ টাকা। ৪০১ টাকা ফুলে আর ১০১ টাকা ফুলের ছুটির পর করেকটি ছেলে আইভিতে পড়াইয়া। সে দশটাকা বাড়ী ভাড়াতেই চলিয়া যায়। বাকি ৪০১ টাকাতেই সব করিতে হয়। যে মাসে ডাক্তার ও ঔষধের খরচ ১৫।২০১ টাকা পড়িয়া যায়, সে মাসে ধার করিয়া সংসার চালাইতে হয়। তারপর সেই ধার শুধিতে কয়েক মাস কাটে। 'ধার শোধ হয় বটে, কিন্তু তাহা শেঠের উপর বাণিজ্য করিয়া। সে কয়মাস, সত্য কথা বলিতে কি, ছেলে-মেয়েদের জলখাবার জোটে না। কি লজ্জার কথা !


কিন্তু সে তো বসিয়া থাকে না। সকাল হইতে সন্ধ্যা পর্য্যন্ত সমান খাটে। স্নানকিটা কেবল ছেলেমেয়েদের পড়ার জন্য রাখে ; আর তাহাও তো ব্যবহার। কিন্তু এত করিয়াও তো কিছু হইল না। না রহিল সুখ,



## অমর প্রেম

না রহিল শান্তি। প্রেম ভালবাসা কাব্যেই দেখিতে পাওয়া যায়। হয়ত বা বড় লোকের ঘরে থাকিতে পারে। কিন্তু দরিদ্রের ঘরে তাহা ছলভ। গাছপালার জীবনের পক্ষে যেমন সূর্যের আলোক ও জলের ধারার প্রয়োজন, প্রেমের মূলেও তেমনি কাকনের পরশ চাই—না-হলে গাছপালার মত প্রেম শুকাইয়া যায়। নইলে সেই সুহাসিনী এত গর্বিত কি করিয়া হইল? সে কিনা ছেড়া-চোরা-বস্ত্র সামনে বসিয়া বসিল—লেখাপড়া শিখিয়া ভূমিও যত করছ তোমার ছেলেও তত করবে। আমি সেই সকাল হইতে সন্ধ্যা পর্যন্ত খাটিয়া পেটে ক্ষুধা লইয়া ফিরিলাম—সে কথা তাহার মনেও হইল না!

আজ যদি আর বাড়ী না ফিরিয়া দূর—দূর—অতিদূর দেশে চলিয়া যাইতে পারিত! তারপর বহুবৎসর পরে প্রচুর টাকা লইয়া ফিরিতে পারিত, তাহা হইলে ইহার উপযুক্ত উত্তর হইত। কিন্তু সে উপায় বে নেই। নিশ্চিত অনাহারের মুখে উহাদের ফেলিয়া দিয়া কি করিয়া সে এখন কোথাও যায়! তাহা হইলে কাল বে তাহার স্ত্রী ও পুত্রকন্যাকে পথে আসিয়া দাঁড়াইতে হয়। তারপর অনাহারে মৃত্যু! কি ভীষণ অবস্থা! লতিকার বয়স ১৫ বছর হইয়া গিয়াছে—তাহারই বা বিবাহ কি করিয়া হইবে! মনোহর বসিয়া বসিয়া আকাশ পাতাল ভাবিতে লাগিল। শেষে স্থির করিল বাড়ী ফিরিতেই হইবে। কিন্তু উপার্জনও ত দরকার, এবং তাহা করিতেই হইবে। যদি কিছু অর্থ উপায় করিতে পারে—তবে এই অর্থের ভিতর দিয়া সে স্ত্রীর উপর এই তাচ্ছিল্যের প্রতিশোধ লইতে পারিবে। গাঢ় অন্ধকারে নদীর হইবার ছাইয়া গেল। এ পারের তীরের ঘনে বিল্লি ডাকিয়া ডাকিয়া যেন শ্রান্ত হইয়া চুপ করিল। অন্ধকার আকাশের উজ্জল তারকাগুলি কালো আধির তারার মত কাম্বুজা হইল।



এ দিকে গৃহকোণে সুহাসিনী হাতে কাজ করিতেছিল ও মনে মনে ভাবিতেছিল, চিরকালই তাহার কষ্টে গেল। যতদিন বৌ হইয়া শশুর-বাড়ীতে ছিল ততদিন রাঁধুনি ও ঝিল্লের মত দিবারাত্রি খাটিতে হইয়াছে, এখানে স্বাধীনভাবে থাকিরাও ছুঃখ ঘুচিল কই? মুন আনিতে পাশ্চ ফুরার—এ কোনদিনই ঘুচিল না। কথার কথার মুখে লাগিয়াই আছে, আমি কি আর ব'সে আছি, আমি কি দিন রাত্রি খাটছি। আর সেই বা কি ব'সে আছে! সমস্ত দিন রাত্রি আলো নেই—বাতাস নেই—সব সময়ে ঘরের মধ্যে বন্ধ। আর ছেলেপুলের সঙ্গে বকিতে বকিতে প্রাণ অস্ত। কি মুখেই তাহাকে রাখিয়াছে! তার উপর—একটা কথা মুখের উপর আনিলেই রাগ। তাহাকে যেন দাসী বাদী রাখিয়াছে যে, মুখ বুজিয়া চিরটাকাল খাটিয়া বাইতে হইবে। একটা কিছু বলিলে সর্বনাশ। না খাইয়া রাগ দেখান হইল। তা দেখাক্—সেও রাগ করিতে জানে—ইত্যাদি ইত্যাদি।

রাগের ঝোঁকে এক আধটা কথা মুখ দিয়া বাহির হইতেছিল। চোখ দিয়া ছুই চারি কৌটা জলও আসিয়া পড়িতেছিল। কিন্তু রাগের বশে চোখের জলকে সে আমলই দিতেছিল না।

রাত্রি ৮টা হইয়া গেল; তখনও মনোহর কিরিল না। লতিকা বলিল—মা, বাবা তো এখনও এলেন না।

সুহাসিনী বাঁকের সহিত বলিল—না এল তো আমি কি করব? আমি তো এখন মায়ার কাপড় বেঁধে তার খোঁজে যেতে পারিনে।

মুখে এই কথা বলিলেও মনে মনে সুহাসিনী উদ্ভিগ্ন হইয়া উঠিতেছিল। লতিকা জিজ্ঞাসা করিল রামকে নিয়ে আমি একবার খুঁজতে যাব?

সুহাসিনী বলিল কোথায় যাবি ? খুঁজতে বাবার কি একটা চুলো আছে !

আরও কিছুক্ষণ চুপচাপ কাটিয়া গেল ।

সুহাসিনী মনে ক্রমশঃ অধীর হইয়া উঠিতে লাগিল । শেষে চুপ করিয়া থাকিতে না পারিয়া বলিয়া উঠিল—কিসে ছেলেমেয়ে পরিবার সুখে শান্তিতে থাকবে সে চেষ্টা তো নেই—থাকবার মধ্যে আছে পুরুষের লক্ষণ রাগ । আমায় যেমন বিনাদোষে কষ্ট দিচ্ছে এ কষ্ট তোলা থাকবে ।

সঙ্গে সঙ্গে চোখের জলটা মুছিয়া ফেলিল ।

এমন সময় মনোহর ধীরে ধীরে গৃহে প্রবেশ করিল । চোখের জলটা সে দেখিতে পায় নাই, কথাটা শুনিতে পাইয়াছিল । মনে মনে সে যে সংকল্প করিয়া আসিয়াছিল ইহাতে সে সংকল্প দৃঢ়তর হইল ; তাহার দৃঢ়বদ্ধ ওষ্ঠাধর খুলিয়া একটি কথাও বাহির হইল না ।

[ ৩ ]

পরদিন সকালে উঠিয়া প্রাতঃকৃত্য শেষ করিয়াই মনোহর বাহির হইল । লতিকা চায়ের জল চড়াইয়াছিল । পিতাকে এত সকালে বাহির হইতে দেখিয়া লতিকা বলিল—বাবা, চা খেয়ে যাও, এখনি হয়ে যাবে ।



## অমর প্রেম

মনোহর বলিল—আজ আর আমি চা খাব না মা ! শরীরটা ভাল নেই ।  
তোমরা খেও ।

বাবা চলিয়া গেলে লতিকা একটা নিখাস ফেলিয়া চায়ের কেটলি  
নাড়াইয়া রাখিল । বাপের অসুখ যে শরীরে নয়, মনে—তাহা লতিকা  
ধুন্ধিয়াছিল ।

সুহাসিনী কাপড় কাচিয়া রান্নাঘরে ঢুকিতে লতিকা বলিল—মা, বাবা  
আজ চা খাননি ।

সুহাসিনী জিজ্ঞাসা করিল—কেন ?

লতিকা । বলেন, শরীর ভাল নেই, খাবেন না । কিন্তু আমার মনে হ'ল  
বাবা রাগ করেছেন ।

সুহাসিনী । কিসে তোর সে কথা মনে হ'ল ?

লতিকা । তুমি কাল বলেছিলে মোটে তো এক সের দুধ—তার সিকি  
ষায় চা কত্তে ।

সুহাসিনী । তা সে কথা কি মিথ্যে !

লতিকা । মিছে তা বল্ছিনে মা । কিন্তু বাবার সেজ্ঞ মনে দুঃখে হয়েছে  
—তাই বল্ছিলাম ।

সুহাসিনী । দুঃখ হ'তে তো আর পরসা খরচ হয় না—তা দুঃখ হ'বে  
না কেন ?

লতিকা আর কিছু বলিল না । চুপ করিয়া রহিল ।

মনোহর বাড়ী হইতে বাহির হইয়াছিল উপায়ের পথ দেখিতে । কিন্তু  
কি উপায় যে দেখিবে তাহা সে এখনও ভাবিয়া ঠিক করিতে পারে নাই ।  
হুই একটা ছেলে পাইলে সকালের দিকে সে পড়ায় । কিন্তু পাড়ারগায়ে  
ছেলে জেটানই শক্ত ।



উত্তরপাড়ার মুখোপাধ্যায়দের বাড়ীর সম্মুখে আসিবারাত্র একটি যুবক হাতমুখে আসিয়া পায়ের কাছে নত হইয়া প্রণাম করিয়া বলিল—আম্বন স্থার, একটু বসবেন।

মনোহর যুবককে দেখিয়া একটু বিস্মিত হইয়া জিজ্ঞাসা করিল—অমর কে ! কবে এলে ?

অমর বলিল—কাল রাত্রে এসেছি স্থার।

মনোহর। আর কে এসেছেন ?

অমর। সবাই এসেছি। বাবা তিনমাস ছুটি নিয়েছেন, ঠিক করেছেন ছুটিতে এখানেই থাকবেন। যদি সবার শরীর ভাল থাকে এখান থেকেই ছুটির পর যাতায়াত করবেন।

মনোহর। তুমি কি করবে ?

অমর। আমাদের কলেজ তো এখন মাস দুই বন্ধ। যদি সুবিধা হয় এখান থেকে যাতায়াত করব—নইলে আমি একা কলকাতায় যাব।

মনোহর। হোস্টেলে থাকবে ?

অমর। আজে ই্যা। আম্বন, বসবেন একটু।

অমরের পিছনে পিছনে মনোহর ভিতরে আসিয়া বৈঠকখানায় বসিল।

মনোহর জিজ্ঞাসা করিল—তোমার বাবা এখনও ওঠেননি বোধ হয়।

অমর। আজে না, তাঁর আজকাল উঠতে একটু দেরী হয়। আজকাল চটার আগে উঠতে বড় একটা পারেন না।

মনোহর। তা'হলে আর একদিন এসে গুর সঙ্গে দেখা ক'রে যাব।

অমর। রাণু, লতু সব ভাল আছে ?

মনোহর। আছে বেঁচে—আমার মত গরীব বাপের তাঁদের যতদূর ভাল রাখা সম্ভব ততদূরই আছে।

অমর । মাহিনে সেই ৪০৬ চল্লিশই পাচ্ছেন । আর বাড়ে নি ?

মনোহর । না, বাড়বার আশা খুবই কম ।

অমর । আর কোথাও পড়ান না ?

মনোহর । পাঁচটা ছেলেকে পড়াই একসঙ্গে—২৬ টাকা করিয়া দেয় ।  
১০৬ টি টাকা পাই—তা সে বাড়ী ভাড়াতেই যায় ।

অমর । স্মার, সেকেণ্ড ক্লাসে আপনার কাছে ইংরাজি আর ফার্স্ট ক্লাসে History প'ড়ে গেছি । তা এখনও তেমনি মনে আছে ; চিরকালই মনে থাকবে ; বিশেষ আপনার Poetry আর History পড়ান জীবনে ভুলব না । এখনও এক একবার মনে হয় আবার এসে আপনার ক্লাসে ব'সে আপনার পড়া শুনি । খুব কম কলেজে আপনার মত Historyর Professor আছেন । অথচ আপনি এই পাড়াগাঁয়ের স্কুলে ৪০৬ টাকায় প'ড়ে আছেন ।

মনোহর । কি করব বাবা—অদৃষ্ট !

অমর । আচ্ছা স্মার ! আপনি Historyর note লিখুন না কেন ! না হয় আপনি যে রকম ক'রে পড়ান, ঠিক সেই ভাবে একখানা Historyর Text-book লিখুন । তাতে জিনিস থাকবে সাধারণ বইয়ের চেয়ে বেশী । কিন্তু ভাষা ঠিক আপনার পড়ানোর ভাষা হওয়া চাই । নিশ্চয়ই তাতে আপনার হুঃখ হুঃবে ।

মনোহর । তুমি বলছ—ভেবে দেখি । কিন্তু অমর, সংসারের চাপে একেবারে উৎসাহহীন হয়ে পড়েছি । চারদিক অন্ধকার—কোন দিক হ'তে একটা আলোর রেখা পর্য্যন্ত দেখতে পাচ্ছিনে ।

অমর । আপনি এই করুন স্মার—আপনার কাছে আলোকের প্লাবন

এসে পৌঁছবে। আপনার লেখা বই নিশ্চয়ই অতি সুন্দর হবে—বাজারের কোন বই তার সঙ্গে তুলনায় পারবে না।

মনোহর। আচ্ছা অমর, আজ থেকে আমি সেই চেষ্টা করব। আজ তাহ'লে এখন উঠি।

অমর। একটু চা খেয়ে যান স্ত্রীর—এখনি নিয়ে আসছি।

মনোহর। না অমর—থাক, আর চা খাব না।

অমর। কেন স্ত্রীর ?

মনোহর। তোমার কাছে বলতে লজ্জা নেই, অমর। যখন আর বাড়াতে পারিনি, তখন ব্যয় কমানো উচিত। আজ লতু সকালে চা করছিল ; আসবার সময়েও বললে বাবা চা খেয়ে যাও। বললাম—না মা, চা আর খাব না। মার মুখখানি ম্লান হয়ে গেল। তারপরে আর তো কোথাও চা খাওয়া যায় না অমর।

তারপর উঠিয়া আবার বলিল—এখন যাই তাহ'লে, তুমি একদিন য়েও।

অমরও সঙ্গে সঙ্গে উঠিল। বলিল—হ্যাঁ স্ত্রীর ! নিশ্চয়ই যাব—আজই যাব'খন। বলিয়া মনোহরকে রাস্তা পর্য্যন্ত আগাইয়া দিল।

সেখান হইতে বাহির হইয়া মনোহর বাজারের দিকে গেল। ততক্ষণ বেলা প্রায় ৮টা বাজিয়াছে। চারিদিকে রৌদ্র ভরিয়া উঠিয়াছে।

বাজারে তখন কাপড়, চাউল, মুদিখানা ইত্যাদির দোকান খুলিয়া গিয়াছে। কোন কোন দোকান সবেমাত্র খুলিয়া ধূনা-গন্ধাজল দিতেছে।

নরহরি দাসের চাউল ও মুদিখানার দোকান বাজারের মধ্যে সব চেয়ে বড়। দোকানে থাকে নরহরি নিজে আর তাহার তিন ছেলে; তা ছাড়া ছজন গোমস্তা। নরহরি এতই সাবধানী আর এমনই সতর্ক তাহার ব্যবস্থা যে, সকল সময়ে অন্ততঃ দুটি ছেলে দোকানে উপস্থিত থাকিবে। ভৃত্যের হাতে এক মিনিটের জন্ত দোকান ছাড়িয়া দেওয়া হয় না। হয় নরহরি নিজে না হয় দুটি ছেলে দোকানে সর্বদা থাকা চাইই। তাহা ছাড়া গোমস্তা আর একটি ছেলের হাতে দোকান ছাড়িয়া না দেওয়ার উদ্দেশ্য— কাঁচা পয়সা পাইয়া পাছে একজন থাকিলে কিছু সরাইয়া ফেলে। ছজন থাকিলে ষোগ করিয়া একাধ্য চালানো কিছু কঠিন হইয়া পড়ে।

নরহরি কিছু ব্যয়কুষ্ঠ, মুখমিষ্টি ও সাবধান প্রকৃতির লোক। দোকান তাহার মান, দোকান তাহার প্রাণ, দোকানই তাহার সব। লোককে আদর অস্ত্যর্থনা করা, সম্মান করা এসব নরহরির চিরদিনকার অভ্যাস।

মনোহরকে সকালে তাহার দোকানের সম্মুখে দেখিয়া নরহরি হাত

ভুলিয়া বলিল—প্রণাম মাষ্টার মশার, আসুন বসুন। বলিয়া বসিবার জন্ত দোকানের ভিতর থলে বিছান একটা টুল দেখাইয়া দিল।

মনোহর বসিতে নরহরি আবার বলিল—সকালে বাজারে যে!

মনোহর বলিল—আপনার কাছেই একটু কাজ ছিল, তাই এসেছি।

নরহরি। আমার কাছে? কি দরকার বলুন।

মনোহর। আপনি একদিন বলেছিলেন না আপনার একজন খাতা লেখার লোক দরকার। পেয়েছেন?

নরহরি। না এখনও পাইনি—আমি নিজে চালিয়ে নিচ্ছি। কিন্তু চোখে ভাল দেখতে পাচ্ছিনে, একটু অশুবিধা হচ্ছে। লোক পেয়েছেন নাকি?

মনোহর। লোক ঠিক পাইনি তবে আমি আপনার খাতা লিখে দিতে রাজী আছি।

নরহরি। আপনি লিখবেন। এতে সামান্য পাওনা—আপনার মত পণ্ডিত লোককে দিয়ে এ সামান্য কাজ করান!

মনোহর। পাণ্ডিত্যের কথা আর বলবেন না দাস মহাশয়। বে লোকের পরিবারবর্নের ছ'বেলা ছ'মুঠো ভাত ভালভাবে দিতে ক্ষমতার কুলার না—তাকে আর পণ্ডিত বলা সাজে না। আর আমি লিখছি ব'লে আমাকে স্ত্রাব্যের বেশী দিতে হবে না। আপনি অন্ত লোক রাখলে বা দিচ্ছেন তাই দিবেন। তবে আমি দিনমানে লিখতে পারব না। সন্ধ্যার পর এসে যতক্ষণ বলেন লিখে দেব। তাতে আপনার আপত্তি নেই তো?

নরহরি। না, তাতে আর আপত্তি কি হ'তে পারে। বেশ, আপনি তাই লিখবেন। তা কত কি দিতে হবে একটা ঠিক ক'রে কেলুন।

মনোহর। সে আপনার যা ইচ্ছে তাই দেবেন।

নরহরি। সে তো ঠিক হ'ল না—একটা পাকা কথা কওয়া দরকার।

মনোহর। আমি তো জানিনে—এতে কি রকম আপনারা দেন। আমি চাই সৎপথে থেকে আরও কিছু উপায় করতে—কারণ আমি মাষ্টারিতে যা উপায় করি তাতে আমার ভাল চলে না। আমি আপনার খাতা লিখে দেব; আরও হ'ল এক দোকানে যদি খাতালেখা আপনার দয়ালু পাই—তাহলে আমার এক রকম চলে যাবে।

নরহরি হিসাব করিয়া দেখিল মাসে ৫০ টাকার কমে আজকাল কোন লোকই লিখিতে রাজী হয় না। এ রকম ইংরাজি-জানা লোক একজন যদি হাতে থাকে অনেক উপকারে আসিতে পারে। তাহার উপর মনোহর বাবু লোক খুব ভাল জানা আছে। তবে খুব হিসাবী ব্যবসাদার হইলেও একজন পণ্ডিত লোককে মাসে ৫০ দিব বলিতে তাহার মুখে বাধিল। ভাবিয়া চিন্তিয়া সে বলিল—আপনি সংবৎসরের খাতা ঠিক ক'রে দিবেন, আমি ৭৫ টাকা আপনার খোকাকে জল খেতে দিব। অবশ্য ২১৪ খানা ইংরাজিতে চিঠি পত্র লিখতে হয় তাও আপনাকে দয়া ক'রে লিখে দিতে হবে। তবে এ টাকা আপনার যখন ইচ্ছে নিতে পারেন, তিন কিস্তিতেও নিতে পারেন।

মনোহর। আমি তো আপনাকে বলেছি আপনি যা বলবেন তাতেই আমি রাজী হ'ব। আপনি ৫০ টাকা বললেও আমি রাজী হ'তাম। আমি এতেই রাজী এবং চিঠিপত্র বাংলা হ'উক ইংরাজি হ'উক আপনার যা দরকার হবে আমি তাই লিখে দেব। আপনি দয়া ক'রে একটু সন্তোষ করবেন যাতে আরও ২১১ দোকানে খাতা লেখা পাই।

নরহরি। আচ্ছা আমি সে চেষ্টা করব। নবীন আমার জ্যেষ্ঠত্ব

তাই হয়। তার দোকানে বোধ হয় খাতালেখার লোকের দরকার। কিন্তু আমার এই যে আশ্চর্য্য মনে হয়, মাষ্টার মহাশয়, আপনারা এত লেখাপড়া শিখেও আপনাদের এ অর্থকষ্ট হয় কেন! আমরা মুখ্য মানুষ—ব্যবসা-বাণিজ্য ক'রে যদি ছ'পয়সা ঘরে আন্তে পারি, আপনার লেখাপড়া শিখে তার চেয়েও বেশী পারা উচিত।

মনোহর। আপনার উক্তির মূল কথাটা ঠিক। বুদ্ধি থাকলে ও বেশী লেখাপড়া শিখলে উপার্জনের শক্তি বেশী হওয়া উচিত। তাতে সন্দেহ নাই; হয়ও তাই। আপনি মূর্খ এবং আমি বিদ্বান্ এ ভুল কথা। কারণ ব্যবসার যে বিদ্যা সে আপনিই আয়ত্ত করেছেন, আর আমি তাতে একেবারে অজ্ঞ। সাধারণ সংসারের অভিজ্ঞতা যার দাম পড়া বিদ্বার চেয়ে অনেক বেশী—তাতে আমি আপনার কাছে দাঁড়াতেও পারিনে। ব্যবসার যে হিসাবপত্র যা আমি কাগজে কলমে করব আপনি তা মুখে মুখে করে ফেলবেন। তবে আমি ইংরাজিতে কিছু কিছু লিখতে বা কথা বলতে পারি আপনি তা পারেন না।

নরহরি। আপনি নিজেকে ছোট ক'রে আর আমাকে বাড়িয়ে অনেক কথা বললেন। কিন্তু আপনিও কি ইচ্ছে করলে ব্যবসা করতে পারেন না? আর ব্যবসা করলে কি আপনারই ব্যবসাতে বুদ্ধি খেলে না? নিশ্চয়ই খেলে।

মনোহর। তা খেলতে পারে, তবে অনেক পরে। সব কাজেই শিক্ষা দরকার। ব্যবসার মত বড় জিনিষ শিক্ষা না হ'লে হবে কি ক'রে! আমি যদি ব্যবসার হাতে কলমে শিক্ষা না পেয়ে ব্যবসা করি আমাকে লোকসান খেতে হবে। লোকসান খেয়ে খেয়ে জ্ঞান বা অভিজ্ঞতা হ'লে

তবে যদি সমান হ'তে পারি। তারপর টাকার দরকার। টাকা না হ'লে কিছুই নয়।

নয়হরি। টাকার দরকার বটে মাষ্টার মশায়। কিন্তু ইচ্ছা আর চেষ্টা থাকলে টাকা করতে বেশী দিন লাগে না। আমি আমার মামার কাছে একটা টাকা নিয়ে ব্যবসা শুরু করেছিলাম। সেই টাকাতে চিনি, মিছরি, ছ'চার রকমের মশলা এই নিয়ে এখান থেকে ছ'তিন ক্রোশ দূরের পাড়াগাঁয়ে যেতাম। ঠাঁড়ি পাল্লা ছিল না, মশলার একপয়সার ক'রে পুরিয়া রাত্রিবোগে বেধে রাখতাম। মনে আছে ছ' আনার মরিচ কিনেছিলাম; সেই মরিচ ষোল পুরিয়া করেছিলাম; এক এক পুরিয়া এক পয়সা। চিনির জন্ত একটা ছোট বাটি রেখেছিলাম—এক পাত্র এক পয়সা। সেও রাতে পুরিয়া ক'রে রাখতাম। পাড়াগাঁয়ে ছরারের সামনে পেয়ে সবাই প্রায় ২।১ পয়সা ক'রে জিনিস কিনলে! প্রথম দিনেই আমার ১২ টাকার জিনিস ২২ টাকায় বিক্রি হ'ল। সে সব গ্রামে তরীতরকারি সস্তা বিক্রী হত; আলু পটল নয় অবিশিষ্ট। লাউ কুমড়া এই সব। আনা আষ্টেকের তাই কিনে আনতাম। এ গ্রামে তাই অস্তুতঃ মেড়া নামে বিক্রয় করতাম। এই রকম খাওয়া খরচ বাদে মাস করেকের মধ্যে আমার হাতে ১০০২ একশত টাকা হ'ল। তখন পাড়াতে ছোট একখানা মুদিখানার দোকান দিই; আর বাড়ীতে যেটুকু জমী ছিল তাতে লাউ কুমড়া বেগুন এই সব লাগাতাম। দোকানে তাও রাখতাম, বাজারের চুরে সস্তার না হ'লেও অস্তুতঃ সমান দরে দিতাম। পাড়ার মেয়েরা খাদের বাড়ীতে পুরুষ নেই তাঁরা আমার দোকান থেকে নিতেন। তারপর দোকানের মাল ছাড়া হাতে যখন ৮ পাঁচেক টাকা করে, তখন সেই মতি কুঞ্জর দোকানের কাছাকাছি মুদিখানার দোকান দিই। তারপর



কিছু কিছু চালও সঙ্গে রাখি। তারপর ক্রমে ক্রমে আপনাদের আশীর্বাদে<sup>৩</sup> যা কিছু হয়েছে।

মনোহর। এত কষ্ট করেছেন তাই না ব্যবসায় সফল হয়েছেন। এত কষ্ট করার ক্ষমতা বা সাহস কি আমাদের আছে? আপনি মাথার জিনিস নিয়ে ফিরি ক'রে বিক্রি করেছেন আর তা করতে আপনার লজ্জা হয়নি—আর এখন লক্ষপতি হয়ে তা বলতেও আপনার লজ্জা নেই। আর আমরা চেয়ারে ব'সে কাজ করি বলে জীবন ধন্য মনে করি। সমস্ত মাস খেটে ৩০,১৪০ টাকা আনতে লজ্জা পাইনে। সেই ৩০,১৪০ টাকা থেকে গড়ে অন্তত টাকা পাঁচেক জামা কাপড়ে চ'লে যায়। আমার যা অবস্থা আমার নিজ হাতে বাজারে এসে বাড়ীর তরকারি বিক্রি করা উচিত। তা তরকারি বিক্রি করবো কি—একটা লাউ কুমড়া গাছও বাড়ীতে যে পুঁতে নিজেদের বাজার খরচ কমাতে তাও হয় না আমাদের দ্বারা। তবে আপনার কথার গুণে আজ আমার অনেক শিক্ষা হ'ল দাশমশায়। আপনাকে অশেষ ধন্যবাদ। ভগবান আপনার মঙ্গল করুন।

দেখি আপনার আদর্শ নিয়ে এই অবেলার কিছু করতে পারি কিনা। এখন তা হ'লে উঠি। আমি আজ সন্ধ্যা থেকেই আসব। প্রথম দিন আপনি আমাকে শুধু এইটুকু বুঝিয়ে দেবেন কি করে আপনারা হিসাব পত্র রাখেন। কিংবা আপনার আগেকার খাতা পত্র দেখালেও আমি ঠিক ক'রে নেব।

নরহরি। সেজন্ত আপনি ভাববেন না, আমি আপনাকে তা নিজে বুঝিয়ে দেব। তা ছাড়া আমার লেখা খাতা পত্রও আছে তাও দেখবেন।

আমিও তো আগে খাতা পত্র লিখতাম। ইদানীং চোখে একটু কম দেখছি বলে ছেড়ে দিইছি।

মনোহর তখন উঠিয়া ধীরে ধীরে বাড়ীর দিকে ফিরিল, অবস্থা পরিবর্তন করিবার অনেক উপায়ের কল্পনা তাহার মনোমধ্যে ধীরে ধীরে উদ্ভিত হইতে লাগিল।

[ ৫ ]

অমরের পিতা চক্রনাথ মুখোপাধ্যায় ডিরেক্টার জেনারেল of Post officeএর উচ্চপদস্থ কর্মচারী। মোটা মাহিনা পান। পূর্বে গ্রাম হইতেই ডেলি প্যাসেঞ্জারি করতেন, সাহেবি পদ হইলেও মেজাজ আদৌ সাহেবি নয়। ধুতি কামিজ উড়ানি পরিয়া বাড়ী হইতে বাহির হন। চাপরাশী ব্যাগ লইয়া যায়। সেই ব্যাগে আফিসের পোষাক থাকে। আফিসের নিজের কামরায় গিয়া পোষাক পরিবর্তন করিয়া কাজ করিতে শুরু করেন। আবার কাজ শেষ হইলে ধুতি কামিজ পরিয়া আফিস হইতে বাহির হন। চাপরাশী ব্যাগে পোষাক ভরিয়া সঙ্গে সঙ্গে ফিরে। গ্রামের লোকে ও কলিকাতার বাসার আশে পাশের লোকেরা চিরদিনই তাঁহাকে ধুতি কামিজ ও উড়ানি পরা অবস্থাতেই দেখিতে অভ্যস্ত। তিনি যে আফিসে নিযুক্ত সাহেবি পোষাক পরিয়া আফিস করেন, ২ জন চাপরাশী যে তাঁহার কামরার বাহিরে উৎকর্ণ হইয়া সর্বক্ষণ

বসিয়া থাকে যে, কখন ঘণ্টা বাজিয়া উঠিবে—কেরানীদের কোন কাজের জন্ত কাছে ডাকিলে তাহারা তটস্থ হইয়া সম্মুখে দাঁড়াইয়া দাঁড়াইয়া শীতের দিনেও ঘামিতে থাকে, ইহা চন্দ্রনাথ বাবুর আফিসের মধ্যে না থাকিলে কাহারও বুঝিবার সাধ্য হইত না।

বাড়ীতে তিনি সাত্ত্বিক প্রকৃতির ব্রাহ্মণ, অতি উচ্চ বংশ। নৈকম্ব কুলীন। বংশমর্যাদা একটু রাখিয়া চলেন। তিনটি মেয়ের বিবাহ ঠিক পাল্টা ঘরে দিয়াছেন। ছেলেও তিনটি। অমরই বড় ছেলে—বৎসর কড়ি বয়স। প্রেসিডেন্সি কলেজে বি-এ পড়িতেছিল—এইবার বি-এ পরীক্ষা দিয়া আসিয়াছে। অমরের বড় একটি বোন। তারপর এক ভাই সমর, সে এখনও স্কুলে পড়ে। বয়স দশ বৎসর।

অমর খুব মেধাবী ছাত্র, মেট্রিকুলেশনে বৃত্তি লইয়া পাশ করে। আই-এতেও বৃত্তি পায়। কলিকাতায় পড়িবার সময় হইতে চন্দ্রনাথ বাবু সপরিবারে কলিকাতায় বাসা করিলেন। কয়েক বৎসর কলিকাতায় থাকিবার পর আবার তাঁহাদের কিছুদিন দেশে থাকিবার সাধ হওয়ার ফলে লইয়া দেশে ফিরিয়াছেন।

মনোহরকে আগাইয়া দিয়া অমর বাড়ীর ভিতর গিয়া দেখিল তাহার পিতা উঠিয়াছেন। হাত মুখ ধোয়াও হইয়া গিয়াছে। তিনি আঙ্গিকে বসিয়াছেন। উনানে চায়ের জল চড়িয়াছে।

পিতার আঙ্গিক শেষ হইলে অমর বলিল—বাবা, আজ আপনি এবই মধ্যে উঠে হাত মুখ ধুয়েছেন—আমি তা জান্তেই পারিনি। বাটার মহাশয় মনোহর বাবু এসেছিলেন, আপনার কথা জিজ্ঞাসা করলেন; আমি শ্রাম বাবার শরীর খারাপ বলে আজকাল উঠতে একটু দেয়ী

হয়। তিনি ব'লে গেলেন, আর একদিন এসে আপনার সঙ্গে দেখা ক'রে  
যাবেন।

চন্দ্রনাথ বাবু বলিলেন—তুমি আমাকে কেন ডাকলে না বাবা? আমি  
খুব সকালে উঠিনে, কিন্তু বিছানায় তো জেগে থাকি। তাকে চা  
খাইয়েছ তো?

অমর। তিনি চা খেতে চাইলেন না? বললেন চা আর খাবেন  
না।

চন্দ্রনাথ। কেন—তিনি এত চা খেতেন, হঠাৎ ছেড়ে দিলেন যে?

অমর। আর তো বাড়াতে পাচ্ছেন না—পরচ যদি একটু কম করতে  
পারেন তারই জন্ত। বললেন, লতিকাচায়ের জল চড়িয়েছিল, তিনি ব'লে  
বেরিয়েছেন চা খাবেন না; যদি তাহাদের ইচ্ছা হয় তারা খেতে পারে।  
তাঁর কথার ভাবে বোধ হ'ল খুব অর্থকষ্টে পড়েছেন, আর মনেও খুব আঘাত  
পেয়েছেন। মাইনে পান মাত্র ৪০২ টাকা—আর এত ভাল টিচার। ও  
রকম History পড়াতে কলোজ্ঞও দেখিনি।

চন্দ্রনাথ। বড়ই চুংখের বিষয়। আমরা এ সময়ে তাঁর কি উপকারে  
আসতে পারি ভেবে দেখ।

অমর। সমর তো এখানেই এখন পড়বে—আমি যেমন তাঁর কাছে  
পড়তাম সমরও যদি তাঁর কাছে পড়ে তাহ'লে ভাল হয়।

চন্দ্রনাথ। ঠিক বলেছ—তাই পড়ুক সমর। কত ক'রে দেওয়া  
যাবে?

অমর। সে আপনি বলুন। আমি আজ বিকালে তাঁর কাছে যাব,  
গিরে তাঁকে ব'লে আসব।

চন্দ্রনাথ । তুমি কত ক'রে দিতে ?

অমর । ১৫৯ টাকা ।

চন্দ্রনাথ । এবার ২০৯ টাকা ক'রে দিও ।

অমর । সেই ভাল হবে বাবা । আমি আজ গিয়ে তাঁকে ব'লে আসব নাতে কাল থেকেই পড়াতে আসেন ।

বেলা ৫টা আন্দাজ অমর মনোহরদের বাড়ী গেল । মনোহর ও রাম-প্রসাদ তখনও ফেরে নাই । মেয়েরা সবাই আছে ।

অমর তিন বৎসর মনোহরের কাছে পড়িয়াছে । মনোহর পড়াইতে বাইত । কখন কখন মনোহরের শরীর খারাপ থাকিলে নিজে ইচ্ছা করিয়া বাড়ী আসিয়া পড়িয়া বাইত । সেই স্ত্রে সকলের সঙ্গেই তাহার বেশ ঘনিষ্ঠতা হইয়াছিল । সেই হইতে সুহাসিনীকে সে কাকীমা বলে, লতিকা অমর-দা বলিয়া ডাকে । কলিকাতার গিয়াও প্রথমে বৎসর ২।১ বার বাড়ী আসিলে অমর দেখা করিয়া আসিত । ইদানীং বৎসর ছয়েক একেবারে আসে নাই ।

অমর আসিয়া বাহির হইতে ডাকিল—রামু !

তখন মেয়েরা ও সুহাসিনী রান্নাঘরে, কেউ গুনতে পাইল না । অমর ভিতরে আসিয়া ডাকিল—কাকীমা ! লতিকা বাহিরে আসিয়াই অমরকে দেখিল । ছুই বৎসর পূর্বে তাহাকে লতিকা প্রায় বালকের মূর্তিতে দেখিয়াছিল । প্রথম কলিকাতা গিয়া মাঝে মাঝে অমর যখন আসিত তখনও তাহার মধ্যে যে কোন পরিবর্তন আসিয়াছে তাহা মনেও হয় নাই । আজ ছুই বৎসর পরে লতিকা অমরকে একেবারে নূতন মূর্তিতে দেখিল । তাহার বলিষ্ঠ দীর্ঘ দেহের উপর যৌবন এক মধুরিমা বুলাইয়া দিয়া

গিয়াছে। তাহার দেহের শ্রামবর্ণ যেন শ্রীকৃষ্ণের নবঘন শ্রামে পরিণত হইয়াছে। দীর্ঘ বাহ ও সুকৃষ্ণ আয়ত চক্ষু—সেই শ্রাম মূর্তিকে বড়ই মনোহর করিয়া তুলিয়াছে।

আরও ছই বৎসর পূর্বে অমর লতিকাকে দেখিয়া গিয়াছিল, কিন্তু আজ যাহাকে দেখিল সে লতিকার শাস্ত মূর্তি—গৌরী শ্রী আর কোনদিন তাহার চক্ষে পড়ে নাই। এই সুমধুর প্রথম যৌবনের অপরূপ লাবণ্য সর্বদেহে ভরিয়া, চক্ষে এক অপরূপ শ্রামাঞ্জন মাথিয়া বিহ্বল দৃষ্টিতে লতিকা আজ যেন প্রথম তাহার সম্মুখে দাঁড়াইল। ছ'জনেই মুগ্ধ দৃষ্টিতে ছ'জনকে দেখিল। এ ছর্নভ দৃষ্টি দিয়া নর ও নারী পরস্পরকে একবার মাত্র দেখিতে পার, পরে সহস্র গুণে সুন্দর সুন্দরীকে দেখিলেও সে দৃষ্টি আর মিলে না। কিন্তু এক মুহূর্ত মাত্র। পরক্ষণে লতিকা বলিল—একি অমর-দা যে! এস! কবে এলে? অমরেরও চমক এতক্ষণে ভাঙ্গিল, বলিল, এখানে কাল এসেছি, তোমরা—সব ভাল আছ ত?

অমর উঠিয়া আসিল।

\* রান্নাঘরের ভিতর হইতে সুহাসিনী বলিল, কিরে লতু!

লতিকা বলিল, অমর-দা এসেছেন মা।

সুহাসিনী বাহিরে আসিলেন, অমর প্রণাম করিল।

সুহাসিনী কুশল প্রশ্নাদি করিয়া বলিল—আজকাল তো তুমি আর আস না বাবা—আগে কত আসতে।

অমর বলিল, আমরা তো বছর ছই একেবারে বাড়ী আসতে পারিনি। নইলে এলে আমি আপনাদের কাছে না এসে যাইনে। এবার মোটে কাল সন্ধ্যায় এসেছি। সকালবেলা শ্রারের সঙ্গে দেখা হইয়াছিল তাই তখন আর আসিনি। শ্রার এখনও করেন নি কাকী মা?

সুহাসিনী । ছটায় আন্দাজ ফেরেন ।

অমর । কেন এত দেরি হয় যে ! এখান থেকে কি কাউকে পড়াতে যান নাকি ?

সুহাসিনী । ইস্কুলে বুকি পাঁচটা ছেলে পড়ে । ১০টা টাকার জন্ম তাদের সবাইকে ছুটি ঘণ্টা পড়াইতে হয় । খুব বেশী দেরী নাই আর । তুমি এদের সঙ্গে একটু গল্প গুজব কর । লতু যা ত মা ওই গুর ঘরে অমরকে বসতে দিয়ে আর ।

লতিকা তাহার পিতার ঘরের ছয়ার খুলিয়া অমরকে বসিতে দিল । এই ঘরটাই বাড়ীর মধ্যে সবচেয়ে ছোট ঘর । দিনমানে লোকজন আসিলে বসিতে দেওয়া হয় ।

ঘরটির সহিত অমর বিশেষভাবে পরিচিত ছিল । ঘরটি তার শিক্ষকের প্রিয় পুস্তকে পূর্ণ । এবার আসিয়াও দেখিল ছুটি সেল্ফ বাড়িয়াছে—একটিতে লতিকার বই, অপরটিতে লতিকা ও রামপ্রসাদের বই থাকে ।

কি কথা কহিবে তাহা ঠিক করিতে না পারিয়া অমর একটা সেল্ফের কাছে গিয়া বই নাড়িয়া চাড়িয়া দেখিতে লাগিল । বইগুলি দেখিয়া অমর বলিল, লতু, তুমিতো অনেক বই প'ড়ে ফেলেছ এর মধ্যে । তোমার বাংলা আর ইংরাজী বইয়ের selection ( নির্বাচন ) বড় সুন্দর হয়েছে । এগুলি সব পড়া হয়েছে তোমার ?

লতিকা । সলজ্জভাবে বলিল, হ্যাঁ !

অমর । এখন তাহ'লে কি পড়ছ ?

লতিকা । ও গুলি revise করছি । বাবা বলেছেন—প্রত্যেক বইখানি

পড়তে হবে, আর সেই বইখানির মোট কথা ( substance ) সংক্ষেপে লিখতে হবে।

অমর। কতগুলো ও রকম লেখা হয়েছে ?

লতিকা। বাংলা সব হয়েছে, ইংরাজী অর্ধেক।

অমর। History পড়েছ ?

লতিকা। হ্যাঁ, শুধু ভারতবর্ষের পড়েছি। আর ইংলণ্ডের ইতিহাস ও জিওগ্রাফি ( Geography ) বাবা মুখে মুখে শেখান আর নোট করিয়ে দেন।

অমর। তবে তো তুমি সব বিষয়ে ম্যাট্রিকুলেশন স্ট্যান্ডার্ড ছাড়িয়ে গিয়েছ। Mathematics কি পড়েছ ?

লতিকা। শুধু পাঠীগণিত ভাল করে শিখেছি। Algebra ও Geometryও কিছু জানি। বাংলা আর ইংরাজী বাবা ভাল করে শিখতে বলেন, স্কুল থেকে সে জগু ছোট ছোট বই এনে দেন। সে সব বই শীঘ্র শেষ করে আবার ফেরৎ দিতে হয়।

অমর। দেখি তোমার নোট। কি রকম নোট রেখেছ দেখি।

লতিকা। ছুখানি মোটা কাঁধান খাতা অমরের সম্মুখে রাখিয়া তাড়াতাড়ি রাগাধরের দিকে গেল।

মিনিট দশেক পরে সে একহাতে চারের পেয়ালার অপরাহাতে চারখানা ছোট লুচি ও খানকয়েক আলুভাজা লইয়া কক্ষে প্রবেশ করিল।

সে গুলি টেবিলের উপর রাখিয়া লতিকা বলিল—মা বললেন খাও।



অমর লতিকার নোট হইতে মুখ তুলিয়া হাসিয়া বলিল—তুমি বুঝি বলবে না।

লতিকা হাসিয়া মাথা নীচু করিল।

অমর বলিল, সুন্দর নোট করেছ তুমি! খাসা হয়েছে। তোমার বে পড়া খুব ভাল হয়েছে তা তোমার নোট দেখেই বোঝা যায়। স্মার তোমাকে বেশ ভাল ক'রে লেখা পড়া শেখাচ্ছেন। লেখায় তুমি শীগ্গির আমাদের সবাইকে ছাড়িয়ে যাবে।

লতিকা বলিল—তুমি ঠাট্টা করছ অমর-দা। আমার মত বয়সে কত মেয়ে আই-এ পড়ছে।

অমর। তা পড়ুক, তাদের চেয়ে তোমার সত্যিকারের জানা চের বেশী হয়েছে।

লতিকা লজ্জায় আর কিছু বলিতে পারিল না। কিন্তু এক একবার জানন্দে তাহার মারা চিত্ত ভরিয়া গেল।

অমর খাবার খাইয়া চায়ে চুমুক দিয়া বলিল, সুন্দর চা হয়েছে, তুমি করেছ ?

লতিকা ঘাড় নাড়িয়া বলিল,—হ্যাঁ।

তারপর ফিক্ করিয়া হাসিয়া বলিল, আমার মত বয়সে সংসারের সকল কাজ করা উচিত—চা, ত কিছুই নয়।

অমরও হাসিয়া বলিল—তোমার মতে তাহ'লে তোমার মত বয়সে একেবারে সব জাস্তা ও সব পারতা হওয়া উচিত।

লতিকা হাসিয়া ফেলিল।

অমর জিজ্ঞাসা করিল, হাসলে যে ?

লতিকা বলিল, তোমার মুখে নূতন কথা শুনে ।

অমর । কি নূতন কথা ?

লতিকা । এই—সব পারতা ।

অমর । ও ! ওটি সব জান্তার মাসতুতো ভাই । সব জান্তা যদি হয় সব পারতা কেন হবে না ?

লতিকা । তাতো বটেই ।

কথা কহিতে কহিতে চা পান শেষ হইয়া গেল । লতিকা খাবারের শূন্য পাত্র ও চায়ের খালি পেয়লা লইয়া কক্ষ হইতে বাহির হইয়া গেল ।

অমর তখন লতিকার ইংরাজী বইয়ের নোট লইয়া পড়িতে লাগিল । অমর দেখিল পাঠ্য পুস্তক ছাড়াও ভাল ভাল অনেকগুলি ইংরাজী বই লতিকা পড়িয়াছে আর বেশ সরল ও মিষ্টি ভাষায় তাহার নোট রাখিয়াছে । অমর দেখিল অঙ্কশাস্ত্র বাদ দিলে লতিকা বেশ ভাল ভাবে I.A. Standardএ পড়িতেছে । ঘরে পড়িয়া গৃহকর্মের মধ্যে থাকিয়া স্বল্প অবসরের মধ্যে যাহা সে পড়িয়াছে তাহা অতিশয় প্রশংসার যোগ্য ।

অমর যখন নিবিষ্টচিত্তে লতিকার নোটগুলি পড়িতেছিল লতিকা তাহার মধ্যে বার দুই আসিয়া অমরকে তাহারি নোট একমনে পড়িতে দেখিয়া লজ্জায় ও একপ্রকার আনন্দে ফিরিয়া গিয়াছিল ও খুব চটপট করিয়া মায়ের কার্যে সহায়তা করিতেছিল ।

সুহাসিনী একবার বলিল—তুমি অমরের সঙ্গে কথাবার্তা কওগে, যথি কুটি কথানা বেলে দিচ্ছে ।

লতিকা বলিল, অমর-দা বই পড়ছেন, আমি চট ক'রে বেলে দিয়ে

যাচ্ছি। যুথি ততক্ষণ খোকাকে নিয়ে একটু বেড়াক। যুথিকা রান্নাঘর হইতে ছাড়া পাইয়া খোকাকে কোলে তুলিয়া অমরের ঘরের দিকে আসিল। তারপর হৃদ্যপ করিতে করিতে আবার রান্নাঘরে ফিরিয়া আসিয়া বলিল, ও দিদি ভাই, অমর-দা তোমার লেখা নোট পড়ছেন।

লজ্জায় লতিকার মুখ রাঙা হইয়া উঠিল। মাথা নীচু করিয়াই সে রুটি বেলিতে লাগিল। মনে মনে যুথিকার উপর রাগ করিয়া ভাবিল ভারি নূতন খবর নিয়ে এলেন! একথাটা আর মায়ের কাছে এসে না বললে হ'ত না? মেয়ে যেন কি!

মেয়ে ততক্ষণ অমূল্য সংবাদ দিয়াই রান্নাঘর ত্যাগ করিয়াছে। সুহাসিনী একবার অপাঙ্গে কন্ঠার লজ্জানত মুখের পানে চাহিয়া দেখিলেন। মনের মধ্যে একটা কথার উদয় হইল। জোরে একটা নিশ্বাস পড়িল। নিশ্বাসের শব্দে লতিকা মুখ তুলিয়া চাহিল। দেখিল মা উনানের দিকে মুখ করিয়া একমনে রুটি সঁকিতেছেন।

রামপ্রসাদ বাহির হইতে ডাকিল—মা! সুহাসিনী বলিল—আর! একবারে হাত মুখ ধুয়ে আর, খাবার হয়েছে।

মনোহর আপনার ঘরে ঢুকিয়া অমরকে দেখিয়াই বলিলেন—এই যে অমর, কতক্ষণ এসেছ?

অমর বলিল, ঘণ্টাখানেক হ'ল এসেছি। আপনি স্কুলের এই খাটুনির পর সঙ্গে সঙ্গে টিউশনি করেন কেন আর?

মনোহর। কি করি অমর। নইলে যে কুলুতে পারিনে। এই সময়ে তবু ৫টা ছেলেকে একসঙ্গে পাওয়া যায়, যা দেয় তাই লাভ। তবু তো কিছু কাজে লাগে।

অমর। আপনি আমার হাতমুখ ধুয়ে আসুন। আমি ব'সে আছি।

মনোহর হাত মুখ ধুইতে গেল। যুথিকা খবর দিয়া গেল, খাবার দেওয়া হয়েছে। যখন রান্নাঘরের কাছাকাছি মনোহর পৌঁছিয়াছে, রামপ্রসাদ ভিতর হইতে বলিল, মা, আর কুটি নেই ?

সুহাসিনী উত্তর দিল আর তো বেশী নেই বাবা—সবারি জন্ম ছ-ছ'খানা আছে, তা তুই আর একখানা নে।

রামপ্রসাদ বলিল, না মা, আর খাব না। দিদিদেরও ত খিদে লাগবে। বরং সকালে সকালে ভাত দিও'খন। আর আজ আমি কুলে ছ'পয়সার খাবার খেয়েছি। আমি বল্লাম খিদে লাগেনি, বাবা তবু শুন্লেন না।

এতদিন পরে আজ খাবার দেওয়ার কারণ সুহাসিনী বুঝিল, কিছু বলিল না।

এমন সময়ে মনোহর ঘরের মধ্যে আসিলেন। তাহার পাতেও ছ'খানা কুটি ও একটু তরকারি ছিল। রামপ্রসাদ উঠিয়া যাইতেছিল, মনোহর তাহাকে বসিতে বলিয়া পাত হইতে একখানা কুটি ও একটু তরকারি তুলিয়া দিল।

রামপ্রসাদ ব্যস্ত হইয়া বলিল—বাবা, আমি যে এষ্টমাত্র খেয়ে উঠছি। আমাকে আবার কেন দিলেন ?

মনোহর গম্ভীর মুখে বলিল—তুই খাতো বাবা, বেশী বকিসনে। ছেলেমানুষের বেশী বকা ভাল নয়।

রামপ্রসাদ অত্যন্ত ক্ষুণ্ণ হইয়া খাইতে লাগিল—সে খুব ধীরে ধীরে

থাইতে লাগিল—পাছে ওখানা উঠিয়া গেলে পিতা আবার ওখানি হইতেও কিছু তুলিয়া দেন।

মনোহর আধখানা রুটিতে তরকারিটুকু লইয়া থাইয়া ফেলিল ও পরে জলপান করিয়া উঠিল। পাতে আধখানা পড়িয়া রহিল।

সুহাসিনীর সন্দেহ হইল তাহাদের মাতাপুত্রের কথা বোধ হয় মনোহর শুনিয়াছে! তাহার মনে একটা আঘাত লাগিল, বলিল, ও আধখানা বা থাকে কেন, কাউকে দিয়ে দিলে হ'ত।

মনে তখন তাহার ক্লান্ত ও ক্ষুধার্ত স্বামীর জন্ত সমবেদনা জাগিতেছিল, কিন্তু মুখ হইতে যাহা বাহির হইল তাহাতে সমবেদনার চিহ্ন কিছুই ছিল না।

স্বামী উত্তরে কিছু না বলিয়া একটু ম্লান হাসি হাসিয়া উঠিয়া পড়িল ও ধীরে ধীরে ঘরের বাহির হইয়া গেল।

সুহাসিনীর চোখে জল আসিল। সবারি অলক্ষ্যে সে তাহা নীরবে মুছিয়া ফেলিল।

[ ৬ ।

পর মাসে সুহাসিনী সংসার খরচের বে টাকা পাইত তাহা হইতে ১০৮ দশ টাকা বেশী পাইল। তাহাতে সংসারের স্বচ্ছলতা একটু হইল বটে, কিন্তু অশান্তি হইল তার চেয়ে বেশী। সুহাসিনী হিসাব করিয়া দেখিল স্বামী পূর্বের চেয়ে সকালে ঘণ্টা দুয়েক ও রাত্রেও ঘণ্টা দুয়েক

কখনও বা বেশী বাহিরে থাকেন অথচ টাকা বাহা বেশী দেন তাহা মাত্র দশটি। মাসিক এই ১০১ দশটি টাকার জন্য কি তাঁহাকে প্রতিদিন ৪ ঘণ্টা করিয়া খাটিতে হয়? যদি তাই হয়, এত খাটুনির দরকার? সত্য বটে টাকা কিছু বেশী হইলে সাংসারিক স্বচ্ছলতা এবং সঙ্গে সঙ্গে শান্তি কিছু বাড়িবে। কিন্তু শরীর যেখানে চলিবে না—সেখানে সে চেষ্টার কি প্রয়োজন? ইহার উপর বাড়ী আসিয়া মেয়েদের পড়ান আছে। তারপর রাত্রি জাগিয়া অমরের কথামত কি একখানা বই আরম্ভ করিয়াছেন। কি হইবে এইসব লিখিয়া? যৌবনাবধিই তো লেখাপড়া লইয়াই রহিলেন কিন্তু কি সফল হইল তাতে?

একদিন কথাটা স্বামীকে বলিবে বলিবে করিয়া সুহাসিনীর মাস তিন চার কাটিয়া গেল। একদিন রাত্রি দশটার পর শ্রান্তদেহে ও শুষ্ক মুখে স্বামী গৃহে ফিরিতে সুহাসিনী ভিস্ত্রাসা করিল এত রাত্রি পর্য্যন্ত কোথা ছিলে?

মনোহরের মুখে একটু কঠিনতা ফুটিয়া উঠিল; কহিলেন, কি করব বল—অন্নচিন্তা। সংসার তো চালাতে হবে।

সুহাসিনীর মনে স্বামীর শুষ্ক মুখের জন্য ককণাই জাগিতেছিল, কিন্তু শুষ্ক কথার শুষ্ক উত্তরই আসিয়া পড়িল—এমন সংসার না করিলেই ত হয়। এই যে সকাল সন্ধ্যা বাড়তি খাটুছ, তার জন্য কত দিচ্ছে শুনি। দশ টাকার জন্য এত ভুতের মত খাটুনি কেন?

উত্তর হইল ভূত যে সে ভুতের মতই খাটিবে, দেবতার মত খাটবার কন্যতা সে কোথায় পাবে? দেবতা অন্ন খেটে বেশী টাকা উপায় করে, কিন্তু ভূত তো তা পারে না; তাকে বেশী খেটে কম টাকা উপায় করতে হয়। এই তার ভাগ্য।

সুহাসিনী একটু ঝাঁঝের সহিত বলিল—টাকার কথা আমার কেন বল, আমি কি তোমার টাকার প্রত্যাশী? বেশী উপায় কর তোমার ছেলে মেয়ে সুখে থাকবে—কম উপায় কর তারা কষ্ট পাবে; আমার কি? আমার ভাল খাওয়ার ভাল পরার জন্ত কখনো তোমাকে বলিনি, আজও বলবার ইচ্ছা রাখিনি। তখন আর আমাকে টাকার খোঁটা দাও কোন্ মুখে!

মনোহর শুককণ্ঠে বলিলেন—আমি তো টাকার খোঁটা দিইনি। তুমিই তো টাকার কথা তুললে।

বলিয়া আর কথা বাড়াইবার ইচ্ছা না করিয়া বাহিরে আসিয়া দাঁড়াইলেন।

সুহাসিনী খানিকক্ষণ কক্ষমধ্যে 'কাঠ' হইয়া দাঁড়াইয়া রহিল। তার পর মনে মনে নিজের অদৃষ্টকে ধিক্কার দিতে দিতে রান্নাঘরে প্রবেশ করিল।

বাহিরে ঘোর অন্ধকার। আকাশে অগণিত নক্ষত্র, কিন্তু তাহাদের আলোক ধরণীতে নামিবার বহুপূর্বে শূন্যপথে মিলাটয়া যাইতেছে। এক পাশের কক্ষে বসিয়া লতিকা তখনও নিবিষ্টমনে পড়িয়া যাইতেছে। রামপ্রসাদ জাগিয়া থাকিয়া পড়িবার যথেষ্ট চেষ্টা করিয়াও দিদির পাশে গুইয়া ঘুমাইয়া পড়িয়াছে। আপনাদের পড়িবার ইচ্ছা অপেক্ষা পিতাকে সন্তুষ্ট করিবার জন্ত যে এই ছেলেমেয়ে দুটির পড়িবার বেশী ইচ্ছা সে কথা মনোহরের অজ্ঞাত ছিল না। কিন্তু কই সন্তোষের আলোক যে এখনও বহু উর্ধ্বে! দরিদ্রের দুঃখ ও হতাশার দীর্ঘশ্বাসের এখনও তো কোন প্রতিকার হ'ল না?

আরো খাটিবেন, কিন্তু সময় কই? আর সময় থাকিলেও সে

সময়টুকু মূল্য দিয়া ক্রয় করিবে কে? এ সমস্ত ছুঃখের মূলে অভাব দূর হইলেই ছুঃখ আর থাকিবে না। স্নেহ প্রেম কিছুই তো সংসারে কম ছিল না। কিন্তু অভাব আসিয়া যে ধীরে ধীরে সমস্ত গ্রাস করিয়া ফেলিল। এ অভাব কি ভাগ্যের মত শাস্ত ও অমোঘ হইয়া রহিয়া যাইবে, না মেঘের মত একদিন কাটিয়া যাইবে! তাঁহার জীবদ্দশার না হউক মরণের পরও যদি এ অভাব দূর হয় তাহা হইলেও তাঁহার ক্ষোভ নাই। কিন্তু তাহাই কি যাইবে? যাউক না যাউক এ চেষ্টার ক্রটি তিনি করিবেন না। জীবনের শেষ ক্ষণ পর্য্যন্ত এ চেষ্টা তিনি ছাড়িবেন না। ছুঃখের জন্য ছুঃখ করিবেন না। ছুঃখ তো জীবন ভোর। জীবন! সে তো আর নূতন কিছু নয়, মরণের ছয়ারে পৌঁছবার সময়টুকু মাত্র। একটা দিন কাটানো মানে মরণের দিকে একটি দিন আগাইয়া যাওয়া মাত্র। তখন আর ভয় কিসের?

হঠাৎ সুহাসিনীর ডাকে চমক ভাঙ্গিল—রাত ১২টা বাজে সে হুঁস আছে। এখন ছুটো খাও, খেয়ে আমাকে ছুটি দাও। আমারও তো মানুষের শরীর, লোহার নয় যে ২৪ ঘণ্টা সমান বইবে।

কথাগুলো তীক্ষ্ণ কণ্ঠেই সুহাসিনী বলিয়াছিল। মনোহর আর একবার আকাশের পানে চাহিয়া গৃহমধ্যে আসিলেন। সেখানেই খাবার দেওয়া হইয়াছিল, একটা দীর্ঘনিশ্বাস ফেলিয়া মনোহর খাইতে বসিলেন। পাঠরতা লতিকারও চমক ভাঙ্গিল। সেও বই বন্ধ করিয়া ভাইকে ভাল করিয়া শোয়াইয়া দিয়া উঠিয়া আসিল। লতিকা আসিতেই সুহাসিনী বলিল—পড়া শেষ হ'ল এতক্ষণে? এখন যাও একটবার রান্নাঘরে। ভাত বেড়ে নিয়ে খেতে বসগে। লতিকা চলিয়া গেল।

আহার্যের সম্মুখে পিলসুজের ওপর একটি প্রদীপ জলিতেছিল।



মনোহর গানের জামা খুলিয়া খাইতে বসিয়াছিল। সুহাসিনীর চক্ষু হঠাৎ স্বামীর মুখের উপর নিবদ্ধ হইল। কি শীর্ণ সে দেহ হইয়া গিয়াছে। প্রায় চেনা যায় না। অধর মলিন হইয়া গিয়াছে। নাসিকা অসির মত উঁচু হইয়া আছে। হুই পাশের হাড় উঁচু হইয়া আছে। যেন সে মনোহর নয়। পূর্বের সেই স্বাস্থ্য, সেই সৌন্দর্য্য যেন কোথায় চির-বিদায় লইতে বসিয়াছে!

তা হইবে না? এত পরিশ্রমে মানুষের শরীর টিকে? রাত্রে একটু বিশ্রাম ছিল। সেটুকুও গিয়াছে। মাসিক দশ টাকার জন্ত সে বিশ্রামটুকু নষ্ট করে' শরীরকে এমন করিয়া কষ্ট দেয়। সাথে কি সুহাসিনী রাগ করে! ১০৮ টাকার জায়গায় যদি ৫০৮ টাকা ঐ বিশ্রামের পরিবর্তে স্বামী আনিয়া দিতেন, তবু সুহাসিনীর রাগ তাহাতে কমিত না। স্বামী তো সেটুকু বুঝেন না তাই তো তাহার হুঃখ।

হঠাৎ মনোহর আহার শেষ করিয়া জলের গ্লাসে হাত দিতে সুহাসিনী বলিল,—ওকি খাওয়ার ছিরি হচ্ছে দিন দিন। সব যে পাতে পড়ে রইল। আর ছোটো খাও। এমনি ক'রে শরীর কতদিন বইবে শুনি?

জানন্ত হুঃখীর শরীর না বইলে চলে না—বইতেই হবে, বলিয়া মনোহর উঠিয়া পড়িলেন। তারপর হাত মুখ ধুইয়া কক্ষে আসিয়া ইতিহাসের পাণ্ডুলিপির খাতা লইয়া বসিলেন।

সুহাসিনী খানিকটা উদাস দৃষ্টিতে চাহিয়া রহিল। তারপর উচ্ছ্বষ্টাদি কুড়াইয়া থালা উঠাইয়া যখন বাহিরে আসিল তখন তাহার হুই চোখ দিয়া টপ্ টপ্ করিয়া অশ্রু ঝরিতেছে আর অন্তরের মধ্যে অভিমানের ঞ্জবল ঝটিকা বহিতেছে।

মনোহর কিছুক্ষণ ধরিয়া লিখিয়া গেলেন। একবার লেখা বন্ধ করিয়া লক্ষ্য করিলেন—সুহাসিনী এখনও কক্ষে আসিল না, আবার খানিকটা লিখিয়া গেলেন, তথাপি সুহাসিনীর দেখা নাই। অতঃপরে তাঁহার আহার সারিয়া আসার ঘণ্টাখানেকের মধ্যেই সুহাসিনী কার্য্য সারিয়া আসিত। কিন্তু আজ এত বিলম্বের কারণ কি ?

মনোহর লেখা বন্ধ করিয়া উঠিলেন। রন্ধনগৃহের সম্মুখে গিয়া দেখিলেন—উচ্ছিষ্ট থালা বাসন সব ধুইয়া ঘরের এক পাশে সজ্জিত রহিয়াছে। একটু দূরে একখানি ছোট খালায় অনুমান এক ছটাক চালের ভাত, তাহারি উপর একধারে ডালের সামান্য একটু চিহ্ন ও তাহারি কাছে ঈষৎ একটু তরকারি বোধ হয় সুহাসিনীর আহারের অল্প অপেক্ষা করিতেছে। মনোহর সত্য সত্যই শিহরিয়া উঠিলেন। দিনরাত্রি প্রাণান্ত পরিশ্রমে সকলের আহার যোগাইয়া সুহাসিনীকে এই খাইয়া থাকিতে হয়। তখন রাত্রি ১২টা বাজিয়া গিয়াছে, তথাপি এখনও কাজের শেষ হয় নাই। তখনও উনানে তাওয়া চাপানো!

ক্ষিপ্ৰহস্তে কয়েকখানি রুটি বেগিয়া লইয়া সুহাসিনী তাড়াতাড়ি সেগুলি সঁকিয়া লইল। তারপর পাত্রাদি সব যথাস্থানে তুলিয়া রাখিয়া যখন খাইতে বসিল তখন তাহার হৃৎকক্ষে জলধারা। অঞ্চল দিয়া অশ্রুধারা মুছিয়া সুহাসিনী সেই স্বল্প অন্নের ছই মুঠি গলাধঃকরণ করিয়া জলের গেলাস মুখে তুলিল।

মনোহর নিঃশব্দে কক্ষে ফিরিয়া আসিয়া শয্যার উপর বসিলেন। ঘুরিয়া ফিরিয়া এই কেবল তাঁহার মনে হইতে লাগিল, এত হুঃখে তিনি সুহাসিনীকে রাখিয়াছেন। তথাপি তিনি বালকের মত অভিমান

করেন। ছোট ছেলে মেয়েরা পাশের শস্যের ঘুমাইয়া পড়িয়াছে, পাশের ঘরে লতিকা, কথিকা ও রামপ্রসাদ ঘুমাইতেছে, তিনি তো ইচ্ছা করিয়াই জাগিয়া আছেন। আর সুহাসিনীকে বাধ্য হইয়া এখনও সংসারের খাটুনি খাটিতে হইতেছে। কয়দিন বেশী সকালে বাহির হইয়াছিলেন, জলখাওয়া তাহার পূর্বে হইয়া উঠে নাই। তাই আজ রাত্রেই আগে হইতে সকলের খাবার তৈয়ারি করিয়া তবে সুহাসিনী খাইতে বসিল ইহা মনে করিতে মনোহরের অনুতাপের সীমা রহিল না।

একটু পরে সুহাসিনী স্নানমুখে কক্ষে প্রবেশ করিয়া দুয়ার বন্ধ করিল। শস্যের আসিয়া ছেলেমেয়েদের একটু সরাইয়া ঠিক করিয়া শোয়াইয়া আপন শস্যের শুইয়া পড়িল। স্বামীর কখন কাজ শেষ হইবে এবং কখন তিনি শুইবেন তাহা তিনিই জানেন। সকাল করিয়া শুইতে বলিয়া কোন ফল নাই জানিয়া ইদানীং সুহাসিনী এ কথা বলা ছাড়িয়া দিয়াছে।

মনোহর আলো কমাইয়া দূরে রাখিয়া দিয়া সুহাসিনীর শিয়রের কাছে বসিলেন ও ধীরে ধীরে বলিলেন, রোজ কি তোমার এই রকম খেয়ে থাকতে হবে? সুহাসিনী চমকিয়া উঠিল। স্বামীর এ কঠিন স্বর যেন অনেক দিনের আগেকার—প্রায় ভুলিয়া যাওয়া। এ স্বরে যেন মমতা বুঝি বা হারাণো প্রেমের সুরও একটু মাথানো আছে। তাই প্রথমটা সে ভাল করিয়া বুঝিতে পারিল না। খানিক শুক থাকিয়া বলিল—কি খেয়ে?

মনোহর স্নিগ্ধ ও অনুতপ্ত কণ্ঠে কহিলেন, আমি আজ তোমার খাওয়া দেখেছি। এই খাওয়া খেয়ে আর এই হাড়ভাঙ্গা খাটুনি খেটে

সাহসের সাধ্য নেই যে মেজাজ ঠিক রাখে। এর উপর আমি তোমার যে ছুঃখ দিয়েছি তার জন্ত আমার মাপ করো।

বলিয়া মনোহর তাঁহার শীতল হস্ত সুহাসিনীর ললাটের উপর রাখিলেন।

বহুদিন—বহুকাল পরে সুহাসিনী যেন স্বামীর প্রেম ফিরিয়া পাইল। স্বামীর হাতখানি দুইহাত দিয়া টানিয়া আপনার বুকের কাছে আনিয়া কি বলিতে গিয়া সুহাসিনী উছুসিত কণ্ঠে কাঁদিয়া ফেলিল।

### [ ৭ ]

অমরের অনার্সে বি-এ পাশের খবর আসিল। অমরকে এম-এ ও বি-এল এক সঙ্গে পড়িবার জন্ত আবার কলিকাতার যাইতে হইবে। ছুটির সময়ের অনেকখানি সে লভিকার সাহায্যে কাটাঁইয়াছে। মাসত্বেকেই সে লভিকাকে মোটামুটি সংস্কৃত শিখাইয়া দিয়াছে। ম্যাট্রিকুলেশনে যেটুকু জ্ঞানের প্রয়োজন লভিকা তার আপনার পরিশ্রমে ও অমরের সাহায্যে খুব শীঘ্র আয়ত্ত করিয়া লইয়াছে। অমরের বিশেষ ঝোক যাহাতে লভিকা প্রাইভেট ম্যাট্রিক দেয়; মনোহরকেও সে বিশেষ করিয়া ইহার জন্ত বলিয়াছে এবং তিনিও স্বীকৃত হইয়াছেন।

কলিকাতা যাত্রা করিবার পূর্বে অমর মনোহরদের বাড়ী বিদায় লইতে আসিল। মনোহর ও সুহাসিনীকে প্রণাম করিয়া ছোটদের আদর

সম্ভাষণ করিয়া লতিকার পড়িবার ঘরে আসিয়া বলিল—লতু, আজ যাচ্ছি।

লতিকা কিছু বলিল না। শুধু তাহার ম্লান মুখ তুলিয়া একবার চাহিল।

অমর বলিল, তুমি বেশ ভাল করে পড়ো। তুমি নিশ্চয়ই ভাল করে পাশ করবে দেখো। আর এক কাজ করো, আমি মাঝে মাঝে তোমাকে অগ্নাত ভাল ভাল মাসিক পত্র ও বই পাঠিয়ে দেব, সেগুলিও পড়ো। পড়বে তো ?

লতিকা ঘাড় নাড়িয়া জানাইল পড়িবে। মুখে কিছু বলিল না। পাতলা ঠোঁট হুখানি কি যেন বলি বলি করিয়া বার দুই কাঁপিয়া শুরু হইল।

তখন অমরকেই আবার কথা কহিতে হইল। আজ যাবার সময় একটা কথা না বলে যেতে পারছিলেন, লতু ! কতবার তো বাড়ী থেকে গেছি, একলাও থেকেছি ; কিন্তু এবারকার মত মনের অবস্থা কখনও হয়নি। যেতে ইচ্ছা করছে না। যত তাবছি এই যাব এই যাব তত মন ছুটে এসে তোমার এই ছোট ঘরখানিতে দাঁড়াচ্ছে। কেবল আমার মনে হচ্ছে তোমার সঙ্গে এক সঙ্গে এক জায়গায় যদি পড়তে পেতাম—পড়ার সার্থকতা দশগুণ বেড়ে যেত।

অমর বাইবে শুনিয়া লতিকার সারা চিত্ত বেদনায় টন্ টন্ করিতেছিল। অমরের এই কথা শুনিয়া তাহার অন্তরের যে অশ্রু বেদনার বাঁধনে বাঁধা ছিল—সে বাঁধন কাটিয়া নেত্রপ্রান্তে দেখা দিল ও মুক্তার মত কক্ষতলে একটীর পর একটী করিয়া পড়িল।

চক্ষে জল দেখিলে মানুষের প্রাণে যে আনন্দের বেদনা জাগে অমর তাহা প্রথম প্রত্যক্ষ করিল। প্রথম দর্শনে দুইজনার অন্তরে প্রেম জন্মলাভ করিয়া সাহচর্যে বদ্ধিত হইয়া অশ্রুজলের স্পর্শে অমর হইয়া উঠিল।

অমর বলিল, তুমি চুপ কর লভু। আমি তোমাকে নিয়ম করে চিঠি দেব। তুমি কিন্তু উত্তর দিও! ছুটি পেলেই আবার আমি আসব।

অমর এবার যাইতে উত্তত হইল। লতিকা অমরকে প্রণাম করিল ও চক্ষু মুছিয়া উঠিয়া দাঁড়াইল।

অমর আর একবার স্নানমুখী লতিকার পানে চাহিয়া ধীরে ধীরে কক্ষ হইতে বাহির হইল। এই তাহার জীবনের প্রথম প্রণয়। প্রণয়ের প্রথম বেদনা! প্রণয়ের প্রথম আনন্দ! বাহিরে আসিয়া অমর লতিকার কক্ষের পানে আর একবার চাহিল। দেখিল লতিকা অশ্রু প্লাবিত মেত্রে তাহার পানে চাহিয়া আছে। অমরের চক্ষুও সজল হইয়া উঠিল। জোর করিয়া মুখ ফিরাইয়া অমর পথ চলিতে লাগিল।

অমর যখন কলিকাতাগামী ট্রেনে আসিয়া উঠিল তখন দুঃখের মধ্যেও অমরের আনন্দের অবধি ছিল না।

মানুষ পথ চলিতে চলিতে কোন জিনিস কুড়াইয়া পাইয়া যত্ন করিয়া তুলিয়া রাখার পর যদি সে জানিতে পারে যে সেই কুড়াইয়া পাওয়া জিনিস অমূল্য বস্তু তখন তাহার যেমন আনন্দ হয়, অমরের আনন্দও আজ সেইরূপ। কতবার দেখা লতিকাকে এবার দেখিবামাত্র অমরের বড় ভালো লাগিয়াছিল। কিন্তু সে যে এত ভালো, সে যে অমৃতের চেয়ে

কল্যাণিকর, চন্দ্রকিরণের চেয়েও স্নিগ্ধ, মধুর সঙ্গীতের চেয়েও মনোরম আজিকার এইক্ষণের পূর্বে অমর তাহার এতটুকুও বুঝিতে পারে নাই। লতিকার কথা—লতিকার নিশ্বাস—লতিকার রূপ তাহার সমস্ত হৃদয় এমন করিয়া জুড়িয়া রাখিয়াছে, যে কথা সে আজি কিছুক্ষণ আগেও বুঝিতে পারে নাই। লতিকা যে তাহাকে মনে রাখিবে, গোপনে তাহাকে ভাবিবে, সেও যে লতিকার স্মৃতি অমূল্য রত্নের মত অন্তরে সংগোপন রাখিবে—এই অভিনব স্মৃতিচিন্তায় অমর বিহ্বল হইয়া পড়িল।

মানুষের দৃষ্টিশক্তির যদি সীমা না থাকিত, দূরত্বের ব্যবধান, গৃহবৃক্ষাদির অন্তরাল ও আলোকের অভাব যদি তাহাকে বাধা না দিত, তাহা হইলে অমর দেখিতে পাইত সন্ধ্যার অন্ধকারে লুকাইয়া লতিকা তাহারই কথা ভাবিতেছে আর মনে করিতেছে অমর কি টেণে বসিয়া এমনি করিয়া তাহাকে স্মরণ করিতেছে।

[ ৮ ]

মাস কয়েক দুঃখ ও পরিশ্রমের মধ্যেও বড় সুখে কাটিল। কিন্তু যেমন আতিশয্য তেমনই অভাবের মধ্যে বুঝি প্রেমের অভিশাপ লুকান থাকে। তাহাই আবার ধীরে ধীরে স্বামী-স্ত্রীর মাঝে আড়াল করিয়া দাঁড়াইল।

ফাল্গুনের মাঝামাঝি মনোহর বলিলেন, কদিন পরে লতুকে একবার কলিকাতা নিয়ে যাব।



বিস্মিত হইয়া সুহাসিনী জিজ্ঞাসা করিল, কেন ?

মনোহর বলিলেন, লতুকে এবার ম্যাট্রিকটা দেওয়া ভাবছি। ক'দিন পরেই পরীক্ষা।

সুহাসিনীর রাগ হইল যে ভিতরে ভিতরে এত সব ব্যবস্থা হইয়াছে, অথচ তাহাকে একবার বলাও দরকার বলিয়া মনে হয় নাই। বলিলেন—তা মেয়ে পাশ করে কি করবে ! পয়সা আনবে !

মনোহর বলিলেন—তা যদি আনে তাতে ক্ষতি কি ?

সুহাসিনী। মেয়ে চাকরি ত করবে ! বিয়ে দিতে হবে না ত ?

মনোহর। বিয়ে দিতে হবে না তা বলুছিনে। তবে ম্যাট্রিক পাশ করিয়েও বিয়ে দেওয়া তো যায়। আর ধর যদি বিবাহ সময় মত দিতে পারলাম না বা তার আগে হঠাৎ মারা গেলাম, সে সময়ে লতু যদি চাকরিই করে তা হলে যে ছঃসময়ে সাহায্যই হবে।

সুহাসিনী একথা শুনিয়া যেন তেলে বেগুনে জলিয়া উঠিল। বলিল, থাক, এত দরদ দেখাতে হবে না—বলে উনি আমার ছঃখ দূর করলেন বড়, তার মেয়ে পাশ করে ছঃখ দূর করবে—পোড়া কপাল !

মনোহর বলিলেন, তুমি কেন এতে এত রাগ করছ বুঝতে পারিনে। আমি কিছু মন্দ ভেবে একথা বলি নেই।

সুহাসিনী। না তোমার খুব দয়ার শরীর, তাই খুব ভাল ভেবে একথা বলেছ। তবে আমার ভালোর জন্তে দয়া করে তুমি অত ভেব না ; আমার অত ভালোর দরকার নেই।

বলিয়া উদ্ভত অশ্রু গোপন করিবার জন্ত সুহাসিনী সে স্থান ত্যাগ করিলেন।



যথা সময়ে পরীক্ষা আসিল। মনোহর লতিকাকে সঙ্গে লইয়া গিয়া পরীক্ষা দেওয়াইয়া আনিলেন।

সংসার যেমন চলিতে থাকে তেমনই চলিতে লাগিল। সুহাসিনী মেয়ের লেখাপড়া করা, পরীক্ষা দেওয়া সম্বন্ধে ভুলেও একটি কথা উচ্চারণ করিলেন না। মাস কয়েক পরে পরীক্ষার ফল বাহির হইলে জানা গেল যে লতিকা প্রথম বিভাগে উত্তীর্ণ হইয়াছে।

লতিকা মায়ের চরণে প্রণাম করিয়া বলিল, মা, আজ পাশের খবর এল, আজও কি মা রাগ ভুলে গিয়ে একটি আশীর্বাদ করবে না?

সুহাসিনী একবার কি ভাবিলেন। তারপর লতিকার মাথায় হাত দিয়া মনে মনে আশীর্বাদ করিলেন ও তাহাকে উঠাইয়া বুকের কাছে ক্ষণকাল রাখিয়া বলিলেন, রাগ কেন মা, আশীর্বাদ করছি, মা তোরা সবাই সর্ব-সুখে সুখী হ'স যেন।

সঙ্গে সঙ্গে লতিকার শিরে দুই বিন্দু অশ্রু ঝরিয়া পড়িল। কোথায় যে সুহাসিনীর রাগ সে কথা তো মেয়ে বুঝে না, আর মেয়েকে সে কথা বুঝাইয়া বলা যায় না।

সর্বাপেক্ষা আনন্দ হইয়াছিল মনোহরের। মনোহর মনোমধ্যে কয়েকটা বাসনা সংগোপন রাখিয়াছিলেন। তন্মধ্যে একটা হইতেছে মেয়েদের শিক্ষিতা করিয়া যাওয়া। তাঁহার জ্যেষ্ঠা কন্যা শিক্ষার সোপানে উঠিয়াছে ইহাই তাঁহার আনন্দের কারণ।

রাত্রে মনোহর অগ্ৰদিন অপেক্ষা একটু প্রফুল্লভাবে এবং অগ্ৰদিনের চেয়ে একটু আগে গৃহে ফিরিলেন। সুহাসিনীকে বলিলেন, দেখ অত বেশী রাত্রি পর্যন্ত কাজ ক'র না, ওতে শরীর টিকবে না।

সুহাসিনী বলিলেন, তোমার নিজের বেলায় সে কথা মনে থাকে না কেন ?

মনোহর বলিলেন, তোমাকে সব কথা আমি বুঝিয়ে বলতে পারছি—তাই তুমি ভাবছ আমি অন্য় করে বেশী খাটছি। একদিন সময় এলে বুঝবে আমি একটুও অন্য় করছি। একদিন ছিল আমার কথা তুমি বিনা তর্কে মেনে নিতে, আজকের একথাটীও যদি সেইভাবে মেনে নেও আমি সেটা অনুগ্রহ বলে মানব।

সুহাসিনী ঈষৎ বিরক্তির সহিত বলিলেন, থাক্, আর ‘অনুগ্রহ’ ইত্যাদি বলে নিগ্রহ করো না। জানই ত আমি তোমাদের মত শিক্ষা পাইনি।

ইহার পর আর কোন কথা হইল না। কিন্তু তর্ক করিলেও সুহাসিনী অন্য়দিনের চেয়ে শীঘ্র করিয়া কাজ সারিয়া শয়ন-কক্ষে আসিল।

মনোহরের শীর্ণ মুখে আজ প্রসন্নতা ফুটিয়াছে। সুহাসিনীকে কাজ সারিয়া আসিতে দেখিয়া মনোহর বলিলেন, এত বলে কয়েও যে আজ একটু শীঘ্র করে এসেছ সেও ভাল। তর্ক করা তোমার একটা স্বভাব।

সুহাসিনী শয্যার উপর উঠিয়া বলিলেন, তা তো বটেই। তুমিই তো আমাকে তাকিক করেছ—চিরদিন কি আমি এমনি ছিলাম ?

মনোহর বলিলেন, দেখ আজ আর ঝগড়া কোরো না। দুটো কথা আমাকে শাস্ত হয়ে বলতে দাও ; তুমিও শাস্তচিত্তে শোন।

সুহাসিনী চুপ করিলেন। শুনিবার জগুই প্রস্তুত হইয়া রহিলেন।

মনোহর বলিলেন, দেখ দুটা আশার বশবর্তী হয়ে আমি লতুকে

গ্যাটিক পাশ করাবার চেষ্টা করেছি। প্রথম, বোতুক তো তেমন দেবার ক্ষমতা হবে না—যদি মেয়েকে কিছু শিক্ষা দিলে সস্তায় ও সহজে ভাল পাত্র পাওয়া যায়। দ্বিতীয়, যদি ভাল বিবাহ দিতে না পারি, স্বশুর-বাড়ীতে কোন রকম আশ্রয় না পায়, মেয়ে নিজের বিদ্যাবুদ্ধির জোরে সংপথে থেকে নিজের জীবিকা অর্জন করতে পারবে। একটা উদ্দেশ্য কিঞ্চিৎ আমার সফল হয়েছে; আর একটা হচ্ছে ভবিষ্যতের জন্ত কিছু সঞ্চয়ের ব্যবস্থা। তুমি কিছু মনে ক'রো না—সেটা আমার অবশ্য কর্তব্য। সর্বক্ষণ আজকাল এই চিন্তা আমার মনে জাগে—যদি আজ আমার ডাক পড়ে, কাল সকলের কি উপায় হবে। যখন অসুস্থ হয়ে পড়ি তখন এই চিন্তা দ্বিগুণ হয়। আমি আজকাল যে বেশী খাটছি তার উদ্দেশ্য এই। সকালে ও রাত্রে খেটে আমি যে দশটাকার বেশী উপায় করিনে তা নয়। যে টাকাটা বেশী রোজগার করছি সে টাকাটা ভবিষ্যতের জন্ত রাখছি। এর জন্ত তুমি কিছু মনে কোরো না। এ কথাও যেন ভেবো না যে তোমার হাতে দিলে তুমি খরচ করে ফেলবে বা নিজে রাখবে এই ভেবে তোমাকে দিচ্ছিলে। এ সংসারে আরও বেশী খরচের দরকার। কিন্তু তাহলে ছুদিনের উপায় তো কিছু হবে না।

সুহাসিনী সব বুঝিলেন। তাঁহার মনে যে অভিমানের ব্যথা সর্বক্ষণ পীড়া দিত তাহা ইহাতে অনেকখানি কমিয়া গেল। সে স্থানে বরং স্বামীর প্রতি কর্কশ ব্যবহারের জন্ত অনুশোচনা জাগিতে লাগিল। এই পর্য্যন্ত শুনিয়া বলিলেন, তুমি আমার জন্ত—আমার ভবিষ্যতের জন্ত এই সব করছ—একথা আমাকে বোলো না। ওকথা আমি সহ করতে পারিনে।

মনোহর সুহাসিনীর কথায় ব্যথা বুঝিয়া ধীরে ধীরে সাঙ্ঘনার সুরে বলিলেন, শুধু তোমার জন্ত এ ব্যবস্থা একথা কেন ভাব্ছ। ভবিষ্যতের কথা কেউ বলতে পারে না। ধর, এমনই যদি হয় তুমি আমি দুজনকেই যেতে হল, তখন? তখন কে ছেলেমেয়েদের দেখবে? তারা যে একেবারে অপার সমুদ্রে পড়বে।

সুহাসিনী বলিলেন, অত ভাবলে কি চলে? ও সব ভগবানের ইচ্ছা! তাঁর ইচ্ছার উপর কিছু কিছু ছেড়ে দিতে হয় বৈ' কি।

মনোহর বলিলেন, তা হয় জানি। কিন্তু ভগবান্ যে এই জগত্ই মানুষকে শক্তি দিয়াছেন। শক্তির প্রয়োগ না করলে যে তাঁর কৃপা থেকে বঞ্চিত হতে হবে—এ কথাও ত ভুললে চলবে না। তোমার মনকে জিজ্ঞাসা কর, আমি যা বল্চি সত্য কি না? যদি মন তোমার এ কথায় সাড়া দেয়, তা হলে মুখকে তর্ক করতে শিথিও না। তবে এটাও তোমাকে জানিয়ে রাখছি যা সামান্য কিছু বাঁচাতে পারছি তা আমি নিজের কাছে রাখছি না—নিজের সঞ্চয়ের শক্তির উপর আমার বিশ্বাস নেই। ঈশ্বর আমার মনের মধ্যে যে টুকু জ্ঞান বুদ্ধি দিয়াছেন তারই বেশে কাজ করছি; তোমাকে অবিশ্বাস করছিনে—নিজেও অপব্যয় করছিনে।

সে রাত্রে সুহাসিনীর অনেক দুঃখ কমিয়া গেল। আনন্দ ও সুখ যেন দুজনেরই মনের বাতায়ন দিয়া সারারাত্রি নিদ্রা ও জাগরণের মধ্যে উঁকি মারিতে লাগিল। যৌবনে যে আনন্দ না পাইলেও যৌবনাস্তে ভুলক্রমে অনেকেই যাহা পাইয়াছেন বলিয়া মনে করে, বুঝি আজ এতদিন পরে দুইজনেই স্বপ্নে সেই অজ্ঞাত আনন্দের আশ্বাদ পাইল।

অমর এই সময়ে কয়েক দিনের জন্য বাগীশদের বাড়ী বেড়াইতে গিয়াছিল। গ্রীষ্মের ছুটির সময় সে কিছুদিন অমরদের বাড়ী গাকিয়া যাইবার সময়ে অমরকে সঙ্গে করিয়া লইয়া গিয়াছিল।

বাগীশ অমরের সতীর্থ ও বন্ধু, বাড়ী বিরাজপুর। বাগীশ নামটির একটা ইতিহাস আছে। কলেজে বার্কের Impeachment of Warren Hastings হইতে কয়েক স্থান এমন সুন্দর ভাবে সে আবৃত্তি করিয়াছিল যে, সেই সময় হইতে সে বার্ক আখ্যা লাভ করে। সেই বার্ক হইতে এই বাগীশ নামের উৎপত্তি এবং এই নামেই সে বাহিরে সকলের কাছে পরিচিত।

বিরাজপুরে থাকিতেই সে কাগজে লতিকার পাশের সংবাদ পাইল এবং সেই দিনই বাড়ী যাইবার জন্য ব্যস্ত হইয়া উঠিল। কেন যে সে যাইবার জন্য চঞ্চল হইয়া উঠিয়াছে সে কথাটাও বাগীশকে বলিতে হইল। বাগীশ শুনিয়া বলিল, ভাবে বোধ হয় তুমি লতিকার প্রেমে পড়েছ। কিন্তু এ প্রেম নি'ষিদ্ধ নয় ত ?

অমর বলিল, কি যে বল তুমি তার ঠিক নেই। তুমি নিতান্তই বাগীশ।

অতঃপর বাগীশ তাহাকে অনিচ্ছায় যাইতে দিল। অপরাহ্নে বাড়ী পৌছিয়া অমর সন্ধ্যায় লতিকাদের বাড়ী উপস্থিত হইল।

মনোহর তখন বাহিরে। সুহাসিনী তাহাকে বসিতে বলিয়া দুই একটি কুশল প্রশ্ন করিয়া সংসারের কাজে গেলেন। অমর ঘরে আসিয়া বসিল। কথিকা, যুথিকা, রামপ্রসাদ কিছুক্ষণের জন্ত অমরকে ঘিরিয়া রহিল। সর্বশেষে লতিকা খোকাকে কোলে করিয়া আসিল। একটু পরে কথিকা মায়ের সাহায্যের জন্ত উঠিয়া গেল। যুথিকাও তাহার অনুসরণ করিল। রামু পড়িতে গেল।

অমর বলিল, দেখ লতু, আমি বলেছিলাম না যে তুমি নিশ্চয়ই ভাল ক'রে পাশ করবে?

লতিকা বলিল, একে আর ভাল ক'রে পাশ করা আজকাল বলে না। ফাট ডিভিডনে পাশ করা আজকাল অতি সাধারণ।

অমর। তা হোক। আমার বিশ্বাস তুমি যদি কোন স্কুল থেকে পরীক্ষা দিতে তাহলে নিশ্চয়ই বৃত্তি পেতে। প্রাইভেটে দিলে সে সুযোগ নেই।

লতিকা। বৃত্তি না পাই,—আমি যে পাশ ক'রে বাবাকে একটু সুখী করতে পেরেছি এতেই আমি অনেক আনন্দ পেয়েছি।

অমর। সে কথা ঠিক, 'স্মার' এই খাটুনির মধ্যেও যে তোমাকে এই ভাবে পড়াতে পেরেছেন এ তাঁর অসাধারণ ক্ষমতা।

লতিকা। ঘুমে তাঁর চোখ জড়িয়ে আসছে—ক্লান্তিতে শরীর ভেঙ্গে পড়ছে, তবু তিনি বিশ্রাম নেননি। কিন্তু আমি পাশ ক'রে বাবার কোন দুঃখ দূর করতে পারব না এই আমার দুঃখ। আমি যদি মেয়ে না হয়ে ছেলে হতাম তাহলে বাবার অনেক দুঃখ কমত।

অমর। মেয়ে হয়েও তুমি 'স্মারকে' সুখী করতে পারবে। চেষ্টা ক'রলে কি না হয় ?

লতিকা। কিন্তু আমি তো কোন পথ দেখতে পাচ্ছি নে। বাবার হুশিয়ার সীমা সেই, হুঃখের শেষ নেই। তবু সমস্ত হুঃখ তিনি মুখ বুজে সহ্য কচ্ছেন।

আমি সব দেখছি, সব বুঝছি—অথচ কিছুই ক'রতে পারছি নে, বরং দিন দিন তাঁর হুশিয়ার বাড়িয়েই তুলছি।

শেষের কথাটা বলিয়া লতিকা মুখ নত করিল। অমর লতিকার লজ্জিত মুখভাব লক্ষ্য করিয়া বলিল, লতু, তুমি মিথ্যা ক্ষোভ কোরো না ; মিথ্যা লজ্জা পরিত্যাগ কর। বরং যাতে তুমি সংসারের সাহায্য করতে পার তারই চেষ্টা কর।

লতিকা মুখ তুলিয়া ধীরে ধীরে বলিল, কি ক'রে করব, তুমি ব'লে দাও, অমর-দা। তুমি ছাড়া ভরসা দেবারও তো কেউ নেই আমাদের।

অমর একটু স্নান হাসিয়া বলিল, আমি আর কি করতে পারছি লতু। স্মারকের কাছে যে অমূল্য জিনিষ পেয়েছি তার জন্ত চিরজন্ম যদি তাঁর সেবা করি, তাহলেও বেশী কিছু করা হয় না। তাঁর কাছে যে শুধু জ্ঞান বা শিক্ষা পেয়েছি—তা নয়। সঙ্গে সঙ্গে তাঁর স্নেহও পেয়েছি। সে স্নেহ যে কি তাতে তুমি খুব জান।

লতিকা কৃতজ্ঞ দৃষ্টিতে অমরের পানে চাহিয়া বলিল, তুমিই তাহলে বলে দাও কি ক'রে আমি বাবার অন্ততঃ কিছু হুঃখ লাঘব করতে পারি।

অমর বলিল, তাঁর হুঃখ বা হুশিয়ার সবই তো তোমাদের জন্ত।



তোমরা যদি স্বাবলম্বন শিখতে পার, ভাল ক'রে শিক্ষা লাভ ক'রতে পার, তাহলে তাঁর ছুঁর্ভাবনাও সেই পরিমাণে অনেকটা কমে যাবে।

লতিকা। ম্যাটিক পাশ ক'রে মেয়ে গান্ধুখে কি করবে বল। ছেলে যদি হতাম একটা তবু ১৫, ২০ টাকার চাকরি করেও বাবার একটু সাহায্য করতে পারতাম।

অমর। তুমি উতলা হোয়ো না। এই অবস্থাতেই তুমি যে সাহায্য করতে পার আমি সেই কথাই তোমাকে বলছি। আই-এর বই সবই আমার কাছে আছে। দুই একখানা মাত্র বদলেছে। সেগুলো সব ধীরে ধীরে পড়তে থাক; বাকিগুলোও আমি সব এনে দেব। কিছু বাইরের বইও পড়ার দরকার। সে বইও আমি যোগাড় ক'রে দেব। ঠিক ছ'বছর পরে আই-এ দেওয়া চাই। তোমার Substance (সারাংশ) লেখবার বেশ হাত আছে। ও অভ্যাস রাখবে।

লতিকা। তা যেন করলাম। কিন্তু মায়ের যে আর বেশী পড়ায় আপত্তি।

অমর! কেন? কাকীমা কি বলেন?

লতিকা। মা বলেন, আর পড়লে লাভ তো নেই, বরং অলাভ আছে।

অমর। কাকীমা একথা বলেন কেন?

লতিকা। মা বলেন, আমাদের গৃহস্থের সংসার এইটুকু শিখেই কিম্বদ; এর চেয়ে বেশী শিখলে—বলিয়া লতিকা লজ্জায় চুপ করিল।

অমর। এ তোমার সেই 'ছুঁর্ভাবনার' কথা। তা আমাদের সমাজ হিসাবে কথাটা ভিত্তিহীন নয়। কিন্তু কেন এমন হয়—আমি তাই



ভাবি। শিক্ষা যদি গুণ হয় তা'হলে গুণবতী মেয়েদের আদর কেন বাড়ে না আমি তা বুঝতে পারিনে।

লতিকা। মা বলেন, শিক্ষা মানে তো কেবল পাশ করা বা ইংরাজী শেখা নয়। শিক্ষা মানে সকল বিষয়ের জ্ঞান। গৃহস্থ ঘরের মেয়ে সংসারের সব শিখতে হবে; শুধু বইয়ের বিদ্যা শিখলে হবে না।

অমর। এ ঠিক কথা। কিন্তু তুমি তো সংসারের সব শিক্ষা পেয়েছ।

লতিকা। মা বলেন, সে কথা তো বাইরের লোকে জানবে না। তারা ভাবতে পারে মেয়ে হয়ত ইংরিজী বই ছ'খানা পড়ে একেবারে বিবি হ'য়ে গেছে। আর ধারা একথা ভাবেন না তাঁদের কাছে বাবা এগুতে পারবেন না।

অমর। কারও কাছে যদি এগুতে না হয় লতু ?

লতিকা একবার অমরের পানে মুখ তুলিয়া চাহিল; তারপর আনন্দে ও লজ্জায় মাথা নীচু করিল।

অমর আবার বলিল, কেউ যদি নিজেকে সেধে আসে লতু—ভাই'লে কি তার কথা রাখবে ?

লতিকার সর্বদেহ আনন্দের আবেশে কাঁপিতেছিল। অমরের ভয় হইল পাছে লতিকা পড়িয়া যায়। সে ব্যস্ত হইয়া লতিকার একখানি হাত হাতের মধ্যে লইয়া চুপি চুপি বলিল, লতু, শান্ত হও। আমি আমার প্রশ্নের উত্তর পেয়েছি। তোমায় কিছু বলতে হবে না।

লতিকা ধীরে ধীরে শান্ত হইল, কি একটা বলিতে গেল। কিন্তু ভাস্কর কথা কঠোর মধ্যে ও অমরের কথার যে সুর ভাস্কর কাণে বাজিতেছিল সেই সুরের মধ্যে হারাইয়া গেল।

মনোহর যখন নরহরির দোকানে খাতাপত্র লিখিয়া ফিরিয়া আসিলেন তখন অমর বাড়ী ফিরিবার উদ্যোগ করিতেছে। আজ অমর ও লতিকার মুখ যেন আনন্দে উদ্ভাসিত বলিয়া মনে হইল। লতিকার পরীক্ষা সাফল্যের জন্য তাঁহার মনেও কম আনন্দ হয় নাই। কিন্তু ইহাদের আজিকার আনন্দ যেন অগ্ৰবিধ। ইহার মূল যেন আরও দূরে—হৃদয়ের গভীরতম প্রদেশে।

মনোহরের আজ হঠাৎ মনে হইল, ইহাদের দুটীতে যদি বিবাহ হয় তো কি সুখের হয়! দুজনেই দুজনের সর্বতোভাবে উপযুক্ত।

অমর জিজ্ঞাসা করিল, শ্রার! আপনার বইয়ের আর কত দেবী? মনোহর বলিলেন, Historyর Note তো শেষ হয়েছে! কিন্তু Text-book এখনও বাকি আছে খানিকটা। ভাবছি এখানা শেষ হ'লে একসঙ্গে দুখানাই তোমার হাতে দেব।

অমর বলিল, Note যে কোন সাধু প্রকাশককে দিয়ে ছাপানো যেতে পারে।

Text-book প্রকাশ করতে গেলে নামজাদা প্রকাশক চাই। আমি ২১ দিনের মধ্যে একবার কলকাতা যাব, আপনার নোটখানি আমাকে দিন। এবারেই চেষ্টা করে আসব। কিন্তু Text-book খানিও শীঘ্র

শেষ ক'রে ফেলুন। ওখানা আবার টাইপ করিয়ে তবে দিতে হবে।

নামজাদা প্রকাশকেরা আবার হাতের লেখা পছন্দ করেন না।

মনোহর বলিলেন, তাই দেব। সপ্তাহ খানেকের মধ্যে শেষ হবে মনে হয়। নোটখানা তাহলে এখনি নিয়ে যাবে ?

অমর বলিল, তাই দিন্।

মনোহর লতিকাকে বলিলেন, মা, সেই নোটখানা অমরের হাতে দাও তো।

লতিকা পিতার ঘর হইতে পাণ্ডুলিপিখানি আনিয়া অমরের হাতে দিল।

অমর পাণ্ডুলিপি হাতে করিয়া লতিকার হাতের মধুর স্পর্শ টুকু ভাবিতে ভাবিতে গৃহের দিকে যাত্রা করিল।

মনোহর বসিয়া বসিয়া ভাবিতে লাগিলেন, এরা দুজনা দুজনের যোগ্য। প্রতিবন্ধক একমাত্র আমার দারিদ্র্য। কিন্তু অমরের পিতা সদাশয় লোক। তিনিও কি সাধারণ লোকের মত কণ্ঠার পিতার দারিদ্র্যকে একটা প্রতিবন্ধক মনে করিবেন ? হয়ত করিবেন না। অবশ্য নিশ্চিত করিয়া কিছু বলা যায় না। কিন্তু একবার চেষ্টা করিয়া দেখিলে ক্ষতি কি ? যদি রাজী হন তো সব দিক দিয়াই ভাল। লতিকার ভাল বিবাহ হইবে ; সঙ্গে সঙ্গে তাঁহার অবর্তমানে ছেলেমেয়েদের একজন অতিভাবকও হইবে। মানুষের জীবন সত্যসত্যই পদ্যপত্রের জল। কখন যে শেষ হইবে বলা যায় না। এক এক সময়ে মনে হয় বুঝি আর বেশী দেবী নাই। ইদানীং বুকে এক এক সময়ে একটা বেদনা বোধ হয়। কাহাকেও সে কথা বলেন নাই। ডাক্তারকেও দেখান নাই। কিন্তু আপনি আপনি

মনে হয় ইহা একটি কঠিন রোগের সূচনা। ভবিষ্যতের জন্য সামান্য একটা ব্যবস্থা করিয়াছেন বটে। কিন্তু ভবিষ্যৎ যে দীর্ঘ এবং ব্যবস্থা যে সামান্য তাহাতে তাঁহার অবর্তমানে সংসারের কতটুকু অভাব দূর হইবে! যদি অমরের পিতা রাজী হন সৌভাগ্য বলিতে হইবে।

রাত্রে আহালাদির পর মনোহর সুহাসিনীর কাছে মনোভাব ব্যক্ত করিলেন।

সুহাসিনী বলিলেন, একথা তোমার আজ মনে হয়েছে; আমি বহুকাল আগে একথা ভেবেছি। তুমি কি ভাববে ভেবে তোমাকে বলিনি।

মনোহর বলিলেন, কালতো রবিবার, অমরের বাপ বাড়ী থাকবেন। কথাটা কি কালই পেড়ে দেখব?

সুহাসিনী পরামর্শ দিলেন যে দেখাই উচিত।

এ বিবাহ হইলে কত ভাল হয় দুজনে সে সম্বন্ধেও কথাবার্তা হইল। রাত্রিটা কোন রকমে কাটিয়া গেল। পরদিন সকালে উঠিয়া মনে মনে ভগবানকে স্মরণ করিয়া মনোহর অমরদের বাড়ীর উদ্দেশে চলিলেন।

রবিবারে ছেলের ছুটি। গৃহশিক্ষকদেরও তাই। সমর তাই মাষ্টার মহাশয়কে দেখিয়া একটু বিস্মিত হইল। মনোহর হাসিয়া বলিলেন, ভয় নেই, তোমায় আজ পড়তে হবে না। আজ তোমার বাবার সঙ্গে দেখা করতে এসেছি।

সমর ছুটিয়া পিতাকে খবর দিতে গেল। একটু পরেই চন্দ্রনাথবাবু নামিয়া আসিলেন।

কুশল প্রশ্নাদির পর চন্দ্রনাথবাবু সমরের লেখাপড়া সম্বন্ধে হই একটি

কথা জিজ্ঞাসা করিলেন। অমর নিজের সম্বন্ধে কথাবার্তা শুনিয়া গৃহান্তরে চলিয়া গেল।

অগাধ কথাবার্তার পর মনোহর একটু ইতস্ততঃ করিয়া বলিলেন, আমি একটা বিষয়ের জন্ত ভিক্ষার্থী হয়ে আপনার কাছে এসেছি।

চন্দ্রনাথবাবু একটু জিজ্ঞাসুভাবে চাহিয়া বলিলেন, কি কথা আজ্ঞা করুন।

মনোহর বলিলেন, আমার বড় মেয়ে লতিকা এবার প্রাইভেটে ম্যাট্রিক পাশ করেছে, শুনেছেন বোধ হয় ?

চন্দ্রনাথবাবু স্নিগ্ধকণ্ঠে কহিলেন, হ্যাঁ শুনেছি বৈ কি ! বেশ ভাল কাজ করেছেন আপনি। আমার স্ত্রী বলছিলেন এত কাজের মধ্যেও যে আপনি সময় ক'রে মেয়েটিকে পড়াতে পেরেছেন এ আপনার পক্ষে অতি প্রশংসার বিষয়। অমর তো বলে, লতিকা যা শিখেছে তাতে সে আই-এ পাশ একটু চেষ্টাতেই করতে পারে।

মনোহর বলিলেন, আপনার আশীর্বাদ। লতু গৃহকর্ম সব জানে। বড় শাস্ত, আর মন বড় উঁচু। এরই জন্ত আজ ভিক্ষায় এসেছি। অমর তো আপনার বিবাহযোগ্য হয়েছে। মেয়েটিকে যদি দয়া করে অমরের জন্ত গ্রহণ করেন।

চন্দ্রনাথবাবুকে চিন্তিত মুখে নীরব থাকিতে দেখিয়া মনোহর বলিলেন, আপনার অবস্থার সঙ্গে আমার অবস্থার আকাশ পাতাল পার্থক্য আমি জানি। কিন্তু আপনি দরিদ্রকেও ঘৃণা করেন না—সেই ভরসায় আমি আপনার কাছে এই প্রস্তাব করতে সাহসী হয়েছি।

চন্দ্রনাথবাবু বলিলেন, আপনার প্রস্তাবে কোন দোষ হয়নি। লতিকার

কথা আমি সব শুনেছি। অমন মেয়ে পুত্রবধুরূপে পাওয়া ভাগ্যের কথা। তারপর আপনার উপর আমার যথেষ্ট শ্রদ্ধা আছে। আপনার বংশ নিশ্চল তাও আমি জানি। কিন্তু এর একটা প্রতিবন্ধক আছে। আমাদের মে বংশমর্যাদা তার উপর আমার একটা প্রবল আকর্ষণ আছে। পাল্টা দব ভিন্ন আমরা আজ পর্যন্ত ছেলেমেয়ের বিবাহ দিই নি। সে জন্য আজ পর্যন্ত আমাদের কৌলীণ্য ভঙ্গ হয়নি। আপনারা ভঙ্গ, আপনারদের বংশে বিবাহাদি হলেই আমাদেরকেও ভঙ্গ হতে হবে। নৈকশ্চের মর্যাদা চলে যাবে। এর যে খুব বেশী একটা দাম আছে, তা নয়। কিন্তু তবু এর মায়া আমি ছাড়তে পারিনি। আমার বাবা পর্যন্ত এই কৌলীণ্যকে অব্যাহত রেখে গেছেন। আমিও তাই রেখে যেতে চাই। আমা হতে যে এর ধারা বাধা পাবে এ মনে করতেই আমার অন্তরে ব্যথা লাগে। এ একটা বহুকালকার বদ্ধমূল সংস্কার ছাড়া বেশী কিছু নয়। তবে আপনি তো জানেন সংস্কারের শক্তি কত বিশাল।

বলিয়া চন্দ্রনাথবাবু সত্য সত্যই হাত যোড় করিলেন।

আশাভঙ্গের গভীর ব্যথা মনোহরের মুখে চোখে ফুটিয়া উঠিল। তিনি বলিলেন, আমি একথা বুঝতে পারিনি। আমার ধারণা ছিল মেয়ের বিবাহ দিতেই আপনারদের সমান ঘরের প্রয়োজন। আমায় ক্ষমা করবেন।

মনোহরবাবু উঠিয়া হাত যোড় করিয়া বলিলেন, আপনি একথা বলবেন না। আমি আপনার কথা সব বুঝেছি। এর জন্য আপনার দোষ দিতে পারিনি। অনেক সুযোগ থাকা সত্ত্বেও মানুষের সব আশা সব সময়ে পূর্ণ হয় না এ ব্যাপার তাহারই একটা প্রমাণ। আমি না বুঝে আপনার উদার মনে কষ্ট দিয়েছি সে জন্য আপাকে আপনি ক্ষমা করবেন।

চন্দ্রনাথবাবু সহানুভূতিপূর্ণ কণ্ঠে বলিলেন, লতিকার বিধাহে আমার আর যা সহায়তা সম্ভব হয় আমি তা সানন্দে করব। আমি আজ হ'তে যোগ্য পাত্রের সন্ধানও করতে থাক্বে এবং সন্ধান পেলেই আপনাকে জানাব।

“আমি তবে এখন আসি। আপনার দয়া আমি কখন ভুলবো না।” বলিয়া মনোহর ধীরে ধীরে কক্ষ হইতে বাহির হইলেন। মনোভঙ্গের যে ব্যথাটুকু তাঁহার কণ্ঠে ধ্বনিত হইয়াছিল তাহাতে চন্দ্রনাথবাবুকে কাতর করিয়াছিল। কাহাকেও নিরাশ করা তাঁহার স্বভাব নহে। আজ কিন্তু স্বভাববিরুদ্ধ কাজ তাঁহাকে করিতে হইয়াছে, তাই তিনি ক্লিষ্ট ও চিন্তাশ্রিত মুখে ধীরে ধীরে অন্তঃপুরে প্রবেশ করিলেন। মনোহরের কাতর ও নৈরাশ্রব্যঞ্জক মুখমণ্ডল সত্যই তাঁহার উদার ও দয়ালীল হৃদয়কে পীড়া দিতেছিল।

[ ১১ ]

স্বামীর মুখের ভাব দেখিয়া না জিজ্ঞাসা করিয়াও সুহাসিনী বুঝিয়া-ছিলেন স্বামীর চেষ্টা সফল হয় নাই। তথাপি জিজ্ঞাসুভাবে মুখের দিকে চাহিতে মনোহর বলিলেন—কিছুই হ'ল না।

সুহাসিনী বলিলেন—রাজী হ'লেন না? কি বল্লেন?

মনোহর হতাশার সহিত বলিলেন, তাঁরা নৈকশ্য কুলীন, ভঙ্গের সঙ্গে কাষ করতে অনিচ্ছুক।

সুহাসিনীর মুখভাব একটু কঠিন হইয়া উঠিল। বলিলেন, সত্যিই কি এই আপত্তি—না ভেতরে টাকার খাঁই আছে ?

মনোহর বলিলেন, না, তা নেই। তিনি যে সব কথা বল্লেন, তা আন্তরিক ভাবেই বল্লেন। লতুর বিবাহে আর যা সহায়তা দরকার হয় তা তিনি আনন্দের সঙ্গে করবেন—এসব কথাও বল্লেন।

সুহাসিনী অবসন্ন মুখে বলিলেন, তবে তো খুবই করেছেন! ওসব ছেঁড়া কথা বড়মানুষি ঢং ক'রে বলা। যে উপায় তাঁর হাতের মধ্যে সে উপায়ে সাহায্য করতে পারবেন না, আর অন্য উপায়ে সাহায্য করবার জন্য একেবারে অস্থির। তুমি যেমন তাই ওই কথায় ভুলে এলে।

মনোহর উদাসভাবে বলিলেন, ভুলে না এসে আর কি করতে পারতাম বল ? আপনাকে বিয়ে দিতেই হবে নইলে ছাড়ব না—একথা ব'লেও তো কোন লাভ নেই।

সুহাসিনী তিক্ততার সহিত বলিলেন, তা নেই জানি। কিন্তু মাথা-মাথিরও তো কম নেই তাব'লে।

মনোহর একটু বিরক্তির সহিত বলিলেন, মাথামাথি থাকলেই যে ছেলের সঙ্গে বিয়ে দিতে হবে এমন কোন বাধাবাধি তো নেই। মাথামাথি করি নিজের গরজে। তোমাদের জন্তই এসব করতে হয়।

সুহাসিনী তীক্ষ্ণকণ্ঠে কহিলেন, 'তোমাদের জন্য তোমাদের জন্য' স্বাধার একথা কেন বল ? ছেলেপুলের জন্য কর তাই বল। ছেলেপুলে আমারও যেমন তোমারও ভেমনি।



মনোহরের শরীর ও মন তখন নিরাশার ভারে ভাঙ্গিয়া পড়িতেছিল। ক্লান্তকণ্ঠে কহিলেন, আচ্ছা, স্বীকার করছি 'তোমাদের' বলা অন্যায় হয়েছে। আজ থেকে তোমাদের না ব'লে আমার বলব। আমি যে রোজ সকালে ছেলে পড়ানো থেকে সন্ধ্যায় দোকানদারের খাতাপত্র লেখা পর্য্যন্ত সব নিজের জন্য করি—এই কথাটাই বলব ও ভাবব।

সুহাসিনী বলিলেন, তুমি দোকানে খাতা লেখ কি ওজন কর সে কথা আমাকে শোনানোর কি দরকার! আমি পরণের ছুথানা কাপড় আর পেটের ছুঁঠো ভাত ছাড়া কখন কিছু চাইনি—পাইওনি। তা আমাকে ওকথা বলা কেন? নিজের দরকার বুঝেছ—করেছ; দরকার বুঝতে না—করতে না।

মনোহর নিঃশ্বাস ফেলিয়া বলিলেন, নিজের দরকার কি কার দরকার যে দিন জান্বে সে দিন বুঝবে।

'আমি জানতেও চাইনে, বুঝতেও চাইনে। চিরকাল যা ক'রে এসেছি আজও তাই করছি।'

বলিয়া সুহাসিনী রাগ করিয়া সেখান হইতে তাড়াতাড়ি চলিয়া গেল।

মনোহর ভাবিতে বসিলেন। ভাবনার আর শেষ নাই। অন্যদিন স্থল থাকে, ছেলে পড়ানো থাকে, সময় একরকমে কাটিয়া যায়। কিন্তু আজ চিন্তা ব্যতীত আর কিছুই সম্বল নাই। কোন দিকে সহানুভূতির কোন প্রত্যাশা নাই। কন্যার বিবাহের যৌতুক দিবার ক্ষমতা নাই। সমাজের যে অবস্থা তাহাতে পাত্রাপাত্রের বিচার নাই। পুরুষ হইলেই সে পাত্র—সুতরাং তাহাদের ইচ্ছামতই যৌতুকাদি দিতেই হইবে। না দিলে বিবাহের

উপায় নাই। যে দুর্বল সমাজে তাঁহার বাস তাহাতে এ অবস্থাতেই কন্যার বিবাহ না দেওয়া একটা প্রকাণ্ড অপরাধ—এবং হয়ত বিপদের কথাও বটে। লতিকাকে যদি আর একটু লেখাপড়া শিখাইয়া স্বাবলম্বী করিয়া তুলিতে পারেন হয়ত বিবাহ না করিয়া তাহার জীবিকা সে অর্জন করিতে পারিবে। কিন্তু তাহার ফলে হয়ত কথিকা ও মূখিকার বিবাহ হওয়া দুর্ঘট হইবে।

তাহা ছাড়া গরীবের তাসের ঘরে বাস। এখন এতটুকু বাতাসে ঘন ভাঙ্গিয়া যায় তখন স্ত্রী-পুত্রকন্যাদের কি হইবে? কাহার আশ্রয়ে তাহারা যাইবে? কে তাহাদের দেখিবে? তাঁহার দারিদ্র্য ও অবিবেচনার জন্য কি স্ত্রী-পুত্রকন্যা তাঁহাকে অভিসম্পাত দিবে না? এত কষ্ট—এত পরিশ্রম করিয়া, এত অভাব সহ করিয়া, এত অশান্তির তুফান তুলিয়া ভবিষ্যতের জন্য যেটুকু ব্যবস্থা করিয়াছেন তাহার মূল্যই বা কতটুকু?

ইতিহাসের রইখানি এখনও শেষ হয় নাই। আর বিলম্ব করা উচিত নহে। আর কাহারও কাছে কোন প্রত্যাশা না করিয়া, নিজের শক্তিতে নিজের সামর্থ্যে যাহা হয় তাহাই আজ হইতে তিনি সম্বল করিবেন। সময়ের তিনি গৃহশিক্ষক; ঠিক সেই হিসাবেই সেখানে যাইবেন। মাসিক কয়টি টাকা মাত্র তাঁহার প্রাপ্য। তাহার বেশী কিছু তাঁহার চাহিবার নাই—এই শিক্ষাটুকু সর্বক্ষণ তাঁহাকে মনে রাখিতে হইবে। আর গৃহে স্ত্রীর কাছে তিনি কিছু প্রত্যাশা করিবেন না। পুত্র-কন্যাদের কাছেও নয়। কাহারও কাছে প্রত্যাশা না রাখিলে নিরাশার হাত হইতে রক্ষা পাইবেন। দুঃখ কোন প্রকারে সহ হইয়া যায়, কিন্তু নিরাশার আঘাত বড় দুঃসহ।

সেদিন তিনি নাম মাত্র আহারে বসিলেন। যাহা পারিলেন দুই মুঠা মুখে দিয়া উঠিয়া পড়িলেন। এইবার স্থির করিলেন আর এক মুহূর্ত্ত সময় অপব্যয় করিবেন না। তাহার পর লেখা লইয়া বসিলেন।

ছত্রের পর ছত্র লিখিয়া চলিলেন। যে বেদনা তাঁহার অন্তরে দারুণ দুঃখ দিতেছিল তাহাই আজ তাঁহার লেখাকে সহজ সুন্দর ও সরল করিয়া তুলিতে লাগিল। যে ইতিহাসকে তিনি চিরদিন খণ্ড বিখণ্ড ও ছিন্ন বিচ্ছিন্ন ঘটনা মনে না করিয়া সমাজের ও দেশের ক্রমোন্নতির ধারাবাহিক বিবরণ—কত শত সাম্রাজ্যের উত্থান-পতনাদির অন্তর্নিহিত নাতিগর্ভ বিরাট সত্যের মনোজ্ঞ কাহিনী বলিয়া মনে জানিয়া আসিয়াছেন তাহাই আজ অত্যন্ত চিত্তাকর্ষকরূপে তাঁহার মনোমাবে উদ্ভিত হইয়া মধুর ভাবের বন্ধনে ধরা দিতে লাগিল।

দিন শেষ হইয়া গেল। তবু লেখার বিরাম নাই। দীপ জ্বলিল, প্রাক্‌গে শঙ্খধ্বনি উঠিল। আকাশে একে একে নীল উজ্জ্বল তারাগুলি ফুটিতে লাগিল, তথাপি মনোহর একটি বারের জন্তও লেখা হইতে বিরত হইলেন না। এক একবার বড় ক্লান্তি আসিলে মনোহর ক্ষণকালের জন্ত উঠিয়া কক্ষের মধ্যেই পাদচারণা করিয়া লইলেন। আবার একটু পরে লিখিতে বসিলেন।

রাত্রি ১০টা বাজিয়া গেল। লতিকা আসিয়া জিজ্ঞাসা করিল, বাবা, খাবার দেওয়া হবে ?

মনোহর বলিলেন, আমার খাবারটা এই ঘরেই ঢেকে রেখে তোমরা খেয়ে নাওগে। আমার খেতে আজ অনেক রাত হবে।

লতিকা তথাপি একবার বলিল, ওবেলা তো একেবারেই খাওয়া হয় নি ; খেয়ে নিয়ে কেন লেখনা, বাবা !

মনোহর মুখ তুলিয়া শাস্ত অথচ দৃঢ় স্বরে বলিলেন, না মা, তাহলে লেখা হবে না। তোমরা আমার খাবার এখানে রেখে খেয়ে নাওগে।

লতিকা আর কিছু বলিতে পারিল না। নীরবে কক্ষত্যাগ করিয়া পিতার রাত্রিকার খাবার আনিয়া ও সযত্নে তাহা ঢাকিয়া রাখিয়া ম্লান মুখে ফিরিয়া গেল।

আর সব ছেলে মেয়েরা আগেই খাইয়া লইয়াছিল। লতিকাকেও মায়ের তাড়নায় খাইতে বসিতে হইল। সে অনেক করিয়া মাকেও খাইবার জন্ত অনুরোধ করিল, কিন্তু মা তাহাতে কাণও দিলেন না। কার্য্য শেষ করিয়া তিনি শয়নকক্ষে আসিলেন। মনোহর তখনও ভাবিতেছেন আর লিখিতেছেন। তাঁহার মুখমণ্ডলে ক্রোধ বা বিরক্তির কোন চিহ্ন নহি।

সুহাসিনী—কক্ষদ্বার অর্গল বন্ধ করিয়া কোন কথা না বলিয়া শয্যায় শয়ন করিলেন। হুঃখ ও অভিমানে তাঁহার হৃদয় উদ্বেলিত হইতে লাগিল। কেন, কিসের জন্ত স্বামী এত পরিশ্রম করেন ? দিন নাই, রাত্রি নাই, ছুটি পর্য্যন্ত নাই ! কিসের জন্ত, কোন্ আশায় এই অমানুষিক পরিশ্রম স্বামী করিতেছেন ? এত কাজ, এমন জিদ যে খাওয়ার পর্য্যন্ত সময় হয় না ? এমন করিয়া তাহাকে কষ্ট দেওয়া কেন ? কি তাহার অপরাধ ? কিসের প্রত্যাশী সে যে এই টাকা উপায়ের 'অছিলা' করিয়া তাহাকে এই শাস্তি

দেওয়া ? একদিনের জন্তও কি সে বলিয়াছে যে তাহার এই জিনিষ চাই ?

সুহাসিনীর চক্ষু ফাটিয়া জল আসিল। কণ্ঠ ভেদিয়া ক্রন্দন আসিতে লাগিল। ক্রন্দন তিনি দমন করিলেন। শুধু অশ্রুজলে তাঁহার উপাধান সিক্ত হইতে লাগিল।

কিছুক্ষণ অশ্রু বিসর্জন করিয়া চিন্তভার কথঞ্চিৎ লঘু হইলে সুহাসিনী ধীরে ধীরে সজল চক্ষে ঘুমাইয়া পড়িলেন।

অসাধারণ শক্তি ও উৎসাহে মনোহর লিখিয়া যাইতে লাগিলেন। তাঁহার মনে হইল, যখন ভগবানের কৃপায় কল্পনা ও জ্ঞানের দুয়ার খুলিয়া গিয়াছে তখন এই সুযোগ—এই দুয়ার বন্ধ হইবার পূর্বেই সমস্ত লেখা শেষ করিতে হইবে। হয়ত বা এমন সুযোগ আর আসিবে না। মনোহর দ্বিগুণ উৎসাহে লিখিতে লাগিলেন। ক্রমে লেখা শেষ হইয়া আসিল। শেষ পরিচ্ছেদে হিন্দু সভ্যতা, মুসলমান সভ্যতা ও ইংরাজী সভ্যতার বিশেষত্ব ও পার্থক্য অতি সুন্দর ভাষায় বর্ণিত হইয়া পুস্তক সমাপ্ত হইল। এতদিনকার আশা আজ সফল হইল। মনের মতন করিয়া একখানি বই লিখিতে পারিলেন। আনন্দে মনোহরের সর্বদেহ শিহরিয়া উঠিল। মনোহর কলম রাখিয়া দুয়ার খুলিয়া একবার বাহিরে আসিয়া দাঁড়াইলেন।

তখন শেষ রাত্রি। চারিদিকে পরিপূর্ণ জ্যোৎস্না। আকাশে চন্দ্র বেন জ্যোৎস্নাসাগরে ভাসিয়া যাইতেছে। বিগলিত জ্যোৎস্না-ধারায় বৃক্ষ, লতা, ভূগ-মণ্ডিত ধরনীতল সিক্ত, স্নাত, স্নাবিত হইয়া গিয়াছে। চাহিয়া চাহিয়া আনন্দের ধারায় মনোহরের সমস্ত হৃদয় উদ্বেলিত হইয়া উঠিল। এই

আনন্দের ভাগ কাহাকেও দিবার জন্ত তাঁহার অন্তর ব্যাকুল হইয়া উঠিল, তিনি গৃহমধ্যে আসিলেন।

চারিদিক নিস্তরু। বামদিকের শয্যার উপর শিশুপুত্রকে কোলের কাছে লইয়া সুহাসিনী ঘুমাইয়া। শয্যার দিকে চাহিতেই সুহাসিনীর অশ্রু-ভ্রাঙ্কিত স্নান মুখ মনোহরের চক্ষে পড়িল।

হঠাৎ কে যেন অন্তর হইতে বলিল, এই অভাগিনী নারীর যৌবনাবধি আজ পর্য্যন্ত কি কষ্টে কাটিয়াছে তাহার কোন সংবাদ রাখ? ইহার মুখের কঠিন ভাষাকেই চিরকাল বড় করিয়া দেখিয়াছ; অন্তরের দুঃখ সমুদ্রের পানে তো কোন দিন ফিরিয়াও চাও নাই।

অনুশোচনায় মনোহরের অন্তর ভরিয়া গেল। হঠাৎ বক্ষের বাম দিকে একটি অতি তীব্র বেদনা বোধ হইল। মনে হইল, এই বুঝি তাঁহার শেষক্ষণ। তাহাই কি? যদি তাহাই হয়, আজিকার উচ্চারিত প্রেমহীন কঠোর বাণীই কি সুহাসিনীর প্রতি প্রযুক্ত শেষ বাণী হইবে? তাহা হইলে কি তাহার অবলম্বন হইবে? কি লইয়া সে থাকিবে? যদি আজই এইক্ষণে চিরকালের মত চলিয়া যাইতে হয়, যে চিরদিন-চিররাত্রি তাহার সঙ্গে শুধু দুঃখ ভোগই করিয়া আসিয়াছে তাহার সাস্থনার জন্ত কি রাখিয়া যাইবেন?

বাম হাতে ব্যথিত স্থানটিকে টিপিয়া ধরিয়া দক্ষিণ হাত দিয়া খাতা হইতে একখানি সাদা পাতা ছিঁড়িয়া মনোহর প্রাণপণ চেষ্টায় লিখিলেন—

সুহাসিনী,

আমাকে ক্ষমা করিও। রাগ করিয়া যাহা বলিয়াছি তাহা আমার অন্তরের কথা নহে। তোমার নিঃস্বার্থ প্রেমপূর্ণ হৃদয় আমি জানি। আজ শেষক্ষণ তোমার মধুর হৃদয়ের অন্তস্তল পর্য্যন্ত আমি দেখিতে পাইতেছি।

সেখানে বিন্দুমাত্র স্বার্থ নাই। আছে শুধু পরিপূর্ণ প্রেম ও স্নেহ। বুকের মধ্যে অসহ যন্ত্রণা হইতেছে। হয়ত আর দেখা হইল না। কিন্তু জানিও— বিশ্বাস করিও তোমার প্রতি অবিচল প্রেম লইয়া আমি চলিলাম। আমার কঠিন বাক্য, তিক্ত ব্যবহার ক্ষমা করিও। অভাব, দৈন্ত, দুঃখ তোমার প্রতি আমার অগাধ প্রেমকে আড়াল করিয়াছিল মাত্র—তাহাকে মলিন বা নষ্ট করিতে পারে নাই। তোমার উপর আমি পুত্র-কন্যাদের ভার দিয়া অনিচ্ছায় চলিলাম। যত দিনেই হউক আবার তোমার সঙ্গে দেখা হইবে।

শেষের দিকটায় মনোহরের লেখা জড়াইয়া আসিল। আর কলম চলে না। কোন রকমে পত্র শেষ করিয়া অত্যন্ত জড়িত অক্ষরে নাম লিখিয়া মনোহর ভাবিলেন যেটুকু ক্ষমতা অবশিষ্ট আছে তাহাতে কি সুহাসিনীর কাছটিতে কোন প্রকারে আপনাকে টানিয়া লইয়া যাইতে পারিবেন না? একবার সেই চেষ্টা করিতে গিয়া বেদনা তীব্রতর রূপে দেখা দিল। সঙ্গে সঙ্গে টেবিলের উপরকার প্রসারিত পাণ্ডুলিপির উপর তাঁহার শ্রান্ত শির নুটাইয়া পড়িল। আত্মা মুক্তি পাইল।

রাত্রি শেষ হইয়া গিয়াছিল। মুক্ত ছয়ার দিয়া উষ্ণ স্নিগ্ধ আলোব ঘাসিয়া তাঁহার লুণ্ঠিত এতদিনকার তাপদগ্ধ দেহে—শীতল হস্ত বুলাইয়



কিছুক্ষণ পরেই সুহাসিনীর নিদ্রাভঙ্গ হইল। চাহিয়া দেখিলেন, মুক্ত দ্বার দিয়া গৃহমধ্যে দিনের আলোক আসিয়াছে, টেবিলের উপর প্রজ্বলিত আলোক স্নান হইয়া আসিয়াছে, আর স্বামী তাহারি কাছে মাথা রাখিয়া পড়িয়া আছেন। প্রথমটা মনে হইল বুঝি সারারাত্রি নিথিয়া ক্লান্ত হইয়া এইভাবে বিশ্রাম করিতেছেন। সুহাসিনী আরও কিছুক্ষণ অপেক্ষা করিলেন, দেখিলেন স্বামী সেই ভাবেই পড়িয়া রহিলেন। ভাবিলেন, এই ভাবেই নিদ্রিত হইয়া পড়িয়াছেন। মনে অনুশোচনা জন্মিল—কেন সারারাত্রির মধ্যে একটীবারও স্বামীকে ডাকেন নাই।

সুহাসিনী উঠিয়া ধীরে ধীরে স্বামীর পাশে আসিয়া দাঁড়াইলেন। গায়ে হাত দিয়া ডাকিলেন, উঠে বিছানায় গিয়ে শোও, ওঠো, শুনছ ? পরক্ষণে দারুণ ও কঠিন সত্য বজ্রাঘাতের মত সুহাসিনীকে অভিভূত করিয়া দিল। ক্ষণপরে আর্তস্বরে চীৎকার করিয়া সুহাসিনী স্বামীর পদতলে মুচ্ছিতা হইয়া পড়িল।

চীৎকারের শব্দে ছেলেমেয়েদের ঘুম ভাঙিয়া গেল। ললিতিকা ও রামপ্রসাদ সর্বপ্রথম ছুটিয়া আসিল। পিতামাতাকে তদবস্থায় দেখিয়া তাহারা ক্ষণকাল স্তম্ভিত হইয়া রহিল। তারপর কাঁদিতে কাঁদিতে হুই জনেরই গায়ে হাত দিয়া ডাকিতে লাগিল। অল্প আঁতুতাতাৎই হুইজনে



বুঝিল মায়ের মুচ্ছা হইয়াছে, পিতা আর উঠিবেন না। দুইজনে চারিদিকে অকুল-পাথার দেখিল।

লতিকা উচ্ছ্বসিত ক্রন্দনের মধ্যেই বুদ্ধি করিয়া কহিল, রামু, শীগ্গির গিয়ে অমর-দাকে ডেকে নিয়ে আয়। রামপ্রসাদ অশ্রু মুছিতে মুছিতে অমরদের গৃহের উদ্দেশে ছুটিল।

তাঁহার পর অমর আসিয়া দুইজনের অবস্থা দেখিল। অমরের পিতা চন্দ্রনাথ উপস্থিত হইলেন। প্রতিবেশীরা ভিড় করিয়া দাঁড়াইল। ডাক্তার ডাকা হইল। তিনি আসিয়া সুহাসিনীর চৈতন্য সম্পাদন করিলেন। মনোহরের দেহ পরীক্ষা করিয়া বলিলেন, তাঁহার মৃত্যু ঘণ্টাখানেক কি কিছু বেশীক্ষণ হইয়াছে। হঠাৎ হৃদযন্ত্রের ক্রিয়া বন্ধ হওয়াই মৃত্যুর কারণ।

চৈতন্য হওয়ার পর হইতে সুহাসিনী স্তম্ভিত হইয়া রহিলেন। দেখিলে মনে হয় যেন তাঁহার কাঁদিবার শক্তি লোপ পাইয়াছে।

চন্দ্রনাথবাবু দাঁড়াইয়া থাকিয়া অস্ত্যেষ্টিক্রিয়ার সব ব্যবস্থা করিয়াছিলেন। গ্রামেরই কয়েকটি যুবক ও একজন প্রৌঢ় সংস্কারের ভার লইলেন। অমরও তাঁহাদের মধ্যে রহিল।

যাইবার আগে—অমর একখানি কাগজ লতিকার হাতে দিয়া কহিল, এখানি স্মারের চিঠি, রেখে দাও, আমরা বাইরে গেলে কাকীমার হাতে দিও। অধীর হোয়ো না। কথিকার হাতে থোকর ভার দিয়ে তুমি মাকে দেখো। মায়ের কাছে কাছে থেকো। আমি শীগ্গির ফিরে আসব।

মৃতদেহ লইয়া সকলে বাহির হইয়া গেল। ভূমিকম্পের অব্যবহিত পূর্বেও পুঞ্জীভূত উত্তপ্ত বারিরাশি অভ্যস্তরে লইয়া পৃথিবী যেমন শান্তমুখে চাহিয়া থাকে তেমনি সুহাসিনী অস্তুরে অবরুদ্ধ শোকরাশি লইয়া প্রস্তরমূর্তির

মত সেই দিকে একদৃষ্টে চাহিয়া রহিল। কথিকা যুথিকা কাঁদিয়া উঠিল, খোকাও না বুঝিয়া সে ক্রন্দনে যোগ দিল। লতিকা ও রামপ্রসাদ সজল নয়নে তাহাদের সাস্তনা দিতে লাগিল। সুহাসিনী উদাসদৃষ্টিতে একবার তাহাদের পানে চাহিলেন, আর একবার যদিকে এইমাত্র স্বামীর মৃতদেহ লইয়া গিয়াছে সেই দিকে চাহিলেন, তারপর ছুটিয়া মৃতদেহের অনুসরণ করিতে গিয়া ছুয়ারের ধাক্কা লাগিয়া সেইখানে হতচেতন হইয়া পড়িলেন।

লতিকা ও রামপ্রসাদ সর্বাগ্রে ছুটিয়া আসিয়া মাতার লুণ্ঠিত সংজ্ঞাহীন দেহ ধরাধরি করিয়া কক্ষমধ্যে আনিল। তারপর মাথায় জল ও বাতাস দিয়া তাঁহার চৈতন্য সম্পাদনে চেষ্টা করিতে লাগিল।

কিয়ৎক্ষণ পরে সুহাসিনী চক্ষু মেলিয়া চাহিলেন ও ধীরে ধীরে উঠিয়া বসিলেন। রাত্রিকার শয্যা, টেবিলের উপরকার ইতস্ততঃ বিক্ষিপ্ত কাগজ-পত্রাদি, পুত্রকণ্ঠাদের উদ্বিগ্ন সজল নয়ন দেখিয়া সব কথা মনে পড়িল। লতিকা সময় বুঝিয়া অমরনাথের দেওয়া সেই পত্রখানি মায়ের হাতের কাছে আনিয়া কাতর কণ্ঠে কহিল, ‘বাবা শেষ পত্রখানি তোমাকে লিখে গেছেন। একটীবার পড়ে দেখ মা।’

সুহাসিনীর মনে পড়িল কাল কত কঠিন কথা স্বামীকে বলিয়াছিলেন ; তাহা ভুলিতে না পারিয়া সেই সব উল্লেখ করিয়াই বুঝি তিনি এই পত্রে অহুযোগ করিয়া গিয়াছেন। তিনি কম্পিত হস্তে কণ্ঠার হস্ত হইতে পত্র লইয়া মনে মনে পড়িতে লাগিলেন।

সুহাসিনী,

আমাকে ঃক্ষমা করিও। রাগ করিয়া যাহা বলিয়াছি তাহা আমার অন্তরের কথা নহে। তোমার নিঃস্বার্থ প্রেমপূর্ণ হৃদয়

আমি জানি। আজ শেষক্ষণে—তোমার মধুর হৃদয়ের অন্তস্তল পর্যন্ত আমি দেখিতে পাইতেছি। সেখানে বিন্দুমাত্র স্বার্থ নাই। আছে শুধু পরিপূর্ণ প্রেম ও স্নেহ। বুকের মধ্যে অসহ যন্ত্রণা হইতেছে। হয়ত আর দেখা হইল না। কিন্তু জানিও, বিশ্বাস করিও তোমার প্রতি অবিচল প্রেম লইয়া—আমি চলিলাম। আমার কঠিন বাক্য, তিক্ত ব্যবহার ক্ষমা করিও। অভাব, দুঃখ, দৈন্ত তোমার প্রতি আমার প্রেমকে আড়াল করিয়াছিল মাত্র—তাহাকে মলিন বা নষ্ট করিতে পারে নাই। তোমার উপর আমি পুত্রকণ্ঠাদের ভার দিয়া অনিচ্ছায় চলিলাম। যতদিনেই হউক আবার তোমার সঙ্গে দেখা হইবে।

মনোহর

যাহাতে অনুযোগ, ভৎসনা, হয়ত বা কতকগুলো কটু ও কঠোর কথা পাইবেন ভাবিয়াছিলেন তাহাতে এমন অটল বিশ্বাস, ও এমন গভীর প্রেমের স্নিগ্ধ ও সরল অভিব্যক্তি পড়িয়া! সুহাসিনীর দুঃখদৈন্ত-কঠিন হৃদয় দ্রব হইয়া গেল এবং অন্তরের অপরূপ শোকরাশি উদ্বেলিত হইয়া নেত্রপথে অশ্রুপ্লাবন ভরিয়া আনিল।

তখন লতিকাকে হুই হাতে কোলের মধ্যে জড়াইয়া ধরিয়া সুহাসিনী উচ্ছ্বসিত কণ্ঠে কাঁদিয়া উঠিলেন। বৃষ্টি এতক্ষণে শান্তি মিলিল।

স্কুলে কয়দিনের বেতন পাওনা ছিল, ছেলে পড়ানোর টাকাও কিছু বাকি ছিল, এবং নরহরি একবৎসরের হিসাব ৭৫৯ টাকার পরিবর্তে আপনা হইতে আসিয়া একশত টাকা দিয়া গেল। তাহাতেই চন্দ্রনাথের পরামর্শে অল্পে শ্রদ্ধ সারিয়া মাসখানেকের খরচের উপযোগী টাকা হাতে রহিল। সংবাদ পাইয়া রামপ্রসাদের জ্যাঠাও আসিয়াছিলেন। শ্রদ্ধের পর তিনি চলিয়া গেলেন। বলিয়া গেলেন, এখানকার কাজ কর্ম সব মিটাইয়া দেশে ফিরিয়া যাওয়াই ভাল। আর এখানে থাকিয়া কি হইবে ?

সংসারের কর্তার মৃত্যু হইলে সর্বপ্রথম এই সংবাদেরই প্রয়োজন হয় যে তিনি কি পরিমাণে অর্থ রাখিয়া গিয়াছেন। যতই অকাব্য হউক, ইহাকে অস্বীকার করিবার উপায় নাই ; কারণ মানুষ মাত্রেরই সর্বপ্রথম কাষ তাহার বাঁচিবার চেষ্টা।

চন্দ্রনাথবাবু যেদিন লতিকার সহিত অমরের বিবাহের প্রস্তাব প্রত্যাখ্যান করিয়াছিলেন সেই রাত্রেই মনোহরের মৃত্যু হয়। ইহাতে চন্দ্রনাথবাবুর মনে বড়ই ক্ষোভ হইয়াছিল। কি উপায়ে—এই হতভাগ্য পরিবারের কিঞ্চিৎ উপকার করেন, কি করিয়া এতগুলি ছেলেমেয়ের অন্নবস্ত্র সংস্থানের ব্যবস্থা করিয়া দিতে পারেন—ইহাই তাঁহার চিন্তা হইয়াছিল। তাঁহারই উপদেশ মত—শ্রদ্ধের পরদিন অমর আসিয়া সুহাসিনীকে বলিল—বাবা বলে

দিলেন, এখন কি করে সংসার চলবে তাই ভাবার দরকার। শ্রীর টাকাকড়ি কিছু রেখে গেছেন কিনা, দেশে বিষয়-আশয় কিছু আছে কিনা, ঘর বাড়ীই বা কি রকম, বাবা তাই জানতে চেয়েছেন। আপনি কিন্তু এতে ছঃখ করবেন না, কাকীমা ; বাবা বিশেষ করে এই কথা বলে দিয়েছেন।

সুহাসিনী বিগলিত অশ্রু মুছিয়া বলিলেন, ছঃখ যে এখন ভগবান্ সহিতেই দিয়েছেন, বাবা। দেশে বিষয়-আশয় যা আছে তা অতি সামান্য। বাড়ীঘর যে রকম তাতে বাস করা চলে।

অমর জিজ্ঞাসা করিল, তার দাম কত হতে পারে ?

সুহাসিনী বলিলেন, অর্ধেক অংশের দাম এক হাজার টাকা হতে পারে।

অমর একটু সঙ্কোচের সহিত বলিল, লাইফ ইন্সিওর ছাড়া আর কোন টাকা বোধ হয় রেখে যেতে পারেন নি ?

সুহাসিনী নিশ্বাস ফেলিয়া বলিলেন, সংসারই কষ্ট-সৃষ্টে চলত। লাইফ ইন্সিওর কোথা থেকে করবেন ?

অমর সবিস্ময়ে জিজ্ঞাসা করিল, শ্রীরের লাইফ ইন্সিওরেন্স ছিল আপনি জানতেন না কাকীমা ? মায়ের বাক্সটা একবার খুলে দেখ তো লতু,—নিশ্চয়ই পলিসিখানা তাতেই পাওয়া যাবে।

লতিকার কাছেই চাবি ছিল। সে উঠিয়া বাক্সটা খুলিয়া দেখিতে গেল। একটু পরে সত্য সত্যই একখানি পলিসি লইয়া ফিরিয়া আসিল। অমর লতিকার হাত হইতে সেখানি লইয়া পড়িয়া বলিল, শ্রীর পাঁচ হাজার টাকার ইন্সিওরেন্স করে গেছেন। এই মাইনে থেকে যে তিনি এই

ব্যবস্থা করে যেতে পারবেন তা ভাবিনি। কাকীমাকেই nominee করে গেছেন। টাকা তোলবার কোন অসুবিধা হবে না।

কথাটা খুব বড় বা বেশী নহে। একজন স্ত্রীর নামে পাঁচ হাজার টাকা জীবন বীমা করিয়া গিয়াছেন। ইহাতে বিশেষত্বই বা কি? কিন্তু কি করিয়া, কত দুঃখ—কত লাঞ্ছনা সহিয়া, দিবারাত্রি কি কঠিন পরিশ্রম করিয়া স্বামীকে এই টাকার সংস্থান করিতে হইয়াছে তাহা সুহাসিনীই জানেন। তাঁহার মনে পড়িল মৃত্যুর দিনেই তাঁহার একটা কঠিন কথার উত্তরে স্বামী বলিয়াছিলেন, নিজের দরকার কি কার দরকার যেদিন জান্বে সেদিন বুঝবে। আজ সে কথা সুহাসিনী মর্মে মর্মে বুঝিয়াছে। তাহার চক্ষু ফাটিয়া জল আসিল—কণ্ঠ বাষ্পরুদ্ধ হইল।

সুহাসিনীকে নিরন্তর দেখিয়া অমর তাঁহাকে সাহস দিবার অভিপ্রায়ে কহিল, প্রতিডেও ফণ্ডে ছয়শ টাকার কিছু উপর আছে। আপাততঃ তাই থেকে সাবধানে খরচ চালাতে হবে। আমরা ভেবেছিলাম শ্রার বড় জোর এক হাজার টাকার ইন্সিওরেন্স করে গেছেন। বাবা কালও বলছিলেন, কি ব্যবস্থা করতে পারলে রামু মানুষ হওয়া পর্য্যন্ত কষ্টে-মৃষ্টে চলে যায়। এখন মনে হচ্ছে সে রকম ব্যবস্থা করা কঠিন হবে না।

শ্রারের বই দুখানা থেকেও কিছু সংস্থান হবে আশা করা যায়। Noteখানা আমার জানা-শোনা এক প্রকাশকের কাছে পাঠিয়ে দিয়েছি। তাদের পছন্দ হয়েছে—ছাপাবে বলেছে। আর Text bookখানি শ্রার সমস্ত প্রাণ দিয়ে লিখেছেন। অতি সুন্দর হয়েছে। এখানি কোন নামজাদা প্রকাশককে দিতে হবে! বাবাকে আমি এই খবরটা দিয়ে আসি।

বলিয়া অমর ধীরে ধীরে উঠিয়া পড়িল।

অমর কক্ষ হইতে নিষ্ক্রান্ত হইবামাত্র সুহাসিনী উঠিয়া ছয়ার বন্ধ করিয়া মেঝের উপর লুটাইয়া পড়িয়া কাঁদিতে লাগিলেন। লৌহ-শলাকার মত এই চিন্তা তাঁর হৃদয়ের মধ্যে বাজিতে লাগিল। তুমি এই হতভাগিনীর জন্ত এত ভাবিয়াছ, এত পরিশ্রম করিয়াছ অথচ একটা দিনের জন্ত কথাটা বল নাই কেন? আমি যে তোমাকে কত কঠিন কথা বলিয়াছি; নিজের ছুঃখের কথা ভাবিয়া তোমার ছুঃখের কথা যে একটা বারের জন্তও মনে করি নাই। যখন তুমি সংসারের কথা ভাবিয়া সারা হইতেছ তখনও তুমি ঘোর উদাসীন এই কথা মনে করিয়া তোমার প্রতি ঘোরতর অবিচার করিয়াছি। আমি কি করিয়া তোমার বুকের রক্তে সংগৃহীত অর্থে এই তুচ্ছ হীন জীবন ধারণ করিব! এ অভাগিনীকে এত ভালবাসিয়া শেষে তাহাকে এমন শাস্তি দিয়া গেলে কেন?

[ ১৪ ]

আর মাসখানেকের মধ্যেই জীবনবীমার টাকা সব পাওয়া গেল। চন্দ্রনাথবাবু সুহাসিনীর নামে ৩০০০৮ তিন হাজার টাকার কোম্পানীর কাগজ কিনিয়া দিলেন, দেড় হাজার টাকা নিকটবর্তী একটি পিপ্‌ল্‌স্ ব্যাঙ্কে নির্দিষ্ট কালের জন্ত বেশী সুদে রাখিলেন ও পাঁচশত টাকা সুবাসপুরের এক ধর্মভীরু ব্যবসায়ীকে শতকরা ১৮ এক টাকা সুদে ঋণনোটে ধার দেওয়া হইল। এইভাবে মাসিক প্রায় ৩০৮ টাকা



আয়ের ব্যবস্থা হইল। ইহাতে কষ্টে-সৃষ্টে সংসার চলিতে পারে বটে, কিন্তু ১০৮ টাকা বাড়ীভাড়া দিয়া থাকা সম্ভবপর নহে। তাহার উপর নিজেদের যে রকমই হউক একটা বাড়ী থাকিতে এ অবস্থায় পরের বাড়ীতে থাকিয়া কি লাভ? ব্যয়-সঙ্কোচ চিরদিনই ছিল, এখন আরও সঙ্কোচ করিতে হইবে। চন্দ্রনাথবাবু দেশে গিয়া থাকিতে পরামর্শ দিলেন। সুহাসিনীও তাহা যুক্তিযুক্ত মনে করিলেন। অমরের ছুটিও ফুরাইয়া আসিয়াছিল। স্থির হইল অমর উহাদের দুর্গাপুর পৌছাইয়া দিয়া কলিকাতা যাইবে।

মাত্র একজনের অভাবে আজ এত বৎসরের বাসস্থান—এতদিনকার গৃহ এমনি করিয়া চিরদিনের মত ছাড়িয়া যাইতে হইতেছে। কত আশা বুকে করিয়া সুহাসিনী এই গ্রামে প্রবেশ করিয়াছিলেন। সে আশার কতটুকু পূর্ণ হইয়াছিল—কতটুকুই বা অপূর্ণ ছিল তাহার হিসাব না থাকিলেও যে নিরাশার মাঝে তাহাকে বিদায় লইতে হইতেছে তাহার যে শেষ নাই! হউক পরের গৃহ—তবু এই গৃহের মাঝে কত শত স্মৃতি জড়িত আছে। যে স্মৃতি তখন সুখের বলিয়া একটিবারও বুঝা যায় নাই। কিন্তু আজ তাহা হইতে দূরে আসিয়া সে তাহার সত্যকার মূর্তি দেখিতে পাইরাছে। চোখের জলে ভাসিতে ভাসিতে সুহাসিনী সুবাসপুর ত্যাগ করিলেন। এতকাল পরে আবার সেই দুর্গাপুর ফিরিলেন।

অমরের সহিত লতিকার বিবাহের প্রস্তাব যে চন্দ্রনাথবাবু খুব ভদ্রভাবে প্রত্যাখ্যান করিয়াছেন তাহা অমর ও লতিকা দুইজনেই জানিত; কিন্তু এতদিন দুজনের কেহই সে প্রসঙ্গের কোন উল্লেখ করে নাই। দুর্গাপুরে একদিন থাকিয়া অমরের কলিকাতা যাইবার কথা। সুহাসিনীর অনুরোধে



অমরকে আরও একদিন থাকিতে হইল। যাইবার দিন অমর সুহাসিনীকে একা পাইয়া বলিল, বাবা আপনাকে একটা কথা বলতে বলেছেন।

সুহাসিনী বলিলেন, কি কথা বল।

অমর মাথা নীচু করিয়া বলিল, লতুর বিয়ের সম্বন্ধ বাবা দেখবেন, আপনাকেও দেখতে বলেছেন। আরও বলেছেন লতুর বিয়ের খরচ বাবা দেবেন। আপনি সেজন্য মনে কিছু ভাববেন না। এ খরচ আপনাকে নিতেই হবে।

সুহাসিনী বলিলেন, তাঁর কোন্ জিনিষটা নিইনি বাবা মাথায়। তোমরা ছাড়া আমাদের এখন আর আপনার কে আছে? এখানে কেই বা আমাদেরকে দেখবে? আর ভাল পাত্র কোথায় বা পাব? তাঁকে বোলো তিনিই যেন দয়া করে একটু সম্মান করেন।

সঙ্গে সঙ্গে আর একদিনের একটা আশার কথা ভাবিয়া একটা নিশ্বাস ফেলিলেন। ভাবিলেন তেমনি যদি হইবে তো ভগবান্ এমন কেন করিবেন।

লতিকার সহিত দেখা করিয়া অমর বলিল, আমি যাচ্ছি লতু। ঠিকানা বলিল, চিঠি দিও। আমি তোমাকে সেদিন যে কথা বলেছিলাম সে সৌভাগ্য আমার অদৃষ্টে নেই। সে কথা তুমি ভুলে যাও। সব কথা হুঁই শুনো। আমায় ক্ষমা করো।

যে ক্ষমা করিবে সে তখন চোখের জলে ভাসিতেছিল। তাহার অশ্রুপ্লাবিত মুখের পানে ক্ষণকাল গভীর হৃৎখের সহিত চাহিয়া অমর বলিল, লতু, তুমি কাতর হোয়ো না। তোমার উপর এখন কত বড়

ভার ভেবে দেখ। তুমি ভেঙ্গে পড়লে কি করে চলবে? স্মার তোমাকে কত যত্নে কত আশায় নিজে শিক্ষা দিয়েছেন। তাঁর সে শিক্ষা ভুলো না।

লতিকা অশ্রু মুছিয়া ধীরে ধীরে বলিল, বাবার শিক্ষা আমার চিরকাল মনে থাকবে। তাঁর সব ইচ্ছা আমি ঈশ্বরের বিধান বলে মেনে নিচ্ছি। তাঁর ইচ্ছা ছিল দরকার হলে আমি যেন স্বাবলম্বন গ্রহণ করতে পারি। এখন তাই দরকার হয়েছে। আমি তাই গ্রহণ করব। আমাকে তুমি একটা কাজ খুঁজে দাও—আমি সেই কাজ নিয়ে থাকব আর ছোট ভাইবোনদের মানুষ করব। আমি যেমন আছি তেমনি থাকব। তুমি আমায় আশীর্বাদ করে যাও, আমি যেন নিজের ধর্ম রাখতে পারি আর বাবার অতি ক্ষুদ্র ইচ্ছাটি পর্যন্ত যেন পূর্ণ করতে পারি।

বলিয়া লতিকা নতজানু হইয়া অমরকে প্রণাম করিল। তারপর উচ্ছ্বসিত ক্রন্দনের বেগ সম্বরণ করিতে না পারিয়া দ্রুতবেগে সে কক্ষ পরিত্যাগ করিল।

দীর্ঘনিশ্বাস ফেলিয়া সজল নয়নে অমর কলিকাতা যাত্রা করিল। হৃৎক ও নিরাশার ভারে তাহার হৃদয় ভাঙিয়া পড়িতেছিল। তথাপি কোথা হইতে পিককণ্ঠের সঙ্গীতের মত তাহার ব্যথিত হৃদয়ে আনন্দের স্পর্শ জাগিতেছিল তাহা সে বুঝিয়া উঠিতে পারিতেছিল না।

অমর কলিকাতা পৌঁছিবার একদিন পরেই অপ্রত্যাশিতভাবে লতিকার একখানি পত্র পাইল। পরম আগ্রহভরে পত্রখানি খুলিয়া অমর রুদ্ধ নিশ্বাসে পড়িল,—

শ্রীচরণে,

তোমার সাক্ষাতে একটা কথা বলিতে পারি নাই। আজ তাহা লিখিয়া জানাইতেছি।

বাবা আমাকে তোমার হাতে দিবার সংকল্প করিয়াছিলেন। তুমি একদিন হয়ত ভালবাসিয়া আমার এই আভরণশূণ্য মলিন ও মাধুর্যবিহীন হাত তোমার মধুর সুন্দর দেবছল্লভ হাত ছুথানির মধ্যে লইয়াছিলে। সেদিন হইতে আমি জানিয়াছি ও কায়মনো-বাক্যে বিশ্বাস করিয়াছি, তুমি আমাকে গ্রহণ করিয়াছ। এখন লোকচক্ষে তুমি আমাকে পরিত্যাগ করিলেও বা আর কাহাকে গ্রহণ করিলেও আমার সে বিশ্বাস ত জীবনে বিন্দুমাত্র শিথিল হইবে না।

ইতার পর, আশা করি, তুমি আমার 'ব্যবস্থা' করিবার জন্ত আর ব্যস্ত হইবে না। আমার প্রণাম জানিও।

তোমার চিরজীবনের সেবিকা  
লতিকা :

পত্র পড়া শেষ হইয়া গেল। তবুও বহুক্ষণ অমরের অশ্রুসজল দৃষ্টি পত্রের উপর নিবদ্ধ রহিল। মন চলিয়া গেল দূর অতীতের মধ্যে যে দিন সে লতিকার অমল-কোমল, সর্বমাধুর্যমণ্ডিত হাতখানি বড় ভালবাসিয়া আপনার হাতের মধ্যে লইয়া জীবনের প্রথম প্রণয়বাণী বলিয়াছিল ও বাহাকে বলিয়াছিল সেও বিপুল বিস্ময় ও অপূর্ব আনন্দে অধীর হইয়া আপনার হৃদয়ের ছুরু ছুরু শব্দের মাঝে জীবনে এই প্রথম প্রেমের অমৃত-মধুর বার্তা শুনিয়াছিল।

সুহাসিনীদের বাড়ী আসা লইয়া মনোহরের দাদা কেদার ও তাঁহার স্ত্রীর মধ্যে বচসা হইয়া গিয়াছিল। কেদারের স্ত্রী আশঙ্কা করিয়াছিলেন যে ছেলেমেয়ে লইয়া সুহাসিনী আবার তাহাদের ঘাড়ে আসিয়া পড়িবে। কিন্তু বাড়ীতে আসিয়া যখন তাহারা শুধু তাহাদের বাড়ীর অংশ লইয়া পৃথক্ আহারাদির ব্যবস্থা করিল তখন অশান্তির আশঙ্কা অনেকটা কমিয়া গেল। এমন কি কেদারের স্ত্রী নিরাপদে এ কথাটাও কয়েকদিন বলিলেন, আগেকার মত এক সঙ্গে থাকলেই হ'ত, বিশেষ যখন ঠাকুরপো নেই।

দু-পাঁচ টাকা যা আছে বাঁচত। মেয়েগুলোর বিয়েও দিতে হবে। সুহাসিনী অবশ্য সেটা মাত্র মুখেরই কথা মনে করিয়া লইয়াছিলেন এবং নিজের সংসার নিজেই কষ্টে-স্বষ্টে চালাইতে লাগিলেন। কাজেই সংসার অশান্তির হাত হইতে অনেকটা বাঁচিয়া গেল।

গোলযোগ ঘটিল লতিকাকে লইয়া। লতিকার বয়স সতেরো পার হইয়াছিল ও সে ম্যাট্রিক পাশ করিয়াছিল। তাহার উপরে বিবাহের কোন কথাবার্তা হইতেছিল না।

প্রতিবেশীদের কথায় এবং স্ত্রীর গল্পনার কেদার ২।১টা সম্বন্ধ আনিয়া হাজির করিল। কিন্তু তাহারা আসিয়া শুধু মিষ্টান্ন খাইয়াই চলিয়া গেল। লতিকা কিছুতেই তাহাদের সম্মুখে বাহির হইল না। শেষে কেদারকে

বলিতে হইল মেয়ের জ্বর হইয়াছে। তারপর তিনি রাগ করিয়া এ চেষ্টা ত্যাগ করিলেন।

সুহাসিনী লতিকাকে বলিলেন, এ রকম জিদ করলে কি করে চলবে মা? মেয়ে মানুষ হয়ে যখন জন্মেছিম্ তখন বিয়ে তো করতেই হবে। অনর্থক এ লোকনিন্দা কেন মা?

লতিকা বলিল, তুমি তো জান মা, বাবার ইচ্ছা ছিল যে যদি দরকার হয় আমি যেন নিজের ভার নিজে নিতে পারি। বাবার অবর্তমানে সে দরকার আরও বেশী হয়েছে। রামু এখনও ছেলে মানুষ; খোকার কথা তো ছেড়েই দাও। ওদের সব লেখাপড়া শেখাতে হবে। কথিকা, যুথি সবারই ভার তোমার উপর। এ সময়ে তোমাকে ছেড়ে যাওয়া কি উচিত মা? আমি কাছে থাকলে তোমার কি একটু ভাল লাগবে না?

সুহাসিনী স্নেহস্বরে বলিলেন, তুই তো সংসারের সবই কচ্ছিস মা! আমি তো আজকাল কিছুই পারিনে কত্তে। তুই গেলে কি করে সংসার চলবে এই ভেবে আমি সারা হচ্ছি। কিন্তু তোকে তো যেতেই হবে মা!

লতিকা বলিল—কেন হবে মা? আমি যদি তোমার ছেলে হতাম তাহলে কি তোমায় এ সময়ে ফেলে চলে যেতাম?

সুহাসিনী বলিলেন, তা যেতিস্ নে। কিন্তু ছেলের এক পথ—মেয়ের যে আর এক পথ মা! বিয়ে হলেই যে তুই আমাকে দেখতে পারবি নে তারই বা ঠিক কি? তখন হয়ত আরও ভাল করে পারবি।

লতিকা বলিল, সে কথা বল না, মা। ক'জন মেয়ে বিয়ের পর তাদের মা বাপকে দেখতে পারে বলত? ছেলের পিতৃ-মাতৃ-ভক্তি বড় গুণ, কিন্তু মেয়ের বেলায় তা দোষ হয়ে দাঁড়ায়। মা বাপকে যে যত ভুলতে পারবে, সে তত ভালো বোঁ হবে—তা তো জান, মা।

সুহাসিনী একটু গম্ভীর হইয়া জিজ্ঞাসা করিলেন, তাহলে তুই কি করতে চাস্ স্পষ্ট করে বল।

লতিকা বলিল, দুটো বছর পরে রামু ম্যাট্রিক দেবে। এখন থেকে চেষ্টা করিলে যুথিও দিতে পারে। তখন কি মা এই ২৫ টাকায় চলবে! না, পরসার অভাবে রামু লেখাপড়া শিখতে পাবে না—সেই ভাল হবে? আমি আস্ছে বছর আই-এ দেব। দিয়ে একটা কাজের চেষ্টা করব। যদি ২৫ টাকাও আনতে পারি রামুর কলেজের খরচ চলবে।

সুহাসিনীর চোখে জল আসিল। বলিলেন, তাহলে তোর জীবনে কি হ'ল মা? তোর জীবন যে একেবারে ব্যর্থ হ'য়ে গেল।

লতিকা মায়ের চোখের জল মুছিয়া বলিল, কেন ব্যর্থ হবে মা? সংসারে কতজন পরের জন্ত পরিশ্রম করছে—ত্যাগ করছে। কোন মেয়ে যদি বিয়ে না করে মা বাপের সেবা করে তাতেই তার জীবন কেন সার্থক হবে না মা? আমি ত চুপ করে বসে থাকতে চাইছি না।

সুহাসিনী মেয়েকে কোলের কাছে টানিয়া বলিলেন, মায়েরও তো মেয়ের উপর কর্তব্য আছে। মায়েরও তো মেয়ে-জামাই নিয়ে সংসার করতে সাধ যায়।

লতিকা বলিল, সে সাধ তুমি কথিকে নিয়ে—যুথিকে নিয়ে মিটিও-  
মা। আমার তুমি ছেলের মত তোমার সেবা করবার অধিকার-দাও,  
তাতেই আমার সুখ হবে। তোমার কাছ থেকে আমার সরিয়ে দেবার  
চেষ্টা করো না।

মায়ের বুকের উপর মাথা রাখিয়া বলিতে বলিতে লতিকা কাঁদিয়া  
ফেলিল। সুহাসিনী কন্ঠার মাথায় ধীরে ধীরে হাত বুলাইয়া সজল  
নয়নে তাহাকে সান্ধনা দিতে লাগিলেন।

[ ১৩ ]

পর বৎসর লতিকা প্রথম বিভাগে আই-এ পাশ করিল। ইহার  
কয়েক মাসের মধ্যেই পূর্ববঙ্গের একস্থানে সে বালিকাদের মধ্য-  
ইংরাজী স্কুলের প্রধান শিক্ষিকত্রীর পদ পাইল। সংবাদপত্রে বিজ্ঞাপন দেখিয়া  
সে সাধারণ ভাবে আবেদন পাঠাইয়াছিল। যে দিন তাহার নামে ৪০৮  
টাকা বেতনের নিয়োগ পত্র আসিল সেদিন আর তাহার আনন্দের  
অবধি রহিল না। এতদিনে সে তাহার ছুঃখিনী মাকে সত্যকার  
সাহায্য করিতে পারিবে, ছোট ভাই বোনদের খাইবার পরিবার ছুঃখ  
কিছু দূর করিতে সমর্থ হইবে। রামুর উচ্চশিক্ষার ব্যবস্থাও বোধ  
হয় হইবে।

অজানা নূতন পথে চলিতে হইবে ; নূতন স্থানে অজানা লোকের সঙ্গে পরিচয় করিতে হইবে, নূতন অভিজ্ঞতা লাভ করিতে হইবে, নূতন অভিজ্ঞতা লাভ করিয়া নূতন কার্যে ব্রতী হইতে হইবে। কত লোকে গম্ভ বলিবে—নিন্দা করিবে। তথাপি এই পথই তাহাকে গ্রহণ করিতে হইবে।

লতিকা এই বয়সে চাকরি করিতে যাইবে শুনিয়া কেদার রুষ্ট হইলেন, কেদারের স্ত্রী কথা বন্ধ করিলেন, প্রতিবেশীরা নানা কথা বলিতে লাগিল। এই অপ্রসন্নতার মধ্যে রামপ্রসাদকে সঙ্গে লইয়া লতিকা মাতার আশীর্বাদ ও আপনার মনের বল সম্বল করিয়া কার্যস্থানে যাত্রা করিল।

নূতন স্থানে পৌঁছিয়া লতিকা দিন দুই একটু অগ্ৰমণা হইয়া রছিল। বিদ্যালয় সংলগ্ন বাসগৃহ ও একটি দাসী পাওয়া গেল। একটি বৃদ্ধ ভৃত্য রক্ষণাবেক্ষণের কাজ করিবার উপযুক্ত। বিদ্যালয়ে আরও দুইজন শিক্ষয়িত্রী আছেন, একজন বৃদ্ধ শিক্ষক আছেন যিনি বহু বৎসর হইতে ছোট ছোট মেয়েদের স্থানীয় জমিদারের একটা বড় দালানে পড়াইতেন।

লতিকা শুনিল এই বিদ্যালয়ের যিনি প্রতিষ্ঠাতা তিনি নানা দেশ ঘুরিয়া সম্প্রতি ফিরিয়াছেন। অতি সম্ভ্রম লোক, সাধু প্রকৃতি। তাঁহারই টাকায় বিদ্যালয়ের সব। তিনি নিজ ব্যয়ে বিদ্যালয়ের গৃহ নির্মাণ করিয়া দিয়াছেন ; যথেষ্ট নগদ টাকাও স্কুলের নামে জমা করিয়া দিয়াছেন ; বাহার স্ক্রু ও গবর্ণমেণ্টের সাহায্যে বিদ্যালয় চলিয়া থাকে। ইহা ছাড়া সরকার হইলেই বিদ্যালয়ের মঙ্গলের জন্ত এখনও টাকা দিয়া থাকেন।



এত করিয়াও বিদ্যালয়ের কর্তৃত্বভার তিনি কমিটির উপর স্বেচ্ছায় ছাড়িয়া দিয়াছেন। কিন্তু কমিটির একান্ত আগ্রহে তাঁহাকে প্রেসিডেন্ট থাকিতে হইরাছে। এই বিদ্যালয়ের উপর তাঁহার এমন একটা আন্তরিক আকর্ষণ আছে যে অর্থসাহায্য ছাড়াও যখন যে সাহায্যের প্রয়োজন হয়, তাহা দিবার জন্ত তিনি সর্বক্ষণ প্রস্তুত রহিতেন। বিদ্যালয়ে শিক্ষয়িত্রীদের জন্ত শিক্ষা সম্বন্ধীয় ভাল ভাল বই, ছাত্রীদের জন্ত চিত্তাকর্ষক ও সুন্দর আদর্শ সম্বলিত পুস্তক দিয়া যাইতেন; স্ত্রীশিক্ষার জন্ত যাহা তিনি অন্তরে উপলব্ধি করিতেন শিক্ষক শিক্ষয়িত্রীদিগকে তাহা অসঙ্কোচে বলিতেন।

বৃদ্ধ শিক্ষকটি লতিকার অল্প বয়স, স্নিগ্ধ মূর্তি ও বিনয় কথাবার্তা দেখিয়া আপনা হইতে বলিলেন, মা, আপনি একটবার আশুতোষবাবুর সঙ্গে আজই দেখা করে আসুন। তিনি এখন এখানে আছেন, আবার হয়ত চলে যেতে পারেন। বিদ্যালয় সম্বন্ধে তাঁর কাছে আপনি অনেক দরকারী উপদেশ পাবেন।

লতিকা বলিল, আপনি যদি সঙ্গে করে নিয়ে যান দয়া করে তো ভাল হয়।

বৃদ্ধ বলিলেন, বেশ আজ ছুটির পর গেলেই হবে। তাঁর বাড়ী তো এই কাছেই।

বিদ্যালয়ের ছুটির পর রামপ্রসাদকে সঙ্গে করিয়া বৃদ্ধ শিক্ষকের সঙ্গে লতিকা আশুতোষবাবুর গৃহের উদ্দেশে বাহির হইল। বাড়ীর সংলগ্ন বাগানে তিনি তখন গাছপালার তত্ত্বাবধান করিতেছিলেন। কোন গাছটিতে জল দিতেছিলেন, কোন গাছের তলাকার মাটিটা আনুগা করিয়া দিতেছিলেন, কোন গাছের নীচে পাতা পরিষ্কার করিতেছিলেন। বৃদ্ধ

শিক্ষকের সঙ্গে লতিকাকে দেখিয়া তিনি হাতের কাজ ফেলিয়া তাঁহাদের অন্ত্যর্থা করিলেন। আশুতোষবাবু নিকটবর্তী গাছের তলায় আসন জানাইয়া তাহাদের বসাইলেন। তারপর নিজেও একটি আসনে বসিয়া বৃদ্ধ শিক্ষকের পানে চাহিয়া বলিলেন, পণ্ডিতমশায়, এইটি বুঝি আমাদের নূতন বড় মা ?

পণ্ডিতমহাশয় বলিলেন, আজে হ্যাঁ। এঁর বয়স অল্প, নতুন জায়গায় এসে ভাবনাও একটু হচ্ছিল—সেজন্ত আপনার সঙ্গে একবার দেখা করতে নিয়ে এলাম।

আশুতোষবাবু স্নিগ্ধকণ্ঠে বলিলেন, তার কত ভাবনা কেন মা ? এখানে তোমার কোন অসুবিধা হবে না।

লতিকা বলিল, আমি এবার আই-এ পাশ করেছি। শিক্ষয়িত্রীর কাজে কোন অভিজ্ঞতা আমার নেই। শিক্ষা সম্বন্ধে আপনার অসীম জ্ঞান। সেজন্ত আপনার কাছে উপদেশ নিতে এসেছি যাতে করে আমাকে যে কাজের জন্ত নিযুক্ত করেছেন বেন তার উপযুক্ত হতে পারি।

আশুতোষ। তা তুমি হবে মা। তোমার মুখ দেখেই আমি বুঝেছি। তোমার দরখাস্তে তুমি সব কথা প্রকাশ করে লিখেছিলে। তুমি শিক্ষকের মেয়ে। কি করে বাপের বড়ে ও নিজের চেষ্টার পাশ করেছ—এ সব পড়েই তো আমার মনে হ'ল তুমি একাজ পারবে। এখন তোমাকে দেখে সে বিশ্বাস আমার দ্বিগুণ হয়েছে।

লতিকা। শিক্ষা সম্বন্ধে যে সব বই আপনি স্কুলে দান করেছেন সে সব আমি পড়ব। আপনার উপদেশ মত চলব। মেয়েদের কল্যাণের চিন্তা ও নিজের জ্ঞানার্জনের চেষ্টা করব।

আশুতোষ । তাহলে সব ঠিক হয়ে যাবে । মনের প্রবল ইচ্ছাই হচ্ছে সব চেয়ে বড় জিনিষ । কাজে থাকলে কাজের পদ্ধতি জানতে দেরী হবে না ।

লতিকা । আমাকে আপনি নিজের মেয়ের মত একটু স্নেহের চক্ষে দেখবেন এই আমার প্রার্থনা ।

আশুতোষ । তোমাকে আমি মেয়ের মতই দেখব মা ; কাজেই একটু স্নেহের চক্ষে দেখলে তো চলবে না । একটু বেশী যতখানি এই অক্ষম বৃদ্ধের পক্ষে সম্ভব হয়; ততখানি স্নেহের চক্ষেই দেখব । তুমি তো জাননা মা কেন ভগবান আমার মত লোকের মাথায় এই নারী প্রতিষ্ঠানের চিন্তা দিলেন ।

সন্ধ্যা হয়ে এল । তুমি একটু বসবে চল মা । বৃদ্ধ শিক্ষক বলিলেন, আমার অগ্রত্ব একটু কাজ আছে এখন । আমি এখন যাই । আবার ষণ্টাদেড়েক পরে এসে নিরে যাব । আশুবাবু বলিলেন, তা যদি সুবিধা হয় আসবেন । না হয় আমি নিজেই মাকে পৌঁছে দেব ।

পণ্ডিত মহাশয় বিদায় লইলেন । আশুবাবু উঠিয়া সম্মুখস্থ পুষ্পপাত্র আনিলেন ও অতিথয়ে মমতার সহিত স্নেহবর্ধিত ফুল গাছগুলি হইতে কতকগুলি ফুল তুলিয়া লতিকার সহিত একটি কক্ষে আসিলেন । কক্ষমধ্যে দেওয়ালে কয়েকখানি তৈলচিত্র ছিল । সর্বোপরি জগদ্ধাত্রী মূর্তি—মায়ের স্নেহ যেন মায়ের সদাপ্রফুল্ল মুখ হইতে শত ধারে ঝরিয়া সমগ্র জগৎকে শাস্ত তৃপ্ত করিতেছে । জগদ্ধাত্রী মূর্তির নীচে দক্ষিণে প্রসন্নানন সৌম্যমূর্তি, তীক্ষ্ণ বুদ্ধিব্যঞ্জক দীপ্তোজ্জ্বল চক্ষু পুরুষমূর্তি । নীচে লেখা—পিতৃদেব । বামে অন্নপূর্ণার মত এক নারীমূর্তি । বক্ষে মুখে

স্নেহ—দয়া দীপ্যমান। নীচে. লেখা মাতৃদেবী। এই ছবিখানি ছবির নীচে ঠিক মাঝখানটিতে এক কিশোরীর ছবি। বড় কোমল ও সুকুমার মুখখানি। সৌন্দর্য্য যেন আকার ধরিয়া ছবিখানিতে ফুটিয়া উঠিয়াছে। ছবির নীচে লেখা—মাধুরিমা। প্রত্যেক ছবির নীচে ফুলের আধার ও ধূপ দিবার স্থান।

আগুবাবু কক্ষমধ্যে প্রবেশ করিয়া একে একে সব ছবিগুলির নীচে ফুল দিয়া দীপ ও ধূপ জালিয়া দিলেন। ধীরে ধীরে কক্ষটি পুষ্প ও ধূপের গন্ধে সুরভিত হইয়া উঠিল।

[ ১৭ ]

আগুবাবু কিছুক্ষণ ছবিগুলির পানে নিস্তব্ধ হইয়া চাহিয়া রহিলেন। তারপর ধীরে ধীরে বলিলেন, ছবি দেখেই বুঝতে পারছ মা, কোন্‌খানি কার ছবি। কিন্তু এই নীচের ছবিখানি কার হয়ত বুঝতে পারছ না। এই খানির কথাই তোমায় বলব।

মাধুরিমা আমার মেয়ে। ঐ আমার একমাত্র মেয়ে। ওকে আমি ছেলেবেলা থেকে নিজহাতে শিক্ষা দিয়ে এসেছি। কিন্তু মায়ের আমার অন্তরে ভগবান যে শিক্ষা দিয়ে পাঠিয়েছিলেন তাই তার বথেষ্ট ছিল। ছেলেবেলা থেকে কারো চোখে জল দেখলে সে কেঁদে ভাসিয়ে দিত।

একটু বড় হতেই কি করে তাদের ছুঁথ দূর করবে এই তার চেষ্টা হয়েছিল। তাকে স্কুলে কলেজে পড়াইনি, নিজে পড়িয়েছিলাম। ইংরাজী, বাংলা, সংস্কৃত, গণিত, ইতিহাস সব তাকে যতদূর আমার সাধ্য পড়িয়েছিলাম। শিক্ষার আলোক তার সারা মনে কোন কুসংস্কার আনতে পারেনি। শিক্ষা ছিল, কিন্তু তার মনে তার জন্ম কোনদিন বিন্দুমাত্র অহংকার আসেনি।

অনেক খুঁজে ভগবানের দয়ায় তার উপযুক্ত পাত্রও পেয়েছিলাম। যেমন শিক্ষিত তেমনি মধুচরিত্র। তাদের ছ'জনেরি এই জ্ঞান ছিল যে কর্তব্য শুধু ঘরের ভিতর সীমাবদ্ধ নয়, ঘরের বাহিরেও তার বহু স্থান। এমনি তাহার স্বভাব—এমনি তাহার মন যে, এখানে যেমন সে সকলের প্রাণ ছিল—শ্মশুরবাড়ীতেও ঠিক তেমনি হয়েছিল। শ্মশুর শাশুড়ীর বোমা-অস্ত্র প্রাণ ছিল ; দেওর নন্দ ঠিক যেন ভাই বোনের মত অনুগত ছিল। স্বামী ছিল তার সঙ্গে একেবারে অভিন্ন হৃদয়। এখান থেকে মাকে পাঠাবার সময় আমরা যেমন কাতর হতাম, শ্মশুর বাড়ী থেকে পাঠাবার সময়ে তার শ্মশুর শাশুড়ীও তেমনি কাতর হতেন। মায়েরও এমন কোমল মন ছিল যে, চোখের জল না ফেলে সে এক জায়গা থেকে আর এক জায়গায় যেতে পারত না! সবাই তাকে ভালবাসতেন। তার-ম্মানমুখ কারও প্রাণে সহ হ'ত না। কিন্তু তবু তাকে আমরা ছুঁথের হাত থেকে বাঁচিয়ে রাখতে কেউ পারিনি।

আশুবাবু এই পর্য্যন্ত বলিয়া মাধুরিমার তৈলচিত্রের পানে কিছুক্ষণ চাহিয়া রহিলেন। চিত্রের দিকে চাহিয়া লতিকা সবিস্ময়ে ভাবিতে লাগিল এমন সৌভাগ্যবতী যে নারী তারও প্রাণে কিসের ছুঁথ।

আশুবাবু আবার বলিতে লাগিলেন, মেয়েদের পড়াবার জন্ত তার মনে বড় আগ্রহ ছিল। গ্রামের মধ্যে গরীব গৃহস্থের বাড়ী বাড়ী যেত। যারা মেয়ে তার সঙ্গে পাঠাত তাদের সঙ্গে করে নিয়ে আসত। যারা আদতে দিতে চাইত না, নিয়ম করে তাদের বাড়ী গিয়ে পড়িয়ে আসত। তারপর সেই মেয়েদের কাছ থেকেই জানতে পারত কারা ভাল খেতে পায় না, কার পরিবার কাপড় নেই, কার বাড়ীতে কোন কষ্ট—কোন ছুঃখ আছে কি না। তার নিজের হাতে যে টাকাকড়ি থাকত তাই দিয়ে বণাসাধ্য তাদের ছুঃখ কষ্ট দূর করত। কোনখান থেকে কেঁদে কেঁদে চোখ ফুলিয়ে এসে বলত—বাবা, ওদের বাড়ীতে এত কষ্ট! তার চোখে জল দেখে তাদের ছুঃখ দূর করার জন্ত তখনি তার ইচ্ছামত কাজ করতাম। শিশুর বাড়ী গিয়েও তার এ অভ্যাসের পরিবর্তন হয়নি। সেখানেও সবাই তার এই অভ্যাসকে স্নেহের চক্ষে দেখতে লাগলেন। ঠিক এমনি করে মায়ের শিশুর বাড়ীতেও একটা পাঠশালা গড়ে উঠল। মেয়েগুলি তাকে দিদি বলতে অজ্ঞান।

একদিন একটি ছোট মেয়ে তাকে বললে তার বৌদিদির মায়ের বড় অসুখ, তিনি নাকি ঝাচবেন না। বৌদিদি ছবছর বাপের বাড়ী যায় নি। বৌদিদির বাবা কতবার নিতে এসে ফিরে গেছেন। মা আর দিদি কিছুতে যেতে দেবেন না। বৌদিদি বলে দিয়েছে আপনি যদি একবার বলেন তাহলে যেতে পারেন। বৌদিদি দিন রাত্রি...

একথা শুনেই মায়ের মুখ শুকিয়ে গেল। মেয়েটি চলে গেল। মাধুরিমা সজল চোখে শাশুড়ীর কাছে গিয়ে সব বললে। তিনি বললেন, **আ** কান্না কেন মা? কি করতে চাও তুমি বল।

চোখ মুছে সে বললে, আপনি যদি আমায় নিয়ে ওদের বাড়ী যান মা বৌটিকে একবার দেখে আসব। ছবছর বাপের বাড়ী যায় নি, তার উপর মায়ের এই অমুখ। তবু মা তারা পাঠাচ্ছে না কেন তাই একবার জেনে আসব।

শান্তুড়ী চোখের জল মুছিয়ে তাকে শান্ত করে বললেন, বেশ তো না, তাই যাব'খন। তুমি চোখ মুখ ধুয়ে নেও। ঘণ্টাখানেক পরেই আমি তোমাকে নিয়ে বেরুব।

সেখানে গিয়ে বাড়ীর গিন্নির সঙ্গে শান্তুড়ী বসে কত কথা কইতে লাগলেন। মেয়ে ছুটি কাছে এসে বসল। বৌটি ঘোমটা দিয়ে ভয়ে ভয়ে একটু দূরে দাঁড়িয়ে রইল। মাধুর শান্তুড়ী বললেন, বৌমা আমার একটু বেড়াতে আর ছোট ছোট বৌঝিদের সঙ্গে কথা কইতে ভালবাসেন তাই নিয়ে এলাম।

কথায় কথায় আরও বললেন, বৌমা বাপের বড় আদরের। ২১৩ মাস পরে একবার বাপের কাছে পাঠাতে হয়। তবে সেখানেও তিনি বেশীদিন রাখেন না। তোমার বোনাটি কতদিন এসেছে দিদি?

দিদিটি তখন পঞ্চমুখী হয়ে বললেন, যার যাবার কোন চুলো নেই সে আর বাবে কোথায়? মুখে আগুন ওর বাবা মায়ের।

মাধুরিমা আন্তে আন্তে সরে গিয়ে বৌটিকে আড়ালে ডেকে নিয়ে ছ-চারটে কথা কয়ে নিলে। তারই মধ্যে জেনে নিলে যে, বিয়ের সময় বৌয়ের বাপ যে গহনা দিয়েছিল, তাতে সোণা কম ছিল বলে শান্তুড়ী গেয়ে রাখে যে অন্ততঃ দেড়শো টাকা ধরে না দিলে বৌ পাঠাবে না।

উঠে আসার সময় কথায় কথায় মাধুর শান্তুড়ী বললেন, আপনার বৌটি



তো অনেকদিন হ'ল বাপের বাড়ী যাননি। একবার কেন পাঠিয়ে দিন না।

একটু বিরক্ত ভাবে, বোটের শাশুড়ী উত্তর দিলে—তেমনি করে নিতে আসে তো পাঠাব না কেন? আপনিও যেমন—সে মিন্বে আবার নিতে আসবে!

শাশুড়ীর সঙ্গে মাধু ফিরে এল। পরদিন সেই মেয়েটির কাছে সে খবর পেলে বাপের বাড়ী যাওয়া সম্বন্ধে বোটি গোপনে কিছু বলেছে এই সন্দেহ করে বোটিকে কাল শাশুড়ী মেরেছে।

মাধু আর সহ করতে না পেরে শাশুড়ীর কাছে গিয়ে কেঁদে বলল, মা বোটিকে আপনি বাঁচান। তিনি নিরুপায়। বললেন, কি করে বাঁচাব মা, বল। ওরা যদি বলে পাঠাব না আমাদের কি জোর আছে মা? তখন সে বলল, মা আপনি যদি রাগ না করেন আমায় আপনি ও নাবা যে টাকা দিয়েছেন তাই থেকে দেড়শো টাকা—বোটের বাপের কাছে পাঠিয়ে দিন, ঐ টাকা দিয়ে তিনি মেয়েকে নিয়ে যেতে পারেন।

শাশুড়ী একথা স্বপ্নরূপে বললেন, ঠিকানা জেনে টাকা দিয়ে—কাউকে সেখানে পাঠিয়ে দাও। মা যেন কোন কষ্ট না পান।

দেড়শো টাকা নিয়ে একজন কর্মচারী বোটের বাপের বাড়ী গিয়ে দিয়ে এল, আর সব বলে এল। রুগ্ন মায়ের বুকে আশা জাগল। বাপ টাকা নিয়ে মেয়েকে নিতে এল। বোটি চলে যাবে এই ভেবে মাধুরিমা তাকে একটাবার দেখতে এল। বোটের মুখে প্রসন্ন হাসি চোখে কৃতজ্ঞতার অশ্রু ফুটে উঠল।



কিন্তু পরদিন এক ভীষণ খবর এল। বোটের বাপ দেড়শো টাকা দিয়ে আশা করে বসেছিল যে বিকেলের দিকে সে মেয়েকে নিয়ে যেতে পারবে; কিন্তু শেষ মুহূর্তে বোটের খণ্ডুর বলে বসলো যে এতদিন টাকা পড়ে থাকার জন্য সুদ হয়েছে পঞ্চাশ টাকা। সেই টাকা নিয়ে এনে তবে মেয়ে নিয়ে যেতে পারে। বোটের বাপ কত কাকুতি মিনতি করলে; কিন্তু কিছুই ফল হ'ল না। তারপর সে মেয়েকে বোঝাবার ব্যর্থ চেষ্টা করে চোখ মুছতে মুছতে চলে গেল। বোট মনের দুঃখে সেই রাত্রে আত্মহত্যা করলে।

খবরটি শোনামাত্র মাধুরিমা মাগো বলে অজ্ঞান হয়ে পড়ল। তার পরেই তার ভীষণ জ্বর। সে কি কঠিন অসুখ—আর কি যে কাতর ও কঠিন সবাকার প্রাণপণ চেষ্টা তাকে বাঁচাবার। বাড়ীশুদ্ধ সবাই সব কাজ ফেলে তাকে নিয়ে রইল। আমি স্ত্রীকে নিয়ে সেখানে গিয়ে রইলাম। শ্রেষ্ঠ ডাক্তার নিয়ে আসা হল। কিন্তু সব বিফল। কি আঘাত যে তার মনে লেগেছিল যে তা আর সে সামলাতে পারলে না।

মা আমার সংসার থেকে বিদায় নেবার আগের দিন আমাকে ডেকে বলল, বাবা, তোমায় একটা কথা বলতে আমার ইচ্ছে করছে। আমি তার মাথায় হাত বুলুতে বুলুতে বললাম, কি কথা বল মা। অনেক কষ্টে—অনেকবার থেমে থেমে সে আমায় এই শেষ কথাকয়টা বলে গেল।

“বাবা আমি লোকের বাড়ী বাড়ী গিয়ে বৌঝিদের সঙ্গে মিশে দেখেছি তাদের মনের অবস্থা বড় নীচু। বেশীর ভাগ মেয়ের একটা

ভাল জিনিষ ভাববার সময়, স্মরণ বা যোগ্যতা কিছুই নেই। দশ বছরের বৌ বাড়ী নিয়ে এসে তার কাছে কুড়ি বছরের বুদ্ধি, শক্তি ও কাজ চায়। না পেলেই যন্ত্রণা দেয়। মনেও করে না তার নিজের বাড়ীর দশ বছরের মেয়ে কতখানি পারে। আরও আশ্চর্য্য এই যে বাড়ীর পুরুষের চেয়ে মেয়েরাই যন্ত্রণা দেয় বেশী। ভাল শিক্ষা যদি এরা একটু পায় এদের জীবন অগ্রপথে যায়। রামায়ণ মহাভারত বুঝে পড়তে পারলেও প্রাণে কত শাস্তি পায়। মাকে দুঃখ দিতে হলেই প্রাণ কাঁদে। তাহলে দুঃখ সহ্য করবার শক্তি বাড়ে—দুঃখের সময়ও শক্তি আসে। যে বৌটি দুঃখ সহ্য করতে না পেরে আত্মহত্যা করলে সে লিখতে পড়তে জানত না। জানলে মা বাবাকে স্বামীকে চিঠি লিখে জানাতে পারত। দুঃখের মাঝেও একটু সাহসনা পেত। তার শাশুড়ী নন্দ যারা তাকে এত কষ্ট দিত তারাও নিরঙ্কর। ভাল চিন্তা—ভাল ভাব তাদের মনে কখন আনত না, তাই তারা এত নিষ্ঠুর হতে পেরেছিল। এই বৌটি যদি আমার শাশুড়ীর মত শাশুড়ী পেত তাহলে কি তাকে এ দুর্গতি ভোগ করতে হয়!

তাকে ওকথা আর ভাবতে নিষেধ করতে সে বললে—আমি আর ওসব কথা বলব না। কিন্তু মরবার আগে তোমার কাছে এই প্রার্থনা করে যাচ্ছি বাবা, যাতে আমাদের দেশে সব মেয়েরা লেখাপড়া শিখবার স্মরণ পায় তুমি তার জন্ত অস্তুরের সঙ্গে চেষ্টা কর। তুমি যদি এইটি কর বাবা, যেমন জীবনে আমি চিরদিন সুখে ছিলাম মরণেও আমি তেমনি সুখে থাকব। আর কত সংসারের অশান্তি ঘুচে যাবে—কত মেয়ের দুঃখ তোমা হতে দূর হবে।

আমি বললাম, হ্যাঁ মা, তোমার কথামত সব হবে। তুমি সেরে ওঠ ; আমরা সবাই মিলে এই কাজ করব।

তবু সে বললে, যদি আমি না বাঁচি, বাবা, তবুও করবে তো ?

চোখে জল এল। তবু বললাম, হ্যাঁ মা, করব।

মাতার সজল চোখে হাসির আভা ফুটে উঠল। আমাদের সবারি চোখে জলের ধারা নেমে এল। তার পরদিন মা আমার পৃথিবীর খেলা সঙ্গ করে চলে গেল। তার স্বপ্নর শাশুড়ী এখনও সে শোক ভুলতে পারেননি। তার স্বামী সন্ন্যাসীর মত হয়ে আছে। তার মা এ শোক সহ্য করতে না পেরে কয়েক মাসের মধ্যেই তার কাছে চলে গেছেন।

এখন নোন হনু বুঝতে পারছ মা, মেয়েদের শিক্ষা দেওয়া, মেয়েদের এতটুকুও উন্নতির সহায় হওয়া আমার কতখানি প্রাণের কাজ। আমার জামাই বেহাই তাঁদের দেশে দুটি বালিকা বিদ্যালয় খুলেছেন। আর আমার এই জীবনের রত। এতেই আমার তৃপ্তি, আনন্দ—এতেই আমার শান্তি।

আশুবাবু চুপ করিলেন। তাঁহার কাহিনীর কারুণ্য, মাধুর্য ও পবিত্রতায় যেন গৃহখানি ভরিয়া রছিল। ধূপ জলিয়া জলিয়া গন্ধ বিকিরণ করিতে লাগিল, মাতার মুখের স্মৃতির মত পুষ্পের সৌরভ কক্ষমধ্যে জাগিয়া রছিল। লতিকার মনে হইল মাধুরিমার স্নিগ্ধমুখর আঁখি দুটি হইতে যেন স্নেহ, প্রীতি ও কারুণ্য উছলিয়া পড়িতেছে।

অমর লতিকার শিক্ষিত্রীর কাজের কথা লতিকার পত্রেই অবগত হইয়াছিল। রামপ্রসাদ সেখানে কয়েকদিন থাকিয়া আবার ফিরিয়া আসিয়াছিল।

লতিকা লিখিয়াছিল, আমি যে মাকে ভাই বোন্দের কথঞ্চিৎ সাহায্য করিতে পারিব সেইটুকুই আমার পরম শান্তি। তবে একেবারে একা থাকা এক এক সময়ে বড় কষ্ট হয়। তখন মনে মনে ভাবি চিরদিন বে একা থাকিতে হইবে ইহা তাহারই প্রারম্ভ মাত্র। বাবা চলিয়া গিয়াছেন, মাও হয়ত অতর্কিতে একদিন চলিয়া যাইবেন। তুমি দূরে—হয়ত বা একদিন আরও দূরে চলিয়া যাইবে।

অমর খুব সংক্ষেপেই তার উত্তর দিয়া লিখিল যে ভবিষ্যতে সে কতখানি দূরে চলিয়া যাইবে তাহার উত্তর ভবিষ্যৎই দিতে পারিবে। মানুষের সে সম্বন্ধে অহঙ্কার করা বৃথা এবং জোর করিয়া কিছু বলাও কঠিন।

\* \* \* \*

দিন কাটিতে লাগিল। কথিকা ও রামপ্রসাদ ম্যাট্রিকুলেশন পাশ করিল। অমর এম-এ, বি-এল পাশ করিয়া পিতার চেষ্টায় সহজেই ডাকঘরের Superintendentএর পদ পাইল।

চন্দ্রনাথ সংবাদ পাইলেন যে লতিকা শিক্ষয়িত্রীর কাজ করিতেছে এবং বিবাহ করিবে না এই সংকল্প প্রকাশ করিয়াছে।

অমরের বিবাহ চন্দ্রনাথবাবু একপ্রকার স্থির করিয়া ফেলিয়াছিলেন। তাঁহার ইচ্ছা ছিল লতিকার বিবাহ অগ্রত্ব হইয়া গেলে অমরের বিবাহ দিবেন। লতিকার সংকল্পের কথা শুনিয়া তিনি অমরের বিবাহের কথাবার্তা সম্পূর্ণ করিয়া ফেলিতে পারিলেন না। ভাবিলেন অমর বড় হইয়াছে—একবার তাহার মত জানা প্রয়োজন।

পূজার ছুটিতে অমরের বাড়ী আসিবার কথা। চন্দ্রনাথ ভাবিলেন এই সময়ে ‘বাগীশকে’ আনাইয়া অমরের মত জানিতে পারিলে ভাল হয়। ‘বাগীশ’ তখন কলিকাতায় ছিল না। অত্যন্ত ধনী ও বিখ্যাত জমিদার বংশের ছেলে বলিয়া সে বি-এ পাশ করিবার সঙ্গে সঙ্গেই ডেপুটি ম্যাজিস্ট্রেটের পদ পাইয়াছিল। বাগীশকে তিনি একখানি চিঠি লিখিলেন যে বিশেষ প্রয়োজনে সে যেন অন্ততঃ একটি দিনের জন্তও একবার আসে।

বাগীশ আসিলে তাহাকে জিজ্ঞাসা করিলেন অমরের বিবাহের ব্যবস্থা করা যাইতে পারে কি না। বাগীশ সব কথাই জানিত। সে বলিল, লতিকা বিবাহ করিতে অসুমতি দিলে সে সানন্দে সম্মত হইবে। তবু অমরকে আর একবার জিজ্ঞাসা করা ভাল।

চন্দ্রনাথ বলিলেন, আমি জিজ্ঞাসা করেছি না ব’লে তুমি নিজের জিজ্ঞাসা করছ এই ভাবে কথাটা বোলো।

বাগীশ সেই ভাবেই জিজ্ঞাসা করিয়া চন্দ্রনাথকে বলিল, অমর বলে যে অগ্রত্ব বিবাহে সে সারাজীবন অসুখী হইবে।

অমরের পিতামাতার মধ্যে অনেক কথাই হইল। শেষে চন্দ্রনাথ স্থির করিলেন, তিনি নিজে হইতে কোলীগ ভঙ্গ করিয়া বিবাহ দিতে মত প্রকাশ করিবেন না! কিন্তু অমর যদি স্থির করে তো লতিকাকে বিবাহ করিতে পারে। ইহাতে সে তাঁহার বিরাগ-ভাজন হইবে না।

বাগীশ এই কথা অমরকে বলিলে অমর বলিল যে, পিতার আন্তরিক ইচ্ছা না জানিলে এবং তাঁহার আশীর্বাদ না পাইলে সে লতিকাকেও বিবাহ করিতে চাহিবে না। তবে লতিকা ব্যতীত আর কাহাকেও সে স্বেচ্ছায় বিবাহ করিবে না ইহাও স্থির।

ইহার পরে দুই বন্ধুতে অনেক কথাবার্তা হইল।

বাগীশ জিজ্ঞাসা করিল, আচ্ছা, লতিকা যদি ইহার মধ্যে আর কাউকে বিয়ে করে।

অমর বলিল, লতিকা আর কাউকে বিয়ে করবে না। বাগীশ বলিল, তর্কের খাতিরেই ধর যদি করে?

অমর বলিল, তাহলে বাবা যেখানে বলবেন সেখানেই বিয়ে করব।

বাগীশ বলিল, তুমি কি সত্যই মনে কর একবার যাকে বিয়ে করতে চায় তাকে ছাড়া অপরকে পুরুষ বা নারী কিছুতে বিয়ে করে না!

অমর। একেবারে করে না সে কথা বলছিলেন। তবে করে না এমনও অনেক আছে।

বাগীশ। আচ্ছা, অদর্শনে ভালবাসা বাড়ে না কমে?

অমর। সে ভালবাসা হিসাবে।

বাগীশ। তার মানে ?

অমর। সত্যকার ভালবাসা তলে বাড়ে, নইলে কমে।

বাগীশ। আচ্ছা ধর, তুমি আর আমি দুজনেই একই জনকে ভালবাসি। আমি প্রবাসে রয়ে গেলাম, তুমি গেলে সে থাকে যেখানে। ধীরে ধীরে তুমি যাওয়া আসা করতে লাগলে। ক্রমশঃ তুমিই তার মন অধিকার করলে। আমি দূরে থেকে আরও দূরে চলে গেলাম।

অমর। এটা তোমার কঁাকির তর্ক হল। আসল কথাটাই তুমি বাদ দিয়ে গেলে। বললে আমরা দুজনেই একজনকে ভালবাসি। সে একজন যে কাকে ভালবাসে তা তো বললে না।

বাগীশ। ধর সে তোমাকেই একটু বেশী ভালবাসে, কিন্তু আমাকেও একেবারে ঘৃণা করে না।

অমর। যদি আমাকে সে সত্য করে ভালবাসে—তাহলে তোমার সঙ্গের চেয়ে আমার স্মৃতিই তার বেশী ভাল লাগবে।

বাগীশ। ওটা হ'ল কাব্যের কথা। বস্তুতন্ত্রে ওকথা বলে না।

অমর। বস্তুতন্ত্রে কি বলে ?

বাগীশ। বলে বখন বার কাছে থাকি তখন তার মন রাখি ; কিংবা *out of sight, out of mind*—চোখের বা'র হলেই মনের বা'র। আদর্শের দাম আদর্শ হিসেবে। বস্তুজগতে তার কোন স্থান নেই।

অমর। এ সব নিজের মনে অনুভব করবার বিষয়, অপরকে বোঝাবার বিষয় নয়। তুমি যাকে বস্তুতন্ত্র বল : সেইটে উদ্ধৃত

করলেই কোন জিনিসকে প্রমাণ করা হল না এবং তা বিশ্বাস করা চলে না।

বাগীশ। আচ্ছা আমি যদি কার্য দ্বারা একে প্রমাণ করে দিতে পারি ?

অমর। তাহলে বিশ্বাস করব এবং মত বদলাব।

ইহার পর দুইজনে এই প্রসঙ্গ পরিত্যাগ করিল। দুই দিন থাকিয়া বাগীশ চলিয়া গেল। বাইবার পূর্বে অমরের পিতাকে অমরের মনোভাব বলিয়া গেল।

অমর লতিকাকে ছাড়া আর কাহাকেও বিবাহ করিতে চায় না ইহা বুঝিয়া চন্দ্রনাথবাবু হুঃখের সহিত বলিলেন, বংশমর্যাদার মমতা আমার অস্থি মজ্জায় মিশে আছে। আমি তাকে স্বেচ্ছায় ত্যাগ করতে পারব না। আমি অমরকে স্বাধীনতা দিচ্ছি। কিন্তু প্রসন্নচিত্তে অনুমতি দিতে পারব না।

বাগীশ অমরকেও এ কথা বলিয়া গেল।



আশুবাবুর বাহিরে বাইবার সময় আসিল। এবার তিনি লতিকার হাতে ঘর বাড়ীর ভার দিয়া গেলেন। সেই সময়ে লোকেন্দ্রবাবু বলিয়া এক নূতন সব্ ডিভিসনাল অফিসার আসিয়াছিলেন। অল্পদিনের মধ্যে তিনি জনপ্রিয় হইয়াছিলেন। সমগ্র লোকহিতকর প্রতিষ্ঠানের প্রতি তাঁহার আন্তরিক অনুরাগ দেখিয়া তাঁহারি হাতে তিনি বিদ্যালয়ের তত্ত্বাবধানের ভার দিয়া গেলেন। লতিকাকে বলিয়া গেলেন যে যদি তাহার মা ও ভাইবোন্দের এখানে আনে তাহা হইলে সে যেন অসংকোচে এই বাড়ীতে আসিয়া বাস করে। তাঁহার লোকজনদেরও তিনি এই মর্মে উপদেশ দিয়া গেলেন। আশুবাবু লোকেন্দ্রবাবুর সহিত লতিকাকে পরিচিত করিয়া দিলেন।

ক্রমে লতিকার সহিত লোকেন্দ্রবাবুর বেশ পরিচয় হইল। মাঝে মাঝে তিনি বিদ্যালয়ে আসিতে লাগিলেন। স্ত্রীশিক্ষা সম্বন্ধে লতিকার অনেক আলোচনা চলিতে লাগিল। লতিকা ইদানীং আপনার অভিজ্ঞতা, আশুবাবুর উপদেশ ও শিক্ষা সম্বন্ধীয় পুস্তকাবলী পড়িয়া—স্ত্রীশিক্ষা সম্বন্ধে অনেক জ্ঞান সঞ্চয় করিয়াছিল। লোকেন্দ্রবাবুর সঙ্গে ইহা লইয়া সে অসংকোচে আপনার মতামত প্রকাশ করিতে লাগিল।

সেদিন স্কুলের পুরস্কার বিতরণের দিন ছিল। মেয়েদের আবৃত্তি বড়ই মধুর হইয়াছিল এবং সকলকেই নিরতিশয় তৃপ্ত করিয়াছিল। লোকেন্দ্রবাবু অনেকগুলি পুরস্কার নিজ ব্যয়ে মেয়েদের দিয়াছিলেন। পুরস্কার বিতরণের অব্যবহিত পরে তিনি সভাস্থলে লতিকার অজস্র প্রশংসা করিয়া তাহার বুদ্ধি, বিদ্যা, সহিষ্ণুতা, দৃঢ়তা ও শিক্ষাপদ্ধতি তদুপরি তাহার চরিত্র মাধুর্যের প্রতি সকলের দৃষ্টি আকৃষ্ট করিলেন। সন্ধ্যার সময় মেয়েরা সব পুরস্কার ও মিষ্টান্নাদি লইয়া গৃহে ফিরিল। অভ্যাগতেরা এক এক করিয়া বিদায় লইলেন। লোকেন্দ্রবাবু সবশেষে যাইবার জন্ত প্রস্তুত হইলেন। লতিকা বলিল, আপনি সেই কখন এসেছেন। একটু যা হয় কেন খেয়ে যান্ না।

লোকেন্দ্রবাবু বলিলেন, আপনিও তো ক্লান্ত। আপনারও এখন বিশ্রামের দরকার। একেবারে বাসায় গিয়া খাব।

লতিকা বলিল, তা হলে এক পেয়ালা চা খেয়ে যান্। চায়ের সময় তো আপনার পেরিয়ে গেছে।

লোকেন্দ্রবাবু হাসিয়া বলিলেন, চায়ের সময় আমার পেরুবার ভয় নেই—কারণ ও উপসর্গ আমার নেই। তবে আপনি যদি অনুমতি দেন, আপনার সঙ্গে আর একটু গল্প করে যাই।

লতিকাকে বলিতে হইল, বেশ তো গল্প করুন্ না! তবে একটু মিষ্টি মুখ করে।

লোকেন্দ্রবাবু বলিলেন, আচ্ছা তা হলে ঘরে যা আছে তাই নিয়ে আসুন। কিছু তৈরি করতে পাবেন না কিন্তু।

ঘরে সামান্য কিছু ফল ছিল। লতিকা তাহাই কাটিয়া একটি

রেকাবিতে সাজাইয়া তাহার সঙ্গে এক টুকরা মিছরি দিয়া লোকেদের সম্মুখে রাখিল। ক্ষুধা হইয়া বলিল, এমনি অদৃষ্ট, ঘরে আজ আর কোন মিষ্টিই নাই।

লোকেদের বলিলেন, ফলের মধ্যে মিষ্টতা আছে, মিছরি তো মিষ্টিই ; আর সব চেয়ে মিষ্ট আপনার কথা ও পরিবেশন। তবু আপনার ক্ষোভ !

কথা কয়টা এমন বিশেষ কিছুই নয়। হয়ত ইহা মাত্র শিষ্টাচারের কথা, হয়ত বা তাহাও নহে। তথাপি লতিকা একটু শঙ্কিত হইয়া পড়িল। সামান্য কথা হইতেই কত অসামান্য কথা উঠিয়া পড়ে। লতিকা নীরবে বসিয়া রহিল, উত্তরে কিছুই বলিল না।

লোকেদের সব কথানি ফল শেষ করিয়া মিছরিটুকু মুখে ফেলিয়া দিলেন। মিছরি শেষ হইলে একটু জলপান করিয়া একটি পান লইলেন। পরে কিঞ্চিৎ ভাবিয়া বলিলেন, যদি অনুমতি দেন, একটা কথা জিজ্ঞাসা করি।

লতিকা ভয়ে ভয়ে বলিল, বলুন।

লোকেদের জিজ্ঞাসা করিল, আচ্ছা, আপনি কি কুমারী থাকবেন স্থির করেছেন ?

লতিকাকে লজ্জিত ও নিরন্তর দেখিয়া তৎক্ষণাৎ লোকেদের বলিলেন, আপনি এতে কোন দোষ নেবেন না। আমার এ প্রশ্নের মধ্যে কিছুমাত্র অসম্মান নেই।

লতিকা ধীরে ধীরে বলিল, আমি কুমারী থাকাই স্থির করেছি।

লোকেন্দ্র একটু আবেগের সহিত বলিল, আমাকে এক মিনিটের জন্ত একটা কথা বলার জন্য অনুমতি দয়া করে দিন্ ।

লতিকা নতমুখে বসিয়াছিল । মুখ তুলিয়া বলিল, বলুন্ ।

লোকেন্দ্র বলিয়া গেল—আমি আপনার প্রতি অনুরক্ত ; যেদিন থেকে আপনাকে দেখেছি সে দিন থেকে । আমি অবিবাহিত থাকারই সংকল্প করেছিলাম । আপনাকে দেখে—আপনাকে জেনে সে সংকল্প ভেসে গিয়েছে । আপনার সব সন্ধান নিয়েছি । জেনেছি বিবাহে কোন বাধা নেই । আপনাকে পাবার প্রত্যাশা করতে পারি কি ?

লতিকা কিছুক্ষণ স্তব্ধ হইয়া রহিল । পরে ধীরে ধীরে বলিল, আমাকে ওকথা বলবেন না ।

লোকেন্দ্র বলিলেন, আমি আপনাকে দেখতে পেলে ও মাঝে মাঝে কথা কইতে পেলোই যথেষ্ট মনে করতাম, আপনার কাছে আমার মনের এ হ্রাশা কখন প্রকাশ করতাম না । কিন্তু হয়ত পরে এর জন্য আপনার কোন নিন্দা হতে পারে, সে জন্য বোধ করে আপনাকে প্রার্থনা করি । যদি আপনি অপরের অনুরাগিণী না হন এবং আমাকে ঘৃণা না করেন তা হলে আমাকে গ্রহণ করুন ।

লতিকা এতক্ষণ নতমুখে বসিয়াছিল । এবার তাহার অশ্রুপ্লাবিত মুখ তুলিয়া বলিল, আপনার মত সর্বগুণান্বিত লোককে ঘৃণা কে করতে পারে ? এমন স্বামী পাওয়া যে কোন নারীরই সৌভাগ্যের কথা । কিন্তু আমাকে ক্ষমা করবেন । আমি অপরের অনুরাগিণী ।

লোকেন্দ্র একটু ভাবিয়া বলিলেন, তবে আপনি যে বলেন আপনাকে কুমারীই থাকতে হবে ।

লতিকা বলিল, সে কথাও সত্য। তাঁকে লাভ করা আমার অদৃষ্টে নেই।

লোকেন্দ্র ফুরু আবেগের সহিত বলিলেন, তা হলে কেন আমাকে বিমুখ কচ্ছেন? যে আপনাকে হতাদর করবে তার অপেক্ষায় আপনি চিরজীবন বসে থাকবেন, আর যে আপনাকে সর্বাস্তঃকরণে চাইবে তাকে আপনি নিরাশ করবেন!

লতিকা ধীরে ধীরে বলিল, তিনি আমাকে একটুও হতাদর করেননি। কিন্তু তিনিও আমার মত নিরুপায়। তিনিও আজ পর্য্যন্ত বিবাহ করেননি, আর বোধ হয় করবেনও না।

লোকেন্দ্র হঠাৎ পরিহাসের হাসি হাসিয়া বলিলেন, আর যদি তিনি অন্য কাউকে বিয়ে করেন তা হলে আপনিও অপরকে বিয়ে করতে রাজী হবেন তো?

লতিকা এবার দৃঢ়-স্বরে বলিল, না—তা হলেও নয়।

লোকেন্দ্র তথাপি বলিলেন, কেন নয়?

লতিকা বলিল, এর কারণ নির্দেশ করতে আমি অক্ষম।

লোকেন্দ্র বলিলেন, কেন পারবেন না? আপনারা ছুজনে ছুজনকে ভালবাসেন এবং শীঘ্র হোক বা কিছুদিন পরেই হোক—আপনাদের বিবাহ হবে, কাজেই আপনি অপরকে গ্রহণ করতে পারেন না।—এর অর্থ বেশ বুঝতে পারি এবং এর বিরুদ্ধে আপনাকে কিছু বলবারও নেই। কিন্তু তিনি আপনাকে ভালবেসে অপরকে বিবাহ করবেন, আর আপনি তারই কথা ভেবে জীবন কাটাবেন, আর কেউ আপনাকে প্রার্থনা করলে তার পানে ফিরেও চাইবেন না—এ আমাকে অপমান করা ছাড়া কিছুই নয়।

লোকেন্দ্রের এবারকার স্বর একটু কঠিন।

লতিকাও হাঁহাতে একটু অপমানিত জ্ঞান করিল। সে দৃঢ় কণ্ঠে বলিল,  
এ প্রসঙ্গে আর প্রয়োজন নেই। এ ত্যাগ করুন।

লোকেন্দ্র আর কিছু না বলিয়া উঠিয়া পড়িলেন। সে কক্ষ ত্যাগ  
করিতে করিতে মুখ ফিরাইয়া জিজ্ঞাসা করিলেন, এই আপনার শেষ  
উত্তর তো ?

লতিকা উত্তরে শুধু বলিল, 'হাঁ'।

লোকেন্দ্র বলিলেন, এ অপমানের যদি আমি প্রতিশোধ নিই  
—তবু ?

লতিকা উত্তর দিল—হাঁ, তবু।

লোকেন্দ্র আর একবার লতিকার পানে চাহিয়া সে কক্ষ ত্যাগ  
করিলেন।

এক সপ্তাহ পরে লোকেন্দ্রবাবুর লোক আসিয়া লতিকার নামে একখানি খামের চিঠি দিয়া গেল। লতিকার মনে হইল হয়ত বা ইহার মধ্যে তাহার চাকরির জবাবই আছে। উদ্বিগ্ন ভাবে খামখানি খুলিতে তাহার ভিতর দুইখানি পত্র পাইল। প্রথম খানি লোকেন্দ্রবাবু বিদ্যালয়ের সেক্রেটারি ও সভাপতি হিসাবে তাহাকে পূর্ণ বেতনে একমাসের ছুটি দিয়াছেন। তাহাতে লিখিয়া দিয়াছেন আজ হইতে এক সপ্তাহের মধ্যে যেদিন তাহার আত্মীয় আসিবেন সেইদিন হইতে সে ছুটি লইতে পারিবে। অপর খানি পত্র হিসাবেই লেখা। তাহাতে লিখিয়াছেন, লতিকাদেবী, সেদিনকার কথায় আমি আপনার প্রতি অসন্তুষ্ট হই নাই। তাহাতে আপনার উপর আমার শ্রদ্ধা বাড়িয়াছে। সেদিন যাহা কিছু অন্যায় বলিয়া থাকি তাহার জন্য করপুটে আমি মার্জনা চাহিতেছি।

পত্র পড়িয়া লতিকা অপার বিশ্বয়ে নিমগ্ন হইল। কেন তাহাকে ছুটি দেওয়া হইল, কে তাহাকে লইতে আসিবে—ইহার কিছুই সে স্থির করিতে পারিল না। পূর্বে হইলে সে চিঠি লিখিয়া—লোকেন্দ্রবাবুর কাছ হইতে ইহার কারণ জানিয়া লইত। একবার ভাবিল, ইহা কি তাহাকে এই ভাবে সরাইয়া দিয়া অন্য কাহাকেও এই কাজে নিযুক্ত করিবার উপায়? তাহাই যদি হইবে তাহা হইলে এত

ঘুরাইয়া এ কাজ করিবার কি প্রয়োজন ? সাদা কথায় বলিয়া দিলেই হইত—তোমার প্রয়োজন নাই ।

সারারাত্রি ভাবিয়া ভাবিয়া লতিকা ইহার কোন সঙ্গত কারণ নির্ধারণ করিতে পারিল না । সকালে উঠিয়াও যখন সে ঐ কথাই ভাবিতেছিল— তখন একখানি ঘোড়ার গাড়ী তাহার বাসার সম্মুখে আসিয়া থামিল । গাড়ী করিয়া হঠাৎ এ সময়ে কে আসিল, তাহা দেখিবার জন্য তাহার উৎসুক দৃষ্টির সম্মুখে যখন অমর গাড়ী হইতে নামিল, তখন তাহার আর বিশ্বাসের অন্ত রহিল না । লতিকার পায়ে পায়ে যেন বাধিয়া আসিতেছিল ; তথাপি ছুরু ছুরু হৃদয়ে ছুটিতে ছুটিতে বাহিরে আসিল । অমরের সঙ্গে যখন সে গৃহমধ্যে প্রবেশ করিল তখন তাহার হৃদয়ের ছুরু ছুরু শব্দে সে নিজের কাছেই নিজে লজ্জিত হইতেছিল ।

প্রথম কথা কহিল অমর—ভাল আছ, লতু ?

লতিকা—অমরের প্রসন্ন সুন্দর মুখের পানে চাহিয়া—শুধু একটবার ঘাড় নাড়িয়া তাহাকে প্রণাম করিতে গেল । সামান্য 'হাঁ' কথাটাও তাহার মুখ দিয়া বাহির হইল না ।



অমর নীচু হইয়া লতিকাকে তুলিয়া ধরিল ও তাহার অমুরাগ-ভরা চোখের পানে চাহিয়া বলিল, বাবা এতদিন পরে প্রসন্নচিত্তে বিয়েতে মত দিতেছেন। তাই আমি তোমাকে নিতে এসেছি!

লতিকা আনন্দে সংজ্ঞাশূন্য হইয়া লুটাইয়া পড়িতেছিল। অমর তাহাকে বাহুপাশে ধরিয়া ফেলিল।

অপরাত্তে অমর ও লতিকা পাশাপাশি বসিয়া কথা কহিতেছিল। বাহির হইতে লোকেন্দ্রবাবু হাঁকিলেন, ভিতরে আসতে পারি? লতিকা তাড়াতাড়ি উঠিয়া দাঁড়াইল। লোকেন্দ্রবাবু অমরকে দেখিয়া যেন অপ্রতিভ ভাবে বলিলেন, মার্ক করবেন। আমি জানতাম না। আচ্ছা লতিকাদেবী, ইনিই কি তিনি যিনি আপনারই মত নিরুপায়?

অমর জিজ্ঞাসা করিল, আপনি কে—জিজ্ঞাসা করতে পারি কি?

লোকেন্দ্র বলিলেন, খুব পারেন। আমি—ওসমান। তবে আমি বন্ধ না করেই তিলোত্তমার দাবী ছেড়ে দিচ্ছি।

অমর হাসিয়া ফেলিল। বলিল, বেশ তাহলে বন্দু।

লোকেন্দ্র হাসিমুখে বসিলেন। অমর লতিকার পানে চাহিয়া বলিল—তুমি একে চিন্তে পারনি?

লতিকা কিছু বুঝিতে না পারিয়া অসহায়ের মত চাহিয়া রহিল।

অমর বুঝাইয়া বলিল—তুমি বাগীশের নাম শুনেছ ত? এই সেই বাগীশ। লোকেন্দ্র এর একেবারেই পোবাকী নাম; এতদিন বাক্সে তোলা ছিল। এর চিঠি পেয়েই তো আমি আসছি।

লোকেন্দ্র বলিল, ইনি তো আগের কথা জানেন না। এটুকু বললে উনি কি করে বুঝবেন?

অমর তখন বলিল, বাগীশকে দিয়ে বাবা আমাকে জিজ্ঞাসা করেছিলেন আমার বিয়ের সম্বন্ধ এসেছে বিয়েতে আমার মত আছে কি না। বাগীশকে আমি বলি যদি বাবার মত হয় তো তোমাকে গেলে আমি কৃতার্থ হই। আর যদি তাতে বাবার মত না হয় তাহলে বিবাহ করব না। তাতে বাবা বলেন, আমার যদি ইচ্ছা হয় আমি তোমাকে বিয়ে করতে পারি। তবে তিনি নিজে থেকে এ বিবাহে সম্মতি দিতে পারবেন না। আমি তখন বলি যে বাবার সম্পূর্ণ সম্মতি না গেলে আমি বরং চিরকাল অবিবাহিত থাকব। এই সব নিয়ে বাগীশের সঙ্গে তর্ক হয়। ও বলে, অদর্শনে ভালবাসা কমে এবং প্রিয়-জনের বহু-কাল অদর্শনের মধ্যে যদি আর কেউ আসে তাহলে তার প্রিয়ের স্থলাভিষিক্ত হতে বেশী দেরী হয় না। আমি বলি, সত্যকার অনুরাগ থাকলে অদর্শনে তা বাড়ে বই কমে না। বাগীশ জিজ্ঞাসা করে, যদি তুমি অন্য কাউকে বিয়ে কর তাহলে আমি অন্যত্র বিবাহে রাজী আছি কি না। আমি বলি, লতিকা কিছুতেই অপর কাউকে বিয়ে করবে না। যদি করে তাহলে অন্য বিয়েতে আমার কোন আপত্তি নেই।

লোকেন্দ্র বলিলেন, এবার তাহলে ‘অমরনাথের কথা’ হোক।

তারপর লতিকার পানে চাহিয়া বলিলেন, এই জন্য লোকেন্দ্র আপনার কাছে কোন দিন ‘বাগীশ’ হয়নি এবং কয়েক যুহুর্ন্তের জন্য আপনার পাণিপ্রার্থী হয়েছিল। তবে আপনারই সম্পূর্ণ জয় হয়েছে। আমি আপনাকে প্রণাম করি। অমরেরই জয়জয়কার। অমরের বাপেরও একটু আশা ছিল হয়ত আপনি অন্য কাউকে বিয়ে করতে পারেন যখন আপনার কাছে আমি শেষ উত্তর পেলাম অমরের বাপকে সব কথা

লিখে পত্র দিলাম। অনেক করে তাঁকে অনুরোধ করলাম তিনি যেন আপনাদের দুজনের বিবাহে আর বাধা না দেন এবং সম্পূর্ণ অনুমতি দেন। এর পরেই তিনি মত পরিবর্তন করে অমরকে ডাকিয়ে আনন্দের সঙ্গে অনুমতি দেন।

অমর বলিল, বাবা তখন আমাকে আশীর্বাদ করে বলেন মাষ্টার মশারের স্ত্রীকে আজই গিয়ে এ খবর দিয়ে লতুকে এনে তাঁর কাছে পৌঁছে দাও। আমি সেই দিনই গিয়ে তাঁকে সব কথা বলি।

শ্রীরের নূতন বড় ছবিখানিও তাঁকে দিয়ে এসেছি। সেই দিনই ইতিহাসের প্রকাশকদের কাছ হতে পত্র আসে যে—এ বৎসরে সেই বই হতে তাঁর অংশে এক হাজার টাকা প্রাপ্য হয়েছে, কি ভাবে এবং কোথায় টাকা পাঠাতে হবে জানলেই তারা টাকা পাঠাবে।

সেই পত্র পড়ে আর শ্রীরের সেই ছবি দেখে খুড়িমার সে কি কান্না! সে কান্না চিরদিন আমার মনে থাকবে। তাঁকে কত করে শান্ত ক'রে তবে এসেছি।

এ কথায় তিন জনেরই চোখে জল আসিল।

অপরাত্নে লতিকাকে লইয়া অমর সেখান হইতে বাহির হইল। লোকেদের আসিয়া তাহাদের ট্রেনে উঠাইয়া দিয়া গেল।

পরদিন প্রভাতে লতিকা ও অমর দুর্গাপুরে আসিয়া পৌঁছিল।

দুইজনে একসঙ্গে মায়ের চরণ বন্দনা করিয়া যখন প্রাচীর বিলম্বিত মনোহরের তৈলচিত্রের সম্মুখে নত হইয়া প্রণাম করিল, তখন মনে হইল যেন চিত্রে মনোহরের প্রশান্ত মুখমণ্ডল আনন্দে উদ্ভাসিত হইয়া উঠিল

এবং তাঁহার নিশ্চল নয়ন দুটি হইতে আশীর্বাদের অমৃত ধারা ঝরিয়া পড়িতে লাগিল।

মরণে মনোহরের প্রেম অমর হইয়া উঠিল।

জীবনের সকল বিফলতা বুঝি এমনি মরণে সফল হইয়া উঠে !

—শেষ—

